

KAKAPE LUCASIN KENENIKIAKI

LUCAS

Jawen jaibu Teófilo kene bumanikiaki, na janchadan

1 ¹⁻⁴Xanen ibu Teófiloon, en mia kene bumai uinwen. Jaska Jesúsun yusinkin taewani anua jawen tsuma kayabibun uian akeakenibu inun Jesúsun jawada jatun bedubi uinkubainima Diosun jatu katua jabun jawen kushipayabu jau chanikubainxanunbun jabun nuku yusianbu juni betsabun jabiasyadi bebunkidi unankin pewatan nuku kenexunimabuki. Jakia jawen tsumabun yusinmiskidi miandi min ninkaima: “Chanimaki”, eandi jabikaskadi shinankin en mia kenexunai min unankubainxanun jaskani Jesúsukidi dasibi yuka iki nati itan eandi ninkakin pewatan en mia kene bumaii.

Nashimanika Juan kainxanaikidi bebunkidi jawen ibuki nai tsuma chaninikiaki, na janchadan

⁵⁻⁷Judea mai pakea jatiuma anu Herodes jatun xanen ibu ikunkainaya jabiatiandi jawenabu Diosbe janchaxunika Abíasin enabu xuku betsa anua jawen kena Zacarías jiwekunkainikiaki. Janua jawen ainin kena Isabel Aarónen babadi yuxabujaidakin bake biama jawen benedi anibujaidatun bakewanun ixun shinankubainkin Diosun jancha chibankin jawen yunuti inun jawen nemati kaneabumaken jatuwen Dios benimakunkainikiaki.

⁸Janua janu Dios kenwanti Templo anu Abíasin enabu betsabube Zacarías uxe bestichai dayakin ⁹Templo anu jikixun jau ininti jatu kuaxuntanun jatun beya chibankin jatun kena tibi kenetan ja una tude bitan jawen kena bechitan Zacarías katuabu ¹⁰jikixun chi tsistuki jawen Dios kenwanti ininti dau Zacaríasin jatu kuaxunaya jemaintin anuxun yuda ichapabu ichaxun Dios kenwain danti ika maniabun ¹¹januxun ininti kuati chi tapu yusiudia Diosun nai tsuma damia nia ¹²Zacaríasin uin e itan en jaskai iki datejaidaya ¹³⁻¹⁶januxun nai tsuman yuikin:

—Zacaríasin, dateyamawe. Jawada min yukai ninkamisxun Diosun mia axunxanikiki. Min ain Isabel yuxabubiatun bake bima juni bake kainxanikiki. Kaiyaintian min benimaya minabudi benimaxankanikiki. Kenakinan: “Juanki”, axanwen. Januxun minabu Israelbu chakabubiakubainaibun Juan kainixun jatu yusinkin nukun medabenan yushin Dioskidi yuda ichapabu chibanmaya benimajaidaxankanikiki. Nanei taea Diosun Yushin Papatun kushipa wakubainkin jeneama uva jene vino inun jene paepa tibi akama min baken Dios benimawakin minabu Yavé Dios anu ana jatu chintunwanxanikiki, jatu chibanmakinan. ¹⁷Jaska inun, min bake Juanenan, Diosun kushipaya jawen Yushinyan bebun nixun jaska Elíasin Diosun jancha yuixunikatun ani keska wakín jatun ibubu jabun bakebu ana danananain sintanameama inun ja patapakin ninkaisbama jau jabundi Dios chibanunbun min bake Juanen yudabu jatun Xanen Ibu juai manamakin jatu shinan betsa wamaxanikiki— aka

¹⁸jawen jancha ninkabiatan shinankin Zacaríasin nai tsuma yukakin:

—Ma en anibuaki. En ain yuxabudiki. ¿Jaska waxun min jancha chanima en unantidumen?— aka

¹⁹nai tsuman yuikin:

—Eadan, en Gabrielki, nai tsuma xanen ibudan. Diosbe beisinain en janchamiski. En mibe janchanun na kakape Diosun ea yunuxuki.

²⁰Jakia en jancha min ikunwanmawen taea min bake kaindiana juyú min jiweyukunkainxanaii. Na en mia yuiaidan, Diosun akatsis ikin axanikiki— atan kaya

²¹jaskai nishma dakaken Templo jemaintin anuxun manakin jawenabu yuinamekin yuikin: “Jawa dakiai ikikiki, taxniamabin!”, iki maniabun ²²atimas taxnitán jaska waxun jatu jancha watimaken jabun unanbaunkin jakidi yuikin:

—Jaskakenan, ¿Templo dintu medanuxun namai keskakin Dios anua uinxumenkain?— ikaibun jawen meken bestiwen jatu unanmatan jabiaska janchama jatube dayakunkainkin

²³Templo anua jatun daya uxe nichintan Zacarías inun kaxun ²⁴jawen ain bakewa tuyaima 5 uxe besti jawenabube janchakatsi ikama Isabel jawen jiwe anus jiwekunkainkin shinankin: ²⁵“En bake bitidumawen taexun jau ana enabun ea dake wayamaxanunbun Diosun ea bechipaikin ea medabewaikiki”, ika benimakunkainikiaki.

Jesús nanexanaikidi Maríaki nai tsuma chaninikiaki, na janchadan

²⁶⁻²⁷Isabel tuya 6 uxe kaya chipash jawen kena María chutanamei pesediana jawen epan beneyawakatsi jatun xenipabu xanen ibujaida Davidin baba José yubakin ibu waimaken januxun Diosun jawen nai tsuma Gabriel jau kakape María yuinun Galilea mai pakea namakis mae

betsa Nazaret anu yunua ²⁸ damitan jawen dintu medan jikixun Gabrielin María yuikin:

—En miki baiyuaii. Yavé Dios miwen benimajaidakin mia bechipaikiki— atushia

²⁹ jawen jancha ninkai e itan Marían shinankin: “¿Jaskakin ea jaska yuimenkain?” ixun shinanyan ³⁰⁻³¹ nai tsuman ana yuikin:

—Maríaan, ewen dateyamawe. Miwen dabanán Dios benimajaidaiwen taexun juni bake mia bimakin miki nanexanikiki. Chipu kaian kenakin: “Jesúski”, axanwen. ³² Jamen Xanen Ibu kushipajaidakunkainaya jabun yuikin: “Yushin kushipa jatu binuatun bakeki”, iwanan, kenakubainxankanikiki. Ja inun, jaska matun xenipabu xanen ibu David xanen ibu ini keskai ³³ Diosun yunua min bake Jesús Jacobun bababun Xanen Ibu ipaxanikiki, niti ikama ikibi ikidan— aka

³⁴ Marían yukakin:

—En chutanamei pesediamabia ¿jaskatan en bake nanetidumen?— aka ³⁵ jawen nuikin nai tsuman ana yuikin:

—Kushipa jatu binuatun jawen kushipawen jawen Yushin Pepa yunua mikia dami naneima kainmaxun jatun Dios chibanyan: “Jadan, medibi Diosun bakeki”, ixun kenakubainxankanikiki.

³⁶⁻³⁷ Jamen betsadan, minabu Isabel ma yuxabubia ma juni bake bimaki. “Jaskatun bake bismaki”, iwanan, yuanbiakubainmisbu jamapai shadabu Diosun atiduwen taea ikis uxe meken buxka ka pustuki— akaya

³⁸ Marían yuikin:

—Peki. Jaska min ea yuiaidan, jau shinanxun ea anunwen. Diosun tsumadan, en eaki— aka ninkatan kainkainikiaki.

Isabel anu María bai kanikiaki, na janchadan

³⁹ Gabrielin María jancha wawanshinken Judea mai pakea mawa mati matipa anu mae jatiumanua María jawaida bai ka ⁴⁰ Zacaríasin jiwe anu jikitan Marían Isabel yuikin:

—Ewaan, miki bakin en mia uinyuiai— atushiaya ⁴¹ Isabelin María ninkaya jawen pustu medanua jawen bake tukuaya Diosun Yushin Pepatun kushipa waya ⁴² benimakin Isabelin unanxubima bis iki eai itan yuikin:

—Diosun mia bechipaikin ainbu betsabu binumakin mia inun min bake naneshinxun mia jabe duajaida waikiki. ⁴³⁻⁴⁴ Min ea kena min jancha en ninkaya en bakedi benimajaidai en pustu medanua tukuxuki. En jawayaidaken Diosun ea duawayaya en Xanen Ibun ewa min eki bayuiai. Jaskaken en benimajaidaii. ⁴⁵ Jaska inun, jawada Diosun mia axunxanai mia yuishina min ikunwainwen taea min benimajaidaii— aka

⁴⁶⁻⁴⁸ januxun Maríandi yuikin:

“En jawen tsuma bexmasjaidabiaken

Diosun ea shinankin ea katushinaki.

Jaska inun, dasibibun shinankin:

‘Diosun María shinan chankanwanmiski’, iwanan,

ekidi yuikubainxanaibuwen taea en mekenan Dios kushipawen taea
juinti benimakin en Xanen Ibu Dios en kenwaiin.

49-50 Ja inun, duawai jawen kushipaki mesemisbuwen nuikunkaini
shinan pepa kushipa jatu binukin keyuatun ea duajaida washinaki,
jawen kena medibi pepatunan.

51-53 Jaska inun, ibubis yubakatan keinsbuma jatu xanen ibu wakin
betsabu nuitapai buniaibu piti pepa jatu yani wamakin
mabu ichapayabu nuitapawakin meken bestia mais jatu nichinmiski.
Jaska inun, ibubis keainbu ichakawakin
jatu juinti nishma wakin ibubis xanen ibui kushipamisbu
jatu mintanuma wakin Diosun jawen kushipa uinmakin jatu
unanmaxanikiki.

54-55 Janunkain jaska nukun xenipabu Abraham inun jawen bababukidi
yubaxuni shinain
nukuwen nuikin nun jawen tsumabu Diosun ana nuku medabewakin
taewani jeneama nuku axunkubainikiki”,
ishian ⁵⁶janu María bayui niti ikama jabe jiwexun uxe dabe
inun besti nichintan janua María inun kanikiaki, jawen jiwe anu
chintunkainidan.

Juan kainikiaki, na janchadan

⁵⁷Janua Isabelin bake bima ewai pustujaidatan juni bake kainken
⁵⁸⁻⁵⁹ja dapi jiweabu inun jawenabun Dios Isabelwen nuikin medabewaya
ma bake kaian jabun ninkatan benimashianbun janua kainshina 8
xabatian ibu dabetan jawenabu kena uinun ika bexun jaska jatun
xenipabun yununi chibankin jawen jina kubichi mextexuntan jawen epa
Zacarías dabipananbun ⁶⁰jawen ewan jatu nemakin yuikin:

—Jaskamaki. Jawen kenadan, “Juan” wakanwen— jatu wa ⁶¹jabun
Isabel yuikin:

—¿Jaskakin jadi min kenai? Min benen enabun kenadan, jadi
jayabumaki— ikeaketan ⁶²januxun jadakidida jau kenanun jawen epa
juyuwen taexun mekenen besti yukabu ⁶³mekenendi jaki keneti jau
bexununbun jatu yunua bexuanbu Zacaríasin kenekin: “Jawen kenadan
Juanki”, jatu wa uin e itan “Jadidikiaki”, ikaiibun ⁶⁴jaskatanaibuns
Zacarías jawaida ana janchakin Dios kenwanikiaki. ⁶⁵Januxun ja dapi
jiweabu dasibi e iki: “Jabaa!” ishinxun janu mai pakea Judea mati
matipanu jiweabu anu jaskashina jatuki chanibaunaibun ⁶⁶jaskaibu
dasibibun ninkakin unain jaskakenan: “Diosun ja bake yumewaidan,
jaskadada ixanikika”, iki ja bakekidi janchanibukiaki.

Zacariásin Dios kenwanikiaki, na janchadan

⁶⁷Juanen epa Zacarías Yushin Papatun kushipa wa janchakin Dios kenwain Dios janchaxunkin yuikin:

⁶⁸“En Xanen Ibu pepa Israelitabun Diosuun,
min ma minabu medabewakin jatu pekakin akawai jushianwen
taexun en mia kenwaiin.

⁶⁹Min tsuma Davidin baba betsa kushipajaida mekenan kayabi
nuku anu min ma nuku nichinxunshinaki.

⁷⁰Nukun xenipabu jatu yubai jakidi jabias min jancha yuinxunika
medibi tibi min jatu janchamapaunidan,

⁷¹jawen taexun nukuki sinatamisbu inun,
dasibi nuku dananmisbu min jatu jawen maemakin nuku paxawatiduki.

⁷²Jaska bebunkidi nukun xenipabu jawawen jatu jaska wati nuii
jatuwen yubakai
jatukidi jancha medibi wai min janchapaunidan, jakimama min
shinaiin.

⁷³Jaska jawen kanetima wai nukun xenipabu Abraham min jabe yubakani
natian min ma ana nuku shinankin bechipaiaii.

⁷⁴Ana tsua dateyabi nun jiwetidubuma inun nukuki sinatamisbu
min jatu nuku daewaxunaki. Jawama nun mia dayaxuni

⁷⁵jaska chanima pepawen bestiwen medibitan
nukun jiwea jidabiwen mia bebun nun pe nikatsis ikaii, itan

⁷⁶janua epaan, miadan, ‘Dios dasibi binu keyuatun yuixunikaki’, iwanan,
mia kenaxankanikiki. Janu nukun Xanen Ibu Mesías juxanai
bebunkidi jawen bai min jatu pewamaxunxanaii,

⁷⁷jau jawenabun jatun chakabuwen taea
Dioski mesekin jatun shinan chakabu jenetan
Dios buamatan jau meketi jiwea jatu inanxanunan.

⁷⁸Nukun Dios nuikipa chakamatun nuku bechipaikin
nai anua jawen bake xaba badi bena keska nuku butexunxanikiki.

⁷⁹Yudabu jatun chakabuwen taea atimapanu mawai benui bupananbun
meshu ten ikai anua bin chaxa watan nuku inan keska wakin nun
jabu jiweyuabu nun jawen unanuma jiwei kai nuku yusinxanikiki”,
iniken

⁸⁰Zacariásin bake Juan ewai Diosbe jaibunamejaidai unanepai
jawenabu Israelbu yusindiana jadi tsua jiweabumanu jiwekunkainikiaki.

Jesús kainan, eskanikiaki, na janchadan

(Mt 1.18-25)

2 ¹Janua ja jaskaitian romano xanen ibujaida César Auguston
jawen maiwan kesua jidabi anuxun juni tibitun kena netankin jau

tanaxanunbun jawen tsuma betsa betsapabu yununikiaki. ²Januxun tsuan jaska tanakin taewadiama Siria mai pakea anu romano xanen ibu bexmas Quirinio xanen ibuaya romano xanen ibujaida César Augusto ja dukuntun jau jawenabu tananunbun xanen ibu bexmas dasibibu jatu yunuimawen taea ³jau tananunbun jatun xenipabun mae tibi anua besti ichai buaibun ⁴José jawen mae Nazaret mai pakea jatiuma betsa Galilea anu jiwebia Davidin babawen taea ⁵Josén jawen kena jatu netanmanun ika jawen xenipabu Davidin mae Belén, Judea mai pakea anu kakin María José bimakatsi ibuama bestimabu dadatamea tuyaima iyui jabe kai jikia ⁶⁻⁷Belén anu jiwe pakatan uxati ma keyubia texke ikabun jani itima ina jiwe anu José inun María ikabun janua Marían juni bake iyua kaian dachutan yabuxun burro pimati ji xantu wanibuki basi nawatan datanxun uiainbun

**Nai tsuma damitan chaxuwan mekemisbuki Jesús
kaiankidi chaninikiaki, na janchadan**

⁸jabiatiandi Belén dapixun jabun ina chaxu mekemisbun basi xukua anuxun meshu medan uiainbun ⁹Diosun nai tsuma damia Diosun kushipawen chaxajaida jatu dapi nia chaxuwan mekemisbun uin datejaidaibu ¹⁰nai tsuman jatu yuikin:

—Dateyamakanwen. Matunabu jawen benimai keyuxanaibu en matuki chanikin kakapepa bexunxuki, ninkakanwen. ¹¹Matun xenipabu xanen ibujaida Davidin mae Belén anu jaska Diosun yubani matun medabenan Xanen Ibu ma kaianki, Cristo Mesíasdan. ¹²Janu benabaunkin ina jiwe anu yabuxun burro pimati ji xantu wanibuki datanbu man bechi katiduki. Jaska bechitan en jancha chanima man unanxanaai— jatu waya

¹³jakimamadi nai tsuma midimajaida damibidan jabetan Dios kenwain nawakin yuikin:

¹⁴“Mai anuxun tsuabunda jabun Dios chibankin duawamisbu Dios kushipajaidatun jau jatu unanuma jiwemanunwen. Jaskaken dasibibun Dios kushipa nai anua jau kenwandianunbunwen”,

jatu watan ¹⁵nai anu ana buaibun benimai yuinamekin yuikin:

—Jabaa! Jaska Diosun nuku yuixudan, Belén anu benakin uinun bukanwen— itan

¹⁶jawaidabaini Belén anu jikitan benabaunkin atimas ina jiwe medan José inun María inun jawen bake burro pimati ji xantu wanibuki datanbu ¹⁷bechitan jaska nai tsuman bakeishtakidi jatu yuia ninkabidana jatunmebi chaniaibun ¹⁸⁻²⁰jaska Diosun nai tsuman jatu yuixu ninkabidan uinwani chanima jabiaska uinkanxu chaxuwan mekenikabu chintunbainkin Dios kenwankubainaibun dasibibun jaska jabun yuikubainaibu yuda betsabun ninkai e itan shinain: “¿Jawa yui

ikanimenkain?” ikaibun janua Marían jaska wanaibu jawen juinti medans shinan jeneama inikiaki.

Templo anuxun Jesús jatu uinmakin iyunibukiaki, na janchadan

²¹ Janua 8 día ka manashinxun jawen xenipabu Abrahamnen ani keska wakin jawen jina kubichi mextekin jatu bimatán María bake nanediama jabias kena Diosun nai tsuman yuimakidi shinankin Josén Maríabetan kenakin Jesús wabun

²² Moisin yunukin bake kainma naxuxatan besti jau ichati jiwe anu jikixanunbunwen, ani jaska chibain María bake kainma ma naxuxai pea janua jawen ibu dabetan ja bake Jerusalén anu jatun Xanen Ibu Dios jawenawamanun ixun iyuaibun ²³ ja dukun bebunkidi Dios janchai “Juni bake ja dukun kaianan, enaki”, ikai Moisin ninkatan kenei jaska chibankin jawenawamatanun, iwanan, ²⁴ iyukin ja inantan ana jawena wakatsi ikin jaska Diosun yununi keska wakin deiwan dabe ja menuxunti buaibun

²⁵ jabatiandi juni betsa pepajaida Dios kenwankin kaneisma jawen kena Simeón Jerusalén anu jiwexun Diosun Israelbu dasibi ana medabewakin jatu pekakin akawaxani yubani Simeón manakakubainshina jawen Yushin Pepa jaya jatun medabewakin unanmaya ²⁶ Mesías Diosun yunuxanai uindiana jau debuyamaxanun Diosun Yushin Papatun yubaimaken ²⁷ januxun Templo jemaintin anu Diosun Yushin Papatun Simeón yunua ka tsauken jaska Moisin yusini jawen juni bake bianananun ixun ibubun iyui jemaintin anu jikiaya januxun Diosun Yushin Papatun Simeón yusinkin jadatuda bake jabun medabenan jau unanun ixun unanma ²⁸ benimakain María Jesús mebintan ikuxun Ibu Dios kenwankin yuikin:

²⁹ “Xanen Ibu kushipatuun, natian ea duawakin jaska min ea yubaima min ma akaki.

Jaskawen taea jawa dateama unanuma benima paewen en mawaxanai ea ana nemayamaxanwen.

³⁰ Na bakewen yudabu paxawakin min mekexanai en ma uiain,

³¹ jawen taexun na bakewen dasibi jiwebaunabu min xanen ibuai jawen min jatu unanmaxanaidan.

³² Jadan, bin ewapa chaxa keska nawa betsa betsapabun uinkin minabu Israelbu min kushipawen min jatu duawai uindiaxankanikiki”,

akaya

³³ jaska wai ninkai José inun María e idabeaibun ³⁴⁻³⁵ januxun Simeónen jatu yuikin:

—Diosun jau matu duwakubainxanunwen— iwanan, María besti yuikin:

—Na bakedan, jawen yuda Israelbu unanti wakatsi Diosun katuniki. Jawen yusian ninkatan jatiditun shinan betsa watan chibainbun inun jatiditun shinan betsa wama danankubainxankanikiki. Min bake danankin nupe kenujaidawen min juinti chachia keska wakin mia yumanwankin mia nuitapawaxankanikiki— anikiaki.

³⁶⁻³⁷Jamen betsadan, Israelin bake Aserin baba betsakidi mia yuinun ninkawe. Penuelin ainbu bake Ana chipash beneyaima 7 badi besti jabe jiwea jawen bene mawaniken janua beneuma 84 badi jiwekunkaini Diosun jawen jancha yunua jawenabu jatu yuixunmis Dioski mesei samakekin jau jawenabu medabewanun ika jawen kenwanti Templo jemaintin anua kaianma jatu Dios yukaxunkubainmis ³⁸José inun Maríaki nukutan jadi benimakin Dios kenwantan jaska Diosun Jerusalénkidi yubani dasibibun manaibu Anan uinwanshinxun Jesús kidi jatu yuikin kaka wakubainikiaki.

³⁹Januxun juni bake ja dukun kaian jau jaska wai bununbun Moisin kenekin yununi chibankin menetan Galilea jawen mae Nazaret anu chintunwankin ana jawendi Josén jatu iyuima ⁴⁰jadia Jesús ewai jawen yuda kushipai unanepaya Dios jawen benimakin duawakubainikiaki.

Jesús bedunan Templo jemaintin anu kashian ibubun bechinibukiaki, na janchadan

⁴¹Jaska inun, Pascuatian Egipto anuxun jatun juni bakebu tenanma jatun xenipabu Diosun nai tsuman jatu dunkebaini shinain besinun ika badi tibi Jerusalén anu Jesúsun ibubu bupakemisbun ⁴²janua ma Jesús 12 badiyaken jawen ibubu jatun beya chibain buaibu jabiatandi Jesús jatube kai taeshina ⁴³⁻⁴⁴jawen ibubu besi keyutan jawen mae anu jatube jiwemisbube José inun María chintunbidanaibun janu Jerusalén anu Jesús besti bashikua ibuan unanma benadiama shinankin: “Jabe bedunanbube juikiki”, itan, José inun Marían shinanyabi kai ma xaba jidabi chai buxun badi kaya Jesús jawenabu anu benakin nati atan ⁴⁵jawenabu anu inun jawen mae anu jiweabu anua jawa bechiamma benakin keyutan janu uxashini Jerusalén anu benanun ika chintunkainshina ⁴⁶janua 3 día ibubun benakubaunkin atimas Templo jemaintin anu jaki nukutushikin Diosun jancha kenenibu yusinananmisbube tsauxun jatu ninkakin Jesúsun jatu yukai jatube janchanamekunkainaya ⁴⁷Jesús unanepai ninkakin jabun ja yukaibu tibi yui pewaiwen taea dasibibun ninkai: “Jabaa! ¿Tsan juni bake bedunan unanepamen?” iki jabube maniabu anu ⁴⁸atimas jawen ibubu jaki nukui e itan jawen ewa Marían yuikin:

—Kukaan, ¿jaskakin min nuku jaska washinamen? Ea inun min epa miwen nui chakayamai datekin nun mia benakin mae nati ashianki— aka ⁴⁹Jesúsun jatu yuikin:

—¿Jaskakin man ea benabaunai? ¿En Epan jiwe anua ma en jatube uinametidu man shinanmamen?— jatu wa ⁵⁰jawa jatu yui ai dabanen ikin ninkabumaken

⁵¹Janua kainmabaini jawen ibu dabebe Nazaret anu chintunbainima jadia Jesús yumei ninkanikai jawen ibubun jancha tapinkubainaya ibu Marían juinti medans Jesús jaskai jakimama shinanxunkubainaya ⁵²janua jawen yuda ewai jawen shinan unanepaya Dios inun jawenabu jawen benimakubainibukiaki.

**Janu tsua jiweabumanuxun Nashimanika Juanen jatu
yusinikiaki, na janchadan**
(Mt 3.1-12; Mr 1.1-8; Jn 1.19-28)

3 ¹Janua badi ichapa kaya romano xanen ibujaida betsa Tiberio César ma 15 badi xanen ibukin dasibi jatu yunukubainaya Judea anu Poncio Pilato romano xanen ibu bexmasaya Galilea anudi jawen tsuma Herodes romanoma xanen ibu bexmasdiaya Iturea inun Traconítide anudi jawen tsuma Herodesin betsa Filipino xanen ibu bexmasdiaya Abilene anudi jawen tsuma Lisaniyas xanen ibu bexmasdiaya ²ja jaskaibun Jerusalén anuadi judiobu Anás inun Caifás Diosbe jawenabu janchaxunika xanen ibujaida dabe inibukiaki.

Ja jaskaibu betsatian Zacaríasin bake Juan janu tsua jiweabumanua ewaima jiwea Diosun yunua ³taxnikidan Jordán jene ketankubaunkin jiweabu tibi jatu yusin taewakin yudabu yuikin: “Matun shinan betsa watan matun chakabu Diosun jau matu buaxunxanun ninkatan jawada chakabuwen man benua jiwea jenedikanwen. Matun shinan maewatan man ea uinmaya en matu nashimaxanaii”, iwanan, jatu yusinkubainikiaki. ⁴Jaska Diosun jancha yuixunika Isaiásin jakidi kenekin yuini keska axuin Juan jaskanikiaki:

“Jadi tsua jiweabumanua jui kushipawen chanikin jatu yuikin:

‘Nukun Xanen Ibu nai anua matuki bayui ma kemaikiki.

Matun juintinin shinan pewadikanwen, bai kayatapia keska wakinan.

⁵Napaku tibi buakin mata waxun

mati tibidi pewakin panpa waxun

xantu xantupadi keyu buakin panpa waxun

jawen bai pewaxuna keska wakin jatun jiwea pewatan

⁶januxun Diosun medabewati jua dasibibun uinxankanikiki’ ”,

akin jaska yuini keska wakin Juanen akin jatun chakabu Diosun jau

ana shinaryamakubainxanun chakabu jenekin jatun shinan betsa

watan jawenabu jawen unanmati Juan yukakin: “Ea nashimawe”, jau ea

anunbun ixun Juanen jatu yusinkubainikiaki.

⁷⁻⁸Janua Juanen jau ea nashimanun ika bebidan bebidanaibu jatu yuikin:

—Matudan man padananan dunu pianamemis keskabuki. Man jaska keska matuki Dios sinatakin matu kupijaidaxanaiwen taea matun shinan betsa wakanwen. Jaska waxun matun chakabu man ma bextekea xabakabi man ea uinmaya en matu nashimaxanaii. Jamen jaskama ibubis kein shinan betsa wakatsi ikama: “Nukun xenipabu Abraham Diosbe jaibunameniwen taea nun jawen bababu nuku kupiama ixanikiki”, ikin, ana shinaryamakanwen. Jakia Abrahamnen bababu dasibi matu yamawakin keyutan na mishki manibauna Diosun damiwakin Abrahamnen bababu benawaxuntiduki. ⁹Jaskaken matu yuinun ninkakanwen. Ji tibi bimi pepa jayama dedatan man kuamis keska wakin bestibu Diosun matu kupixanikiki. Jamen tsuabuda Abrahamnen baba kayabibun jawen yusian jau chibankubainunbunwen. Jakia man jaska wamaken matu kupinun, iwanan, duewen matu deda keska watan chi anu matu udenun ixun manaikiki— jatu waya

¹⁰januxun yudabun Juan jaskai ninkatan yuka ikin:

—Jaskakenan, Dios daewakinan, ¿jaska waxanpa?— akeakeabu

¹¹Juanen jatu yuikin:

—Dios daewakinan, min tadi dabeyadan, ja nuitapai tadiuma man betsa inantiduki. Ja inun, min pitiyadan, yuda betsa piti jayama man betsa inantiduki— iwanan, jatu yuikubainaya

¹²jabun romano gobierno pei bixunmisbudi jau eadi nashimanun ika bexun yukakin:

—Yusinaan, ¿nukukain, nun jaskatidumen?— akabu

¹³Juanen jabudi yuikin:

—Gobierno pei bixunkin man ichawaxunmisdan, janu kesua besti xanenibun matu yunua bixunkubainxankanwen, ana jatu padanmadan— jatu waya

¹⁴januxundi soldadobundi yukakin:

—Nukukain, yusinaan, shinan betsa watan mia unanmakatsidan, ¿nun jaskaxanai?— akabu Juanen jabudi yuikin:

—Matudan, matun shinanen ichakanikakin jatun jamapai mebinyamakubainxankanwen. Ja inun, chani chakakin yuda betsan pei padantan mebinyamakanwen. Jakia matun daya pei besti bi benimakubainxankanwen— jatu waya

¹⁵ninkatan ichapabu jawen janchawen benimakin jabun medabenan manakin Juankidi shinain yuka iki yuinamekin: “Diosun yubani nukun Mesías Cristodan, ¿jamenkain?” ikaibu ¹⁶jaskaibu Juanen jatun shinan unankin dasibi jatu nemakin yuikin:

—Chanima, eanan jawen matu unanmati wakin jenewen besti en matu nashimakubainaii. Jakia ja man jakidi shinainan, kushipajaidatun ea binuan chipu juikiki. Kushipajaida mesetun ea binujaidawen taexun en jawen jawaumajaidatun jaska waxun jawen bichi tae mexpun pekakin

medabewakin jawen dayadu itsakin kushipa midintun en axuntidumaki. Jakia jatun matu pepawakin Diosun Yushin Pepa matu inantan bika matu tenemakin matun chakabu buakin yamawa keska waxanikiki, jawada chakabu bechipaiama chiwen kua keska wakinan. ¹⁷Jaska inun, xekiwan bimi ta keyuxun pepa aduti anu adutan jawen xepa man kuamis keska wakin dasibi jawenabuma danankin jawa chi nukaisma anu udenxun kuanun, iwanan, manakubainikiki— iwanan,

¹⁸januxun jancha ichapawen jatu nemakin yusinkin jatun shinan jatu betsa wamakin kakape Juanen jatu yusinkubainaya ¹⁹januxun judiobun xanen ibu Herodesin jawen betsa Filipon ain Herodías mebinshina inun chakabu betsa betsapa wakubainai ninkakubainkin uintan yudabu jakidi yuishinxun Juanen nemakin jawen chakabu jenemanun, iwanan, betsabun ninkaibun Juanen Herodes nemakin ja ashianwen taexun ²⁰Herodes jaki sinatakin Juan jau ana jakidi janchayamanun, iwanan, jawen soldadobu jatu bichimanikiaki.

Juanen Jesús nashimanikiaki, na janchadan

(Mt 3.13-17; Mr 1.9-11)

²¹Juan bichidiabuma yuda ichapabu nashimakubainkin Jesúsdi Juanen nashima jawen Epa Diosbe janchaya nai baxnei ²²Diosun Yushin Pepa deiwan keska jui jamamaki butuaya nai anuxun jawen Epan yuikin:

—Miadan, min en bakeki. En mia bechipaijaidakin katunidan, en miwen benimajaidaii— anikiaki.

Jesúsun xenipabu eska tana keyunibukiaki, na janchadan

(Mt 1.1-17)

²³Jabiatiandi Jesús 30 badiya jawen Epa Dios dayaxunkin taewaya Josén yumewaimawen taexun yudabun yuikin: “Jesúsun epadan, Joséki”, iwanan, yuikubainibukiaki. Jawen xenipabukidi mia yuinun ninkawe.

Josén epadan, Elíkiaki.

²⁴Elín epadan, Matat inikiaki.

Matatin epadan, Leví inikiaki.

Levín epadan, Melquí inikiaki.

Melquín epadan, Janai inikiaki.

Janain epadan, José inikiaki.

²⁵Josén epadan, Matatías inikiaki.

Matatíasin epadan, Amós inikiaki.

Amósin epadan, Nahúm inikiaki.

Nahúmnen epadan, Eslí inikiaki.

Eslín epadan, Nagai inikiaki.

²⁶Nagain epadan, Máhat inikiaki.

Máhatin epadan, Matatías inikiaki.

- Matatíasin epadan, Semeí inikiaki.
 Semeín epadan, Josec inikiaki.
 Josecin epadan, Joiadá inikiaki.
- 27 Joiadán epadan, Johanán inikiaki.
 Johanánen epadan, Resá inikiaki.
 Resán epadan, Zorobabel inikiaki.
 Zorobabelin epadan, Salatiel inikiaki.
 Salatielin epadan, Nerí inikiaki.
- 28 Nerín epadan, Melquí inikiaki.
 Melquín epadan, Adí inikiaki.
 Adín epadan, Cosam inikiaki.
 Cosamnen epadan, Elmadam inikiaki.
 Elmadammen epadan, Er inikiaki.
- 29 Erin epadan, Josué inikiaki.
 Josuéen epadan, Eliézer inikiaki.
 Eliézerin epadan, Jorim inikiaki.
 Jorimnen epadan, Matat inikiaki.
 Matatin epadan, Leví inikiaki.
- 30 Levín epadan, Simeón inikiaki.
 Simeónen epadan, Judá inikiaki.
 Judán epadan, José inikiaki.
 Josén epadan, Jonam inikiaki.
 Jonammen epadan, Eliaquim inikiaki.
- 31 Eliaquimnen epadan, Meleá inikiaki.
 Meleán epadan, Mená inikiaki.
 Menán epadan, Matatá inikiaki.
 Matatán epadan, Natán inikiaki.
- 32 Natánen epadan, David inikiaki.
 Davidin epadan, Jesé inikiaki.
 Jesén epadan, Obed inikiaki.
 Obedin epadan, Booz inikiaki.
 Boozin epadan, Sélah inikiaki.
 Sélahn epadan, Nahasón inikiaki.
- 33 Nahasónen epadan, Aminadab inikiaki.
 Aminadabin epadan, Admín inikiaki.
 Admínen epadan, Arní inikiaki.
 Arnín epadan, Hesrón inikiaki.
 Hesrónen epadan Fares inikiaki.
 Faresin epadan, Judá inikiaki.
- 34 Judán epadan, Jacob inikiaki.
 Jacobun epadan, Isaac inikiaki.
 Isaacun epadan, Abraham inikiaki

- Abrahamnen epadan, Téráhn inikiaki.
 Téráhn epadan, Nahor inikiaki.
 35 Nahorin epadan, Serug inikiaki.
 Serugin epadan, Ragau inikiaki.
 Ragaun epadan, Péleg inikiaki.
 Pélegin epadan, Éber inikiaki.
 Éberin epadan, Séláhn inikiaki.
 36 Séláhn epadan, Cainán inikiaki.
 Cainánen epadan, Arfaxad inikiaki.
 Arfaxadin epadan, Sem inikiaki.
 Semin epadan, Noé inikiaki.
 Noén epadan, Lámece inikiaki.
 37 Lámece in epadan, Matusalén inikiaki.
 Matusaléne in epadan, Henoc inikiaki.
 Henocin epadan Jéred inikiaki.
 Jéredin epadan Mahalaleel inikiaki.
 Mahalaleelin epadan, Cainán inikiaki.
 38 Cainánen epadan, Enós inikiaki.
 Enós in epadan, Set inikiaki.
 Setin epadan, Adán inikiaki.
 Adánen epadan, Dios inikiaki.
- Jaskaken Jesús juni kayabi idianiki, nuku keskadan.

Diablo Satanásan padanpaia Jesúsun ninkama inikiaki, na janchadan
(Mt 4.1-11; Mr 1.12-13)

4 ¹⁻² Janua Juanen Jesús nashimaya Diosun jawen Yushin
 Pepawen kushipajaida wa jene Jordán anua Jesús kai janu tsua
 jiweabumanu Diosun Yushin Papatun Jesús iyushina kauanaya yushin
 chakabu xanen ibu diablon padankin kanemanun ikaya janua 40 día
 janu jiwexun jawa piama binukainaya jaskakainaya Jesús bunijaidai
³ uinkin unanti wanun, iwanan, yushin chakabu diablon Jesús
 yunukin:

—¿Jaska min Diosun bakemenkain? Na mishki damiwakin misi wawe,
 min buniai ja pixunan— aka

⁴ januxun Jesúsun nemakin:

—Jaskakidi Diosun jancha kenenibudan, ninkawe. “Piti besti shinain
 yudabu jawens jiwetidubumaki. Jakia Diosun jancha yuini ninkakin
 chibain yudabu pei jiwetidubuki”, aniki— iwanan —Jaskawen taexun ja
 min ea yunuaidan, en akamaki— akaya

⁵ jaska ninkatan januxun mati keyatapajaida anu yushin chakabu
 diablon Jesús iyuxun mai jidabi anu mai pakea jawendua tibi inun jawen
 damiwati kushipawen jawaida xabakabi uinmakin ⁶ yuikin:

—Na mai jidabi mai pakea tibi anu inun jawen xanen ibubu dasibi mebinixun en mekeawen taexun tsuada en kushipa inankatsi en jaska wamiswen taexun jau mia kenwanxanunbun en mia jatu xanen ibu wamatiduki. ⁷Jaskawen taexun eki mesei danti ixun ea kenwankin min ea xanen ibu waya dasibi mia inantan en mia jatu mekemakubainxanai— aka ⁸Jesúsun ana nemakin:

—Na Diosun jancha kenenidan, ana ninkawe. ‘Matun medabenan Yavé Dios ja besti duawakin kenwankubainkanwen, yushin betsa ninkamadan’, aniki. Jaska keneniwen taexun ja min jaska yuiaidan, en mia akamaki— aka

⁹⁻¹¹januxun Jerusalén anudi iyuxun Templo keyatapa mamaki nichinxun diablon ana yuikin:

—Na Diosun jancha kenenidan, miandi ninkawe.

‘Jau mia mekekubainunbun jawen nai tsumabu Diosun yunuxanikiki.

Mishkiki min jutekepanan min kauanai mia mekesuxankanikiki’, aniwen taea jaska min Diosun bake kayamenkain ea uinmai nenua ishchuwe— aka

¹²ana nemakin Jesúsun yuikin:

—Jaska kenenibu min dama yuiai chanimabiaken ana betsa entsedi mia yuinun ninkawe. ‘Matun Yavé Dios unanti wayamakanwen’, akin kenekin yusindianiki. Jaskawen taexun min ea ana yunuaidan, en ikamaki— aka

¹³ana jawawen padankin unanti watima janu tsua jiweabumanu ana iyuxun chipu ana padankatsi Jesús diablon jeneyubainaya

Galilea anuxun Jesúsun yusinkin taewanikiaki, na janchadan
(Mt 4.12-17; 13.53-58; Mr 1.14-15; 6.1-6)

¹⁴⁻¹⁵janua Galilea anu kaxun mae tibi anu jatun ichati jiwe anu jikia akeakekin Diosun Yushin Papatun kushipa jayawen taexun Jesúsun jatu yusiain ninkai jakidi janchakin dasibibun kenwankubaunibukiaki.

¹⁶Jaskakunkauntani janua yumei ewaima Nazaret anudi ka jaskai jatube ichai beyamis juindukuntitian janu ichamisbu jiwe anu jatube jikia Diosun jancha kenenibu yuixunun ika Jesús benia niken ¹⁷Diosun jancha yuixunika Isaíasin keneni jancha una inanbu chudetan jakidi jancha kenenibu bechitan jatu yuikin:

¹⁸⁻¹⁹“Nuitapaibu kakape en jatu yusinun Diosun ea katuniwen taea jawen Yushin Pepa en jayaki.

Januxun juinti nishmabu jatu benimawakin

yuda betsan jatu tsuma wa jenemakin

bekun keskabu bepexa keska wakin

jatu yusin pewakin jatu ichakawaibu nemakin

Dios benimawatikidi dasibibu en jatu unanmakubainxanun Diosun ea yununiki”,

jatu watan keneni jancha yuikin keyuxun ²⁰ ana sebitan una mekenika inan mebintan aduaya ana jatukidi besua tsaua manibaunxun beis chakayamaibun ²¹ Jesúsun jatu yusinkin taewakin:

—Jaskakidi Isáfasin keneni en matu yuixunai man ninkaxudan, nukunabu medabewakin na jabiatian Diosun ma meneikiki— iwanan, ²² unanepakin jancha pewen jatu yusiain ninkai e itan jawen jancha bechipaibiakin shinain: “Nadan, nukunabuki, Josén bakeki. ¿Janixun jaska tapintanshinxun nuku yuimenkain?” iki yuinamebaunaibu

²³ Jesúsun ana jatu yuikin:

—Man ea itimaska kaya wai en uiaiin. Unanepa janchawen man ea yuikin: “Min juni dauyakiaki. Mimebi xuxakin min kushipa nuku uinmawe”, ea akin, “Cafarnaúm anuxun jawen unanmati dami kushipa min jatu uinmashinakiaki. Min ashian keska wakin na min mae anuxundi nuku axundiawe, nun uinunan”, akin man ea yuitidubuki— iwanan, ²⁴ ana jatu yusinkin:

—Chanima Diosun jancha yuixunikadan, jawenabun jawen mae anuxun ninkakatsi ikama dananmisbuki. ²⁵ Jaska inun, Diosun jancha yuixunika Elías jiweken badi dabe inun besti namakis ui ikamaken pitiuma nukun xenipabu nuitapajaidaibun ainbu jawen bene ma mawayama midimabudi yumankubainibu man ninkamiski. ²⁶ Jaskabiaibun nukun xenipabu Israelbu beneuma nuitapaibu jau Elíasin dasibi jatu medabewanun Diosun yunuama iniki. Jakia maewan Sidón dapi mae betsa Sarepta anu nawa ainbu beneuma nuitapai jiwea besti jau medabewanun Diosun Elías yunukin nichiniki. ²⁷ Jaska inun, Diosun jancha yuixunika Eliseo jiweatiandi jatidi nukunabun chami buisma teneaubun nukun xenipabu jatuki dakekin danainbu Eliseon jatu xuxawamadi iniki. Jakia Siria anua nawa betsa jawen kena Naamán Eliseo anu Diosun yunua ja besti xuxawaniki— akin

²⁸ nawabukidi jatu yui ai ninkai dasibi ichati jiwe anu ichabu jatu jaska wai ninkatan jaki sinatajaidakin ²⁹ kainmabainkin Jesús tsumaxun ninikubainkin jatun mae mawa keyatapa mamakixun januxun xutunun, iwanan, iyuaibun ³⁰ janua Diosun kushipawen ichabu namakisa kakin jatu mepanmabaini jawen mae jenebainikiaki.

Juni betsa yushin chakabu jaya Jesúsun kainmanikiaki, na janchadan *(Mr 1.21-28)*

³¹ Janua Galilea mai pakea anu Nazaret jenebaini mae betsa Cafarnaúm anu jikishinxun sábadu tibi jatun ichati jiwe anuxun jatu yusinkubainkin ³² xanen ibu kayabi kushipakin jatu yui ai yudabun ninkai e itan: “¿Jaskamen?” iki benimakubainaibun ³³ jabanudi juni yushin chakabuya tsaua yushinen bis imakin unanxubima yuimakin:

³⁴—Jesús Nazaret anuaan, ¿jaskai nuku anu min juxumen? ¿Nun yushin chakabu nuku yamawanun ika min juadaka? En mia unaiin, min Diosun bake pepa medibidan— ikaya ³⁵yushin chakabu Jesúsun nemakin yuikin:

—Janua jaskama nesetan ja juni anua kaindikaintanwen— aka yushin chakabu juni medanua kainkainkin jawa wama mai pusamabainai uin dasibibu ³⁶datei:

—Jabaa!— ike ikei yuinamekin yuikin: —Nadan, yusian betsa jayaki. Xanen ibu keska kushipajaidaki. Jawen jancha paepaki, yushin chakabu xunskaya yunua ninkai jawen datei kainkanikikidan— itan ³⁷janua bui jakidi chania akeakeaibu dasibi janu jiwea akeakeabun Jesúsun jaska wai ninkanibukiaki.

**Simónen dais ainbu inun isin betsa betsapa teneaiibu Jesúsun jatu
xuxawanikiaki, na janchadan**
(Mt 8.14-17; Mr 1.29-34)

³⁸Ja juni medanua yushin chakabu nichintan jatun ichati jiwe anua kaya Simón Pedron jawen jiwe anu Jesús iyua Simón Pedron dais ainbu yuna chakayama daka ninkatushitan jawen isin jau mainwanun jakidi Jesús yuiabu ³⁹janu dakanu Jesús kaxun jawen yuna nemaxuna damaintan benikain jabiatandi jatu duawakin bawaxun jatu pimaya

⁴⁰jaska waxu ninkabaikín janua ma badi kai meshuaya dasibi ja mae anu jiwea akeakeabun dasibi isin betsa betsapa teneaiibu Jesús anu iweabu Jesúsun jabu tibi mekin xuxawakin kaya wapakekin ⁴¹ja isin betsa betsapa teneaiibu anua yushin chakabu nichian kainkainkin unanxubima jancha kushipawen yuikin:

—Miadan, min Diosun bakeki— akin yuikin Diosun Mesías Cristo unainbuwen taexun jau jadidi janchakin ana yuiyamanunbun Jesúsun jatu janchamamakin nemapakekin yushin chakabu kainmapakenikiaki.

**Judiobun ichati tibi anuxun Jesúsun jatu
yusinkubaunikiaki, na janchadan**
(Mr 1.35-39)

⁴²Janua uxashini ma pena kemaya Jesús butukaina mae dapi benanta ja mesti ka benabaunkin jawen jaibuaibun bechitan jaki nukuxun yuikin:

—Dasibitun mia benakanikiki. Nenua ana kayamawe— akabu ⁴³Jesúsun jatu nemakin yuikin:

—En Epa xanen ibuai kidi en jatu yusinkubaunun ea yununiki. Jaskakenan, mae betsa betsapa anu en yusindiai katiduki— jatu wabaini ⁴⁴Israelbun mae tibi anu Jesús kakunkaunkin janu Diosun jancha ninkakatsis iki janu judiobu ichamisbu tibi anuxun jatu yusian akeakenikiaki.

**Baka midima Jesúsun jatu nexematan janubi jatu
katunikiaki, na janchadan**
(*Mt 4.18-22; Mr 1.16-20*)

5 ¹Jatu yusinkubauntani Galilea ianenwan ketankubaini kakin jawen kena betsa ian Genesaret anu niti ixun jatu yusianyan Diosun jancha ninka pewakatsis iki jaki midima ichakin texke akabu ²xaxu ewapa dabe xaka mashin keti axun baka nexenikabun jatun jisin chukaibu Jesúsun uinkubaini ³kakain Simón Pedron xaxuki inatan jau ana ja kachu xekanunbun yunua jawen betsabetan jawen jisin jawaida nexetan jawen xaxu ja kachu xekakin nuntanxunabu ja namaki tsauxun kexa mapubaunabu Jesúsun jatu yusinpakekin ⁴keyutan Simón yuikin:

—Ana ja kachu nuajaidanu xekaxun januxun baka bikin nexekatsi matun jisin pukubaunkanwen— aka ⁵Simónen yuikin:

—Yusinaan, yame chai tanakin nun pukujaidabia nun jawa biama ishiaiin. Jakia jaska min nuku yunuai en anun kain— ixun

⁶nuajaida anu xekatan jawen jisin jawen betsabetan pukubaunabu baka midima jikia ninibidanabu xankamajaida jatun jisin tadas iki taeaya ⁷xaxu betsa anu jawen jaibuaibu jabe dayamisbu jau medabewai benunbun jatu meken bea bea aka jawaidabidan medabewakin jatun xaxu dabe baka mata wabu xaxu jikikatsis ikaya ⁸⁻¹⁰baka midima nexekanxuwen taea Simón Pedro inun jabe dayamisbu inun Zebedeon bakebu jawen jaibu betsabu Santiago inun Juan e e iki dateaibun Simón danti itan Jesús yuikin:

—Yusinaan, en juni chakabuki. Ea anua butukaini ea jenebaini kadiwe— abia

Jesúsun yuikin:

—Eki dateyamawe. Na ikis min baka nexexu keska wakin yudabu min ea jatu ichawaxunxanai— aka ¹¹jatun xaxu dabe keti atan janu jawenabube xaxu inun jisin bakayabi bashibainkin tapinkatsis ikin Jesús chibain jabe bunibukiaki.

**Juni betsa bichiki dasibi chami betsani Jesúsun kaya
wanikiaki, na janchadan**
(*Mt 8.1-4; Mr 1.40-45*)

¹²Janua chipu betsatian mae betsa anu Jesús kaken juni bichiki dasibi chami betsani Jesúski nukutan ja bebun dankui sapakain di itan beuxun ea akin:

—Yusinaan, ea kayawakatsis ikin min ea kayawatiduki— aka ¹³jawen chamiwen datekin danankin tsuan metsakin meisbumabiaken Jesús jawen dabanani iki mexunkain mekin yuikin:

—Jaa. En mia kayawaii— aka jawen chami sakada iki daxnukui keyuaya ¹⁴Jesúsun nichinkin nemakin:

—En mia yuiyai ninkaidawe. Jawada en mia axukidi tsua yuiyamayukubaintanwen. Jadi dukun kakin Diosbe nukunabu janchaxunika min yuda min ma kayaxu uinmatanwen. Jaska min ma kayaxu jau dasibibun mikidi unanunbun jawen jatu bepadanbainkin jabiasyadi inankuin Moisin yununi jatu anu buditanwen. Min jaska buaya min kayaxu jabun unanxankanikiki— abaini kaya

¹⁵yuda betsabun Jesúsun jaska wakín akaikidi chanibaunaibu ninkatan jawen jancha ninkakatsis iki inun jau jatu xuxawanun badi tibi Jesús anu bebidan bebidanaibu jatu xuxawapakei ¹⁶janua jawen Epabe besti janchanun ika jatu paxkabain janua tsua jiweabumanu kakunkainikiaki.

**Juni yuda babuni jawen chakabu buaxunkin Jesúsun
xuxawanikiaki, na janchadan
(Mt 9.1-8; Mr 2.1-12)**

¹⁷Janua ana xaba betsatian Galilea inun, Judea mae betsapa anua inun, Jerusalén anuadi beshinxun Jesúsun yusiain ninkai tsauabun jabianudi Moisin jancha chibanjaidanika fariseobu inun Moisin jancha yusinananmisbu jiwe medan ichaxun Diosun xuxawati kushipayatun Jesúsun jatu yusianyan ¹⁸jau Jesúsun xuxawanun, iwanan, juni yuda babuni jaki isin teneaiibu butiki datantan jawen jaibuaibun Jesús anu bakebidani ¹⁹janu yudan kaian xukuabuwen taea jaska watan bichibain Jesús uinmatima mai bawa jiwe sapa xeni mamaki inabain jawen dakatiki janua butenun, iwanan, janua bexpa wakín pudenkin xui watan janua ja juni yuda babuni Jesús anu buteaibun ²⁰jaska jatun shinan ikunjaidawaibu unankin juni yuda babuni Jesúsun yuikin:

—Dateyamawe. Min chakabuwen Diosun mia kupikatsis ibiakín man ea ikunwainwen taexun jau Diosun ana shinanyamanun en mia buaxunaii— akaya

²¹Moisin jancha jatu yusinmisbu inun fariseobun ninkatan Jesúski sinatai june yuinamei: “Ja juni chakabuki. Dasibi nuku padain Dios keskakatsi ikikiki. Diosun besti jawen chakabu buatiduki”, ikaibun ²²januxun tsuan Jesús yuiamabia jatun shinan unankin Jesúsun jatu yukakin:

—Matunan, ¿jaskakin man shinan chakai ikai? ²³¿Jadatu bikamamen, jawen chakabu buaxunadaka, jawen yuda beniadaka? Ja dabe bikaken Diosun besti atiduwen taexun ²⁴¿jaskakin man shinan chakai? En matun Juchi Kayabi Iyua na mai anua ea en jawen kushipa jayatun jawen chakabu en buaxuntidu man unanun en akai uinkanwen— iwanan, juni yuda babuni kaya wakín yuikin:

—Benitan mia jaki bakebidankanxu bui min jiwe anu kadiwe— akin ²⁵jawaida kayawa benikauan jawen dakati bitan buaya mapubaunabun ²⁶date paeyabi yuikin:

—Jabaa! Tsuan jaska waismaki. Jakia Dios pepajaida kushipatun na juni ma kayawaxuki. Natian jaska nun uinsma nuku uinmaikikidan— iwanan, Dios kenwanibukiaki.

Leví gobierno pei bixunika Jesúsun katunikiaki, na janchadan
(Mt 9.9-13; Mr 2.13-17)

²⁷Janua kainkaini janu bai kexa anu januxun Roma gobierno pei bixunmisbun jiwe anu Leví tsuaa Jesúsun bechitushitan yuikin:

—Ea chibankubainwen— aka

²⁸Leví benitan dasibi jenebainkin chibankin taewai jabe kashinxun ²⁹jawen jiwe anuxun Jesúswen benimakin piti midima jatu pewamatan xanen ibu pei bixuin padanananmisbu inun jawen jaibu betsa betsapabu jatu ichawa Leví inun Jesúsbetan piaibun ³⁰Diosun yunuti inun jawen nemati yusinananmisbu inun fariseobun Jesúsun jatubetan piai uinkin yuankin jaki chiti ikabu yukakin:

—¿Jaskakin matun yusinan pei bixunika chakabubu inun nuku ninkaisbumabetan pimenkain? Chakabujaidabubin!— ikaiibu ³¹Jesúsun jatun jancha ninkatan jatu yuikin:

—“En peki”, iwanan, shinainbu anu juni dauya kaismaki. Jakia isin teneaiibu anu besti juni dauya kenabu kamiski. ³²Jaskaken: “En chakabuki”, iwanan, shinainbu jatun juinti pewakin en jatu medabewa shinan betsa watan jau Dios ikunwanunbun en juniki, juni dauya keskaidan. Jakia: “En chakabumaki”, ikin shinainbu jatu medabewatanun ika en juamaki— jatu wa

Samakenikabun Jesús yukanibukiaki, na janchadan
(Mt 9.14-17; Mr 2.18-22)

³³januxun ana betsan Jesús jatu yukaxunkin:

—Nashimanika Juanki chiti ikabu inun fariseobuki chiti ikabun jatun chakabuwen taea jatunmebi ichakanikai samakechakayamakin Dios kenwankin jawen kushipa yuka chakayamakin jawa piyuisbumaki. ¿Jaskai miki chiti ikabu samakeama badi betsa tukanma pikin nexukubainmisbumen?— akabu ³⁴Jesúsun jatu yuikin:

—Juni ainyain nawaibu anu jawen jaibuaibu paxkadiabuma piama jatunmebi ichakanikatidubumaki. ³⁵Jakia jatu xununbaini ma jatu dapaxkabaini kaken manukin jawen jaibuaibu samakekin piama itidubuki. Jaska keska kainkin en jatu xununbaina ewen nui en jaibuaibun piama samakexankanikiki— iwanan,

³⁶ana jatu yusinpakekin miyuiwen yuikin:

—En yusianan, tadi bena estediama keskaki. Matu yusinun ninkakanwen. Tadi xeni baxnekea tadi bena tuax estediama mextexun jawen tadi xeni tsamian patsa estei ana baxnekei pikumiski. Jamen

matun yusianan, tadi xeni baxnekea keskaki. En yusianwen tsamian keska wakín matun yusian en pewatidumaki. ³⁷⁻³⁸ Ana jabiasyadi keskawen matu yusinun ninkakanwen. Bichi bishtu xeniki uva jene bena buspudiana manekin mata waxun denex mestenwan jamebi katsai buspui bichi bishtu xeni pexemiski, vino bena inun bichi xeni benuidan. Jabiasyadi wakín en yusian bena matun shinan xeni en jusitidumaki, benukinan. ³⁹ Jamen vino xeni ma beya wanixun vino bena pepabiaken akatsi ikabuma keska wakín matun beya xeni bechipaikin matun shinan bena wakatsi ikama en yusian bena man danaiin— jatu wanikiaki.

**Juindakuntitian jaki chiti ikabu xekiwan bimi tsekaxun
pikubainibukiaki, na janchadan**
(Mt 12.1-8; Mr 2.23-28)

6 ¹ Januxun ana juindakunti sábadó betsatian xekiwan bai namakis manan baiwen bukin jaki chiti ikabu Jesúsbe bukin xekiwan bimi tsekaxun daxukidi axun pikubainaibun ² fariseobu jabudi jatube kakín jatu uinkin Jesúski chiti ikabu jatu yukakín:

—¿Jawai juindakunti sábadotian man dayai? Sábadotian dayakín Diosun Moisés nuku nemani chibanma man kaneaii— jatu waibu ³ Jesúsun jatu yuikín:

—Bunikín jawada nukun xenipabu pepa Davidin jawen jaibuaibubetan anidan, ¿man uinsmamen? Diosun janchadan. ⁴ Matu yuinun ninkakanwen. Dios kenwanti tadi jiwe medan David jikixun Diosun Moisés yusiniwen taexun Diosbe nukunabu janchaxunikabun besti pitibiaken jawen Dios kenwanti misi Davidin bixun pitan jawen jaibuaibudi pimanikiaki. Jaska wabiaya Dios jaki sinatama iniki, kaneamawen taeadan— iwanan,

⁵—Jaskaken juindakunti sábadotiandi matun Juchi Kayabi Iyua xanen ibukín en yunuaiwen taea eki chiti ikabundi bunikín pikín kaneabumadiki— jatu wanikiaki.

**Juindakuntitian juni meken meyushkini Jesúsun
kaya wanikiaki, na janchadan**
(Mt 12.9-14; Mr 3.1-6)

⁶ Chipu ana sábadó betsatian mae betsa anu kaxun jatun ichati jiwe medan jikixun Jesúsun jatu yusianyan jabianudi juni meken yusiudi meyushkini jatube tsauken ⁷ januxun jabun jawen yusian danankín Jesús yuanun, iwanan, juindakunti sábadotian ja juni mepeai uinun, ixun, jaska wai uintan unanti watan ja anun ika manai tsauxun ⁸ jaskaibu Jesúsun jatun shinan unankín juni meken meyushkini yuikín:

—Benikidan ja maniabu namakis niwe— aka jawenabu maniabu namakis benia niken ⁹ januxun fariseobu inun Mosésin jancha jatu yusinmisbu Jesúsun jatu yuikín:

—En matu yukai jaskadamenkain, ea yuikanwen. Moisin jancha pepa chibankin juindukunti sábadotianan, ¿jaska watimen? ¿pewakin medabewatimen? ¿chakabuwatidaka? ¿yuda betsan jiweadan, paxawakin meketimen? ¿nuitapawakin yamawatidaka?— jatu watan ¹⁰jatun jancha manakin Jesúsun uinbaunaya jawa yuiabumaken juni meken meyushkini nia Jesúsun ana yuikin:

—Min meken meshanwen— aka meshanyan jawen meken ma mepekei peaya ¹¹uin fariseobu inun yusinananmisbu jaki sinatakin jaska waxun Jesús nematimen ika june yuinamei jaki yubakai taenibukiaki.

Doce junibu kushipa wakin Jesúsun jatu katunikiaki, na janchadan
(Mt 10.1-4; Mr 3.13-19)

¹²Janua xaba betsa badi kaya Jesús ja mesti kai mati mapetan uxama Diosbe janchashini ¹³penaya jaki chiti ikabu dasibi jatu kena beabu ¹²besti katutan jatu kenakin: “Man en kushipayabuki”, jatu wanikiaki. ¹⁴Ja ¹²junibun kena mia yuinun ninkawe. Simón kena betsa wakin Pedro wani inun, jawen betsa Andrés inun, Santiago inun, Juan inun, Felipe inun, Bartolomé inun, ¹⁵Mateo inun, Tomás inun, Alfeon bake Santiago inun, romano nawabu nichinkatsis imis Simón inun, ¹⁶Santiagon bake Judas inun, Judas betsa Iscariote anua yumeni chipu jatun Jesús jatu achimaxanaidan, jati Jesúsun katunikiaki.

Yuda ichapabu Jesúsun jatu yusinikiaki, na janchadan
(Mt 4.23–5.12)

¹⁷⁻¹⁹Januxun ¹²junibu katutan jatu iwei bututan mawa tenanman panpanuxun jaki chiti ikabu Jesúsun yusinun ika tsauken jabianudi jabun chibainbu inun midima yudabu Judea anua inun, Jerusalén anua inun, ianenwan kexa betsa Tiro inun Sidón anua jawen jancha ninkatanun ika bekin isin teneai bu jatu kayawamakatsi iweshinabu jaki dasiabu isin teneai bu xuxawakin yushin chakabun jatu nuitapawai kainmakin jawen kushipa janua kainkin Jesúsun jatu kayawaya uin bechipaikin Jesús mekatsis ikaibun

Diosun jatu benimawaxanaikidi jawen tsuma kushipayabu
Jesúsun jatu yusinikiaki, na janchadan

²⁰jatu xuxawakin menetan jaki chiti ikabu besti beiskin jatu jancha wakin:

—Tsuabuda yumain matunmebi man kenkunkainama Dios xanen ibukin matu mekekubainxanaiwen taea man benimakunkainmiski.

²¹Ja inun, tsuabuda jawada pepa besti bechipai chakayamai jawen nuijaidaiwen kupikin Diosun jatu yaniwama keska waxanaiwen taea benimapaketi shinain benimakubainkanikiki.

Ja inun, tsuabunda matun chakabu shinain jointi nishma man kaxakatsis imisbuwen taexun Diosun matun jointi shinan chankanwan man benimakunkainmiski.

²² Ja inun, matun Juchi Kayabi Iyua tsuabunda man ea chibainbuwen taexun jabun matuki ejen iki danain matu ichakin jatun ichati jiwe anu man ana jikiyamanun matu nemakin matu danainbun man benimakunkainxanaai. ²³ Jaska inun, Diosun jancha yuixunikabu ichakawanibu keska wakin matudi ichakawaibu nai anuxun Diosun matu duawaxanauiwen taea jawa dateama shinan chankankubainxankanwen— iwanan,

²⁴ mapuabudi yuikin: —Jamen matudan, mabuwen jiwei kein “En mabu midima jayaki”, iki tsuabuda natian man jawen benimaii. Jakia uatian man nuitapaxanaai.

²⁵ Ja inun, tsuabuda yaushikin piti yani bestiwatan man benimakubainaibu ana tsuan matu medabewakin matu duawabuma buni tenei man nuitapajaidaxanaai.

Ja inun, natian tsuabunda Dios shinanma matun jamapai besti shinain man usanmis ana jaskama matun jointi nishma kaxai man nuitapajaidaxanaai.

²⁶ Tsuada ibubis jawawenda jawenduakin dasibibu jatu bechipaimakin man jatu kenwanmatidudan, uindaxankanwen, mesekidan. Jabun Dios yuixunikapaiaibun jatu padan paepawa matun xenipabun jatu kenwanpaunibu keska iyamaxankanwen— iwanan,

Nukuki sinataibuwen nuitikiaki, na janchadan

(Mt 5.38-48; 7.12)

²⁷ ana jatu yusinkin:

—Man ea ninkaibu matu yusinun ninkakanwen. Matuki sinataibu jatuki sinatama jatuwen nuikubainkanwen. Ja inun, matu danainbu jatu bebis danananma jatu duawakubainkanwen. ²⁸ Ja inun, tsuabunda matu ichakawai matuki sinataibun jatu bebis manakunama jau Diosun jatu medabewanun jatu Dios yukaxunkubainxankanwen. ²⁹ Ja inun, tsuada miki sinatakin mia detekin ispais aka jabebis sinatai kupinameama: “Uke betsadi ea awe”, ika dabekexunai keskakin shinankubainxankanwen. Ja inun, tsuada min dibiawen taexun min dakukuti tadi mia biankin buaya min tadi manankidiadi yaushiyama jadi inanyuxankanwen. ³⁰ Jamen tsuada nuitapai juxun min jawada mia yuka medabewakin inanyukubainxankanwen. Jamen betsadan, tsuada min jawada bushinxun ibu wakin mia ana inankatsi ikamaken jas shinain jaki sinatayamakubainxankanwen. ³¹ Jamen betsadan, tsuada miwen nuikin jau mia medabewaxanunbun matun dukun jaska shinankin uinmakin jatu medabewakubainxankanwen, jaska wai nuikipakin man kaneamakidan.

³² Jaska inun, Diosun jancha danain chakabumisbu jabiaskadiai duanamemisbuki. Jaskaken matudi matun jaibubes man duanamei man jawa binunananmaki. ³³ Ja inun, juni chakabu jabetan chakabu wamisbube nui medabenankubainmisbuki. Jaskaken matudi pepabuwen nui jabu besti medabewai ma pepamadiki. ³⁴ Jamen betsadan, juni chakabubu duanamekin betsan jawen jaibun jamapai buxun jawaida ana bexunmiswen taexun duawakin jawen jamapai ana yuka inanyukatsis imisbuki. Jaskaken matudi duanamei pepabiai tsuanda matun jamapai jawaida ana matu bexunmis besti man inanmiski, ana manakuti pepa bikatsi shinanmadan. ³⁵ Jakia pepakatsis ikidan, eskatiki. Matuki sinaitabuwen nuikin jatu duawankin matun pepa jatu uinmakubainkanwen. Jaskawen taexun tsuabunda min jamapai biwanshinxun mia ana bexunmisbu besti ana ja shinanma mia yane bexuinsbumadi jatu inandiakin yuda dasibibu jatu duawakubainxankanwen. Jaska wakin man jatu binumamiskan matun pepawen Dios dasibi binuatun matu manakuxanikiki, jawen bakebu matu wakinan. Janunkain jabun Dios kenwainsbuma inun juni chakabububiaken betsa betsapa inankin Diosun jatu duawamiswen taea ³⁶ matun Epa Dios nuikipa keskai nuikipadiakubainkanwen— iwanan,

Yuda betsa chitekin ja atimatikiaki, na janchadan
(Mt 7.1-5)

³⁷ Jesúsun ana jatu yusinkin yuikin:

—Tsuada ja akin chitekin unanti wayamakanwen. Man jatu jaska wamakan Diosundi jabiaskadi wakin matu chitekin ja akamadi ixanikiki. Ja inun, tsuada jatu dake wayamakanwen. Man jatu dake waismaken Diosundi matu dake wama ixanikiki. Ja inun, tsuabunda matu chakabuwaibu ja shinanma jatu jakimawakin buawe. Man jaska waya Diosundi matun chakabu matu buaxunxanikiki. ³⁸ Ja inun, jawada man jaya paxkaxun juni betsa inankubainkanwen. Jaska wai man yaushiamaken Diosdi matuki yaushiana jabiaskadi matu waxanikiki. Tsuanda man xeki inankin tana pewatan sakuki deukin yaushiana tsinki tsinki akin mata waxun man jatu inanmis keska wakin jabias shinanwendi Diosun matu manakuxanikiki— atan,

³⁹ Jesúsun miyui betsa tibiwen jatu yusinkin yuikubainkin:

—Juni bekunman juni betsa jabe bekun iyupai jadakidi iyuai unanma jabia dabe mikin maebain di idabemisbuki. Jaska keskai matun shinan pewakin mae wadiama jawa jatu yusinkin man pewatidumaki. ⁴⁰ Ja inun, jawen tsumabun jatun yusinan binutidubumaki. Jakia jatun yusinan jatu tapinmakubainaya jatun yusinan keska itidubuki.

⁴¹ ¿Jaskai ikunwain betsa pewakin medabewanun, iwanan, jamapai pese jawen beduki jikia min bikatsis ibiai mina dukun ji ewapa min

uianmamen? Ji jidabiwen betimanabia jawa shinanma yuikin: “Uian. Min ji pese beduki ikadan, ¿mia bipa?” akin min yuimiski, kanekinan. ⁴²Jakia bemakis bepadamei janchamisbuun, matudi chakabubia betsa chakabuai uinkin man ja amiski. Man ji jidabi betimana tsekaxun puta keska wakín matun juinti medanua matun chakabu ewapa putatan ana kaneama medabewakin ji pese min jaibun bedu anua bia keska wakín juni betsan chakabu bexmas jayadi man medabewakin yusintiduki— iwanan,

Jawen bimi tibiwen ji unanmisbukiaki, na janchadan

(Mt 7.17-20; 12.34-35)

⁴³ana miyui betsawen Jesúsun jatu yusinkin yuikin:

—Ji pepa bimiai jawen bimi chakabuismaki. Jakia ji chakabu bimiai jawen bimi pepaismadiki. ⁴⁴Jaskawen taexun jawen bimi tibiwen ji man unanti wamisbuki. Mae muxa anua higo bimi man tsekaismaki. Ja inun, isne anua uva bimi man tsekaismadiki. ⁴⁵Jabiaska keskadi tsuabuda duapabu juinti pepaya jancha pepawens janchamisbuki. Jamen tsuabuda duapa juinti pepa jaya jawa chakabu jayama yui jancha pepawens janchamisbuki. Ja inun, tsuabuda jatun juinti medan shinan chakabu mata janchakin chakabu yuikin kainmamisbuki— iwanan,

Ninkaibu inun ninkaisbumakidi yusinikiaki, na janchadan

(Mt 7.24-27)

⁴⁶Jesúsun jatu yusinkubainkin yuikin:

—Xanen Ibuun, Xanen Ibuun, akin man ea kenabiamis ¿jaskakin en matu yusian man aismamen? ⁴⁷En jancha ikunwankin ea chibanun, iwanan, jawada en yuai akubainxanaibukidi matu yusinun ninkakanwen. ⁴⁸Tsuanda mishki jiwe wakatsi ikin jene kexa mai basankin uke medan mishkiki pesaxun ja mamaki mishki tsamabidankin jiwe wadan, en yuiyai akubainmisbudan, ja jiwe wanika keskabu ixankanikiki. Janua bai matajaidabidankin jawen jiwe achia ja jiwe mishkiki tsamiawen taea jawa takax iki tsibusketidumaki. ⁴⁹Jamen jawada en yuiyai ea danankin akama ixanaibukidi matu yuinun ninkakanwen. Tsuanda mishki jiwe wanun, iwanan, jene kexa mai basankin kini keyatapawama bexantu bestiwatan mishki tsamabidankin jabebis watan jiwe wadan, ea danainbudan, ja jiwe wanikabia unainsmapabu keskaki. Janua bai matajaidabidankin jawen jiwe achia mishkiki tsamiawen taea jawaida tsibukei di imiski. ¿Jadatu man jaskamenkain? Uindakanwen— akin Jesúsun jatu yusinikiaki.

Romano capitánen dayadu Jesúsun xuxawanikiaki, na janchadan

(Mt 8.5-13; Jn 4.43-54)

7 ¹Januxun jatu yusin menetan Cafarnaúm anu Jesús chintuntani jikiken ²janua jabanudi romano soldado xanen ibu capitánen

dayadu isin tenei mawakatsis ikai bechipaijaidakin ³Jesús ma jua ninkatan jau xuxawaxunyunun judio xanen ibu anibubu nichinkin Jesús chanimakin jatu yunua ⁴⁻⁵Jesús anu buxun jau xuxawaxuin kanun ea akin yuixunkin:

—Capitán juni duapaki. Nukun ichati jiwe nuku jatu amaxunyamaki. Ja inun, nukunabu bechipaijaidadialiswen taexun medabewakin jawenadi xuxawaxuin kawé— akeakeabu ⁶jatun jancha ninkatan jatube kai ma jawen jiweki kemai kaya jau yuixununbun soldado capitánen jawen jaibuaibudi yunua Jesús juaiki nukuxun capitán yuixunkin:

—Xanen Ibuun, en jaibu capitánen jancha en mia yuiái ninkawe. Ewen dabanen en jiwe anu juyamawe. ⁷En pe bexasjaidawen taea mianu en kama ixuki. Jaskaken en tsuma jau xuxanun min jancha besti yunukin ea xuxawaxunwen. ⁸Ja inun, jatun ea yunumisdan, eadi en xanen ibu yayaki. Eandi soldadobu yunui en xanen ibudiamiski. Betsa yunukin: “Kawe”, en wa kamiski. Betsa yuikin: “Juwe”, en wa jumiski. En dayadudi yunukin: “Awe”, en wa amiski. Jakia min ea binuawen taexun min jancha bestiwen min xuxawatiduki, en unanan— akin capitán jancha yuixuna

⁹Jesúsun jawen jancha ninkatan soldado capitán ikunjaidawaiwen taea Jesús e itan yudan kaianen chibain jachun beaibukidi nasauketan jatu yuikin:

—Jaska na nawa xanen ibun ea ikunjaidawai keska nukunabu Israelbu en jaska jatu uindiamaki— jatu waya ¹⁰jawen jaibuaibu soldado capitánen jiwe anu chintunbain jawen dayadu ma xuxaxuna uinibukiaki.

Beneyabia jawen bene ma mawatun bake mawa Jesúsun bestenwanikiaki, na janchadan

¹¹⁻¹²Jesúsun jaska wabaini jawen ¹²tsumabu kushipayabu inun, jaki chiti ikabu inun, yudan kaianen chibain jabe bukin mae betsá jawen kena Nainkidi kai kemaya ainbu jawen bene mawayamatun jawen bake bestichai mawaxuna maiwanun, iwanan, juni dabetan baketiki beaibu jawenabu jachun bei jawen ewabe kaxakubidanaibu ¹³Jesús jaki nukutan jawen ewa nuitapaiwen nuikin yuikin:

—Kaxama nesewe— atan ¹⁴bedunan mawa beaibuki Jesús kemaxun jawen baketi besti tsumaya niti itan tsumabun mawa yuikin:

—Bedunaan, en mia yuiái bestenwen— aka

¹⁵mawa jawen tadiwen yabukin mestenjaida wabu jaska peketima bestenkauan natsaua janchai taeaya jawen ewa benimawatan jawen bake nichinxuna iyuya ¹⁶Jesúsun jaska wai uin jaska uinsbuna jawen datei mesejaidakin:

—Jabaa! Nuku anu Diosun jancha yuixunika pepajaida ma ana taxnishinaki. Jawenabu duawai Dios ana bayuxuki— ikin Dios kenwankubainaibun ¹⁷jaska Jesúsun axu ninkabain Judea mai

pakeanuabu inun mae betsa betsapa anuabundi yuiaibu bana ninka akeakenibukiaki.

**Jaki chiti ikabu Nashimanika Juanen Jesús anu jatu
yununikiaki, na janchadan
(Mt 11.2-19)**

¹⁸Nashimanika Juan bichiti jiwe anu jiwea jaska Jesúsun akubainaikidi jawen tsumabu Juanki chanikubainaibu ¹⁹ninkatan jawen tsumabu dabe kenaxun jatu yunukin:

—Jesús anu kaxun: “Mekenika Diosun nukun xenipabu yubani chanima juxanaidan, ¿min jabiamen? ¿Betsa daka nun manai?” akin ea yukaxuntankanwen— iwanan, jatu yunua

²⁰⁻²¹buxun isin betsa betsapa teneaiibu xuxawakin yushin chakabu betsa betsapa kainmakin bekun inun bexuxbu uinmakin Jesúsun jatu kaya wapakeaya Nashimanika Juanki chiti ika dabe Jesús anu kaxun jaska wai bechitan atimas jaki nukutan betsan yuikin:

—Mianu Nashimanika Juanen nuku yunushinaki. Mekenan Diosun nukun xenipabu yubani chanima juxanaidan, ¿min jabiamen? ¿Min jamadaka? ¿Betsa daka nun manayuai?— aka ²²ja dabe shinanmakin Jesúsun yuikin:

—Jawada uinkin man ninkakubainaidan, jaska Juanki chaniditankanwen, eskaibudan. Bekun inun bexuxbun uiainbu inun, jaska mapuisbuma mapuaibu inun, jabu bichiki dasibi chami betsani jaki dakemisbu main sakada iki keyuaibu inun, patabun ninkakin keyuaibu inun, mawa ana besteinbu inun, jabu yumainbu jatun paxati kakape ninkatan benimaibudan, jaska Juan yuitankanwen. ²³Tsuanda ea ikunwain jawen shinan chakabui chintuinmadan, chanima benimaxankanikiki!— jatu wa

²⁴Juanen jatu yunushina iwani ana chintunbainabun ja dapi mapubaunabu Jesúsun Juankidi jatu yui taewakin:

—Janu tsua jiweabumanuadan, ¿jawa man uintantanimamen? Tawa pei niwen bubi bubi wai keska wakin ¿junin jawen shinan betsa betsapa maewa akeakeimamenkain? ²⁵¿Jaskamen? ¿Jaskamadaka? ¿Jaskada jakidi kaiain man uintantanimamen? ¿Junin tadi pepa sawea daka? Tadi pepa sawea benimai beyusidan, mabu akunjaidayabu jatun xanenibun jiwe jawendua anu besti jiwea ikaibu man uintidubuki. ²⁶Jaskakenan, ¿jawa man uintantanimamen? ¿Diosun jancha yuixunikamenkain? Jaki. Juanan, chanima Diosun jancha yuixunikaki. Ja inun, yuixunika betsabu Diosun yununi Juanen ma jatu binuaki. ²⁷Ja inun, Diosun jawen bake nichinkatsi Juankidi yuikin:

‘Ninkawe. Janu min kaxanun jau pewai kanun en jancha yuixunika betsa bebunkidi en yunuxanaii, en mia nichindiamadan’,

akin jakidi jawen kaka kenenibuki. ²⁸ Chanima en matu yuiaii. Yuda dasibibun Dios dayaxunkin tsuan Juan binuama ibianibun janu Epa Dios xanen ibuaitian ikunwainbu jaki dasiabu bexmasjaidabiabun Juan binuxankanikiki— jatu wai

²⁹ Jesúsun jancha ninkakin jabun Nashimanika Juanen jancha ninkatan shinan betsa waibu jawen unanti wakin Juanen jatu nashimaimawen taexun yudan kaian inun romanon xanen ibu pei bixunikabun yuikin: “Chanimaki. Jawada Diosun akaidan pepaki”, iwanan, shinan akeakeaibun ³⁰ jakia judio fariseobu inun Diosun jancha kenenibu yusinananmisbun Juanen jancha ninkama inun jawen unanti nashimati danainmabuwen taexun Diosun jabudi duawapanan danainmabun ³¹ Jesúsun ana jabianudi jatu yuikin:

—Nukunabudan, ¿jaskada shinain imisbumenkain? Matu yuinun ninkakanwen. ³² Mae namakis jemaintin anu beyuskin jatun ibubu imis mawai bake mishtinbu xuku dabea tsauxun xuku betsan yuikin: “Tepe dewe nun mawabiaya benimai man nawamaki. Janua nun kaxei ikaskin nun nuiti nawa mawabiaya man kaxamaki”, jatu wabu jawawenda beyusti unanbuma keskabuki, nukunabudan. Matun shinan chankanti jubiaken man benimamaki. Jamen matun chakabu shinain kaxakatsi ikama man shinan betsa waismaki. ³³ Eskaki, matu yuinun ninkakanwen. Ja dukun Nashimanika Juan juxun matu yusinkubainkin misi pepa piama vino paepa akama matube beyusamaken jakidi janchakin: “Yushin chakabu jayaki”, iwanan, man yuia akeakeimaki. ³⁴ Janua eadi matun Juchi Kayabi Iyua juxun misi pepa pikin vino paepa aki en matube nawabiakunkainaya ea yuankin: “Uinwen. Pikeki. Paenkin romano pei bixunika chakabubu inun yuda chakabu betsabu jaibu wamiski”, ikin man eadi yuanmiski. ³⁵ Jamen nuku dabe nun pepabiaken Diosunabu kayabibu besti unanepakin jabun nukun yusian ninkatan nuku chibankanikiki— jatu waya

Fariseo Simónen Jesús pimanikiaki, na janchadan

³⁶ januxun fariseo betsa jawen kena Simón jawen jiwe anuxun Jesús pimakatsi chanima jawen jiwe anu Jesús ka pikatsi ixkexkanan dakai baxti ibaunxun piaibun ³⁷ jabia mae anuadi ainbu jininipan Jesúsun piai ninkatan xeni jene ininipa kadujaida nenkati juxupa bishtuki bexun ³⁸ june Jesúsun tae dapi danti itan jawen chakabu shinain juinti nishmajaida june kaxakin jawen beun jene besti Jesúsun tae pechiki tuis tuis axun jawen bu chaipawen jutekede atan jawen tae petsu petsu akin keyutan xeni jenewen jawen tae cha akaya Jesúsun unanbiakin uianmaken ³⁹ Jesús jatun iatun uintan Jesús kidi shinankin: “Dios nuku yuixunika kayabitunan ja ainbun jawen tae meaidan ainbu chakabukunkainmis unankeanai”, ikaya ⁴⁰ Jesúsun jawen shinan unantan medabewakin yuikin:

—Simóon, ¿jawada mia yuipa?— aka fariseon yuikin:

—Ea yuiwe, yusinaan— aka

⁴¹miyuiwen Jesúsun yuikin:

—Juni dabetan juni betsa anua pei biyuimabu dibiabuki. Betsan 500 xaba daya pei dibiken betsandi 50 dibiaki. ⁴²Ja dabetun jania pei bixun pakatidubumaken juni betsan ja dabe pei inanyuima dibiabu jatuwen nuikin ja dabetun dibia jatu kenatan jakimashinaki, ana shinanmadan. Jaskaken ja dabetanan, ¿jadatutun ja jatun pei inanyuima bechipaijaidaimenkain, betsa binunkinan?— aka ⁴³fariseon yuikin:

—En shinanan, ja midima jakimawashinatun bechipaijaidaikiki— aka

—Chanimaki. Min yui kayabiai— iwanan ⁴⁴Jesús nasauketan ainbu uinkin Simón yuikin:

—Na ainbun ea duawaidan, ¿min uiain?— iwanan —Min jiwetan en jikiai jaska wamisbu keska wakín juchukiti unpax min ea tsaunxunama ibiaxuken na ainbun jawen beunwen ea juchuxun jawen buwendi en tae ea jutekede axuki. ⁴⁵Ja inun, ea beya wakín min ea tantsu akamaken mia anu jikia en dakaken na ainbun besti ea beya wakín en tae petsu petsu akin jeneamaki. ⁴⁶Ja inun, ea beya wakín xeni teipa ininjaidawen en bu min ea macha akamaken xeni jene ininjaidawen jatun en tae cha axuki, ea beya wakín. ⁴⁷Jaskaken ewen nuikin ea bechipaijaidaiwen taexun jawen chakabu midimabiaken ma en buaxuna min unantiduki. Jamen tsuanda chakabu eskadabes nun buaxuna mawaida ea inun en Epa shinankin midinwanmisbuki— iwanan, ⁴⁸ainbudi yuikin:

—Epa Dios en mia daewaxunxuki, min chakabu mia buaxuntan jau ana shinanyamanunan— akaya ⁴⁹jabube jatu iabun piaibun ninkatan baxexen yuinamei:

—Nadan, ¿jawa juni ikimenkain? yudabun chakabu xunska buaxuntidudan— iwanan, yuia akeakeaibun

⁵⁰jaskabiabun ainbu Jesúsun ana yuikin:

—Min ea ikunwainwen taexun min chakabu min ma bextepei pexuki. Ana jawa dakei dateama unanuma inun kadiwe— anikiaki.

Ja ainbuaibun Jesús medabewanibukiaki, na janchadan

8 ¹Janua ana betsatian jaska pepawen inun chakabuwen kupi Dios nenu ana xanen ibuxanaikidi mae ewapa betsa betsapa inun mae jatiubuma anuxun Jesúsun jatu yusinkubaunaya jawen 12 tsuma kushipayabun tapin jabe bukubainaibun ²⁻³ja dikabi ainbu betsa betsapa isin teneaiibu xuxawakin yushin chakabu kainmakin Jesúsun jatu medabewakin xuxawaimaken jatun peiwendi Jesús inun jawen tsumabu medabewakubaini María Magdalena anua Jesúsun 7 yushin chakabu kainmama inun, Susana inun, xanen ibu Herodes yunuxunmis Cuzan ain Juana inun, ainbu betsa betsapabudi Jesús anu butan butankin medabewakubainaibun

Jexe sa akakidi miyuiwen Jesúsun jatu yusinikiaki, na janchadan
(Mt 13.1-23; Mr 4.1-20)

⁴mae betsa betsapa anua bei Jesús uinkin jawen jancha ninkanun ika ichabidanbidanaibun yudan kaian jaki dasi ichabu Jesúsun jawen jancha juneawen jatu miyuikin:

⁵—Juni betsan jawen bai anu xekiwan sa aki kaxun sa akaya jexe betsa kati bai namaki kauana yudabun pema pema akaibu deiwan juxun xea keyuabun janua xekiwan jukuanmaken ⁶jexe betsa mishki ewapabu mania anu mai eskadabes bemanchimea anu bana pexei benekaunaya mai eskadabesken badi jui kukin mai tsusinwan jawen tapun bemakis bewexekea xanai utsimiski. ⁷Ja inun, jexe betsa muxa jukundiana anu nidi ika jukuainki muxan buexekin yabua bimitidumaki. ⁸Jakia jexe betsa mai pepa anu nidi aka benei bimi ichapajaida jayamiski, betsa 100 jexeyaidan— iwanan, unanxubima yuikin:

—Man pabinkiyabuki. Ninkatan jakimayamaxankanwen— jatu wabainaya

Jexe miyuikidi xabakabi Jesúsun jatu unanmanikiaki, na janchadan
(Mt 13.10-23; Mr 4.10-20)

⁹jawen tsumabu besti Jesúsuki dasixun jaska miyuiwen jatu yusinxu yukabu ¹⁰jatu yuikin:

—Matudan, jaskai Dios xanen ibumiskidi Diosun jawen pepa juneni xabakabi man en tsumabu matu yusinkin unanmaikiki. Jakia jabun Diosun jancha ninka bestiaibu miyuiwens besti en jatuki chanikunkainaii, uinbiakin jau uin pewayamanunbun inun ninkabiakin jau ninka pewayamanunbunan— iwanan,

¹¹—Man en tsumabudan, jexe sa akakidi miyui matu xabakabi yuinun ninkaidakanwen. Jexedan, Dioskidi yusinti janchaki. ¹²Jexe betsa janu kati bai anu kauanadan, yudabun Diosun jancha ninkabiaibun jamakidia diablo Satanás juxun jawen jancha pepa jawen juntiki banai mebinmiski, jau ikonwain mekeyamaxanunan. ¹³Ja inun, jexe betsa mishki ewapabu mania anu mai eskadabes bemanchimea anu nidi akadan, tsuanda Diosun jancha ninkakin taewai benimabiaya shinan pewamawen taexun jawen jiwepanan Diosun jancha dananmakin jatu bika wakin jawen jamapaiwen jatu ichakawabu tenei jawawen jaskatima ja uintan ana jawendi chintunbainmisbuki, jatun tacha ichapama keskawen taeadan. ¹⁴Ja inun, jexe betsa muxa anu nidi ikadan, jabun Diosun jancha bechipaibiai jatun jiweawen nui inun mabu betsa betsapawen kemu chakayamai jayakatsis ikin jatun jatu yabua Diosun jancha ninkabiai tapinkatsi ikama unanxubida jenekubainmisbuki, yudabu miban bimiuma keskabuidan. ¹⁵Jakia jexe betsa mai pepa anu banadan, Diosun jancha pepa tapintan

juinti shinan chankankin jeneama mestentan chibankubainkin januxun yuda betsabu yusinkin jatu ikunwanmamisbuki, mai pepa anu jexe sa aka ewai benei pamis keskaidan— jatu watan

Binkidi miyuiwen Jesúsun jatu yusinikiaki, na janchadan
(*Mr 4.21-25*)

¹⁶Janua yudan kaian anu ana kaxun Jesúsun miyui betsawen ana jatu yusinkin:

—Bin dekutan jamapaiwen bepukin junetima inun tapu naman tsauntima man unaiin. Jakia bin dekuxun jau jawenabu jikikin uinshadanunbun manaundi tsaunmisbuki. ¹⁷Jaskaken jawada en matu yusinkubainai yuda betsabu jatu yusinkin juneyamakubainxankanwen. Jaska inun, jawada junekin man jatu yusianma inun jawada june ibubis man ikaidan, dasibi Diosun jatu xabakabi waxunkin keyuxanikiki.

¹⁸Jaskawen taexunan, ninka peidawakanwen. Jakia tsuabunda en jancha bestininkakin chibainbu ichapa en ana jatu xabakabi yusinkubainxanaii. Jamen tsuabunda ea chiban kayabismabia: “En ikunwaiin”, ikin jaska bestinshinanmis ja eskadabes en jatu mebinxanaii, jakimawakinan— jatu wai

Jawenabu kayabikidi Jesúsun jatu yusinikiaki, na janchadan
(*Mt 12.46-50; Mr 3.31-35*)

¹⁹Jesúsun jatu yusinkin menediamaken yudan kaian texke ikabuwen taea jawen ewa inun jawen betsabu bea Jesúski jaska kematima ²⁰juni betsa yunua yuia akeakebainabu atimas jawen ewa juni betsan Jesús yuixunkin:

—Min ewa inun min betsabun unu jemaintinxun mibe janchanun ixun mia kenakanikiaki— akaya

²¹jatu yusinkin Jesúsun yuikin:

—Diosun jancha ninkakin akubainmisbudan, jabiabu enabu kayabiki, en ewabu inun, en piubu inun, en betsabudan— jatu wanikiaki.

Jesúsun niwe inun ianenwan nemanikiaki, na janchadan
(*Mt 8.23-27; Mr 4.35-41*)

²²Ana betsatian Jesúsun jawen tsumabu jatu yuikin:

—Ianenwan besusi pukei kexa betsaudi buyunankanwen— jatu wa jawen tsumabube xaxun inatan xutubaini buaibun ²³janua ianenwan besusi pukeaibun Jesús ma bika xaxu chixukidi daka uxaken janua niwe kushipajaida besubainaibukidia jene buspu tsaubidankin xaxu jene mata wa ma jiki kemaya ²⁴datei Jesús anus ichaxun bestenwankin yuikin:

—Yusinaan, yusinaan, nun jikiaii— akin bestenwanbu Jesús bestenkauan benitan niwewan inun ianenwan buspu tsaubidanai yuikin:

—Nesewe. Peswe— aka niwe main neseaya ianenwandi buspu tsaubidanai main pesaya ²⁵Jesúsun jawen tsumabu yuikin:

—¿Man jawawen datei ikai, ea shinanmadan?— jatu wa e iki keyutan yuinamekin yuikin:

—Jabaa! Na junidan, ¿jawa junimen? min atidumakidan. Niwe inun ianenwanendi ninkakanikikidan— ibaini bui

**Gerasa anu kaxun Jesúsun juni yushin chakabubu
jaya kainmanikiaki, na janchadan
(Mt 8.28-34; Mr 5.1-20)**

²⁶Galilea ianenwan kexa betsaudi Gerasa mai pakeanu Jesús kai atimas keti itan ²⁷⁻²⁹xaxu anua butui jatube mapekekainaya janua juni betsa yushin chakabuya unainsmapa tadiuma jiwetan jiweisma janua mawabu maiwamisbu anu bestu jiwekunkainmis natian jawenabun mane dispiwen nexabiakubainmisbu yushin chakabun kushipa wa mane dispi nasamis jabun unainsmapa watan janua jiweabumanu iyumis Jesús juai bechibidani kushikidan unantan bis ikidan Jesús naman danti iken ja juni anua yushin chakabu Jesúsun yunukin taewa janua jancha kushipawen yushinen juni unainsmapa yuimakin:

—Jesúsuun, min Dios kushipajaidatun bakedan, en mia unaiin. En mia yukai nukudan, kupikin nuku nuitapawayamawe!— aka ³⁰Jesúsun yukakin:

—¿Jadakidi min kena ikai?— aka yushin chakabu ichapa ma juniki jikinibuwen taexun yushinen juni janchama Jesús yuikin:

—En kenadan, “Ichapajaida En Jayaki”, en yushin midimayadan— akaya ³¹janu kupiti mai kini uke medanjaida anu Jesúsun jau jatu yunuyamanun yushin chakabun Jesús nematan ³²ja mati anuxun ina yawa ichapabun pikin mai mixexaibu yushin chakabun bechitan Jesús ea akin yuikin:

—Ja ina yawa anu nuku yunuwe, ja medan nun jikinunan— akabu janua Jesúsun jadi jatu yunua ³³ja juni anua kainbaini ina yawa medan jikibainaibun ja ina yawa midima datei mawa butei nidi ibaini ianki pukui dasibi jasai keyuaibun

³⁴janua ja ina yawa mekemisbu datei kushibainkin jaskaxu jatun mae anu jiweabu inun bai puchinin jiweabu jatu banabima akekeaubun ³⁵yudan kaianen uin beaibu janua Jesúski nukuxun ja juni: “Yushin chakabu ichapa en jayaki”, ixu ma tadi sawea ana unainsmapa keskama janua Jesúsbe tsaua ana jaska ikunkainshina keska dabanen ikin shinain dateaibun ³⁶jabun Jesúsun jaska wai uinbaina jatu yui kakaibun ³⁷janu Gerasa anuabu datekin Jesús nichinkin:

—Nukun mae anu ana mapekeama kadiwe— akeakeabu janua Jesúsun jatun jancha ninkatan kai xaxun inai kaya ³⁸ja juni yushin chakabu kainmaxutun Jesús ea akin:

—En mibe kaii— aka nemakin yuikin:

³⁹—Ebe kayamawe. Jakia minabun jiwe anu kaxun jaska Dios miwen nuikin min yushin chakabubu mia kainmaxu minabu yuiditanwen, jau miwen benimadinunbunan— abaini kaya ja junin jaska Jesúsun yushin chakabu midimajaida kainmaxunbainshina jatu yuikubaunikiaki.

**Ainbun jimi baxneni neseisma Jesúsun mainwantan Jairon bakedi
bestenwanikiaki, na janchadan**

(Mt 9.18-26; Mr 5.21-43)

⁴⁰Janua Jesús ianenwan kexa betsaudia chintuntani ana jawendi jui keti ikaya yudan kaianen manajaidaibun Jesús juai bechitan jawen benimai ii jaki ichabu ⁴¹⁻⁴²ichati jiwe anuxun yunumis xanen ibu betsa Jairon Jesús bechitan jukidan ja bebun di iki beutan ea akin yuikin:

—En ainbu bake bestichaiyaki, 12 badiyadan. Ma eskatian ea isin tenexuni mawakatsis ikaya miki chani en juxuki. Ebe kaxun uinkin ea xuxawaxunyuwe— atushia janua jaska Jesúsun ninkatan jawen jiwe anu jabe kaya ja yudan kaian ichapabundi itimaska wai supu ibainaibun

⁴³janua ainbu jimi baxneni ja isin tenei ma 12 año kabia jawa neseisma badi betsa tukama ikunkainmisken janua nuitapaya juni dauyan mainwankin xuxawapaibiabu jawen pei dasibi putakin keyubia jawa maianma ikunkainkin yudan kaianbetan Jesús chibain ⁴⁴ja ichun kakin jawen tadi kexa metsaya jawaida jawen jimi bextekei maianyan

⁴⁵jaska jawen kushipawen tsuada xuxawa Jesúsun unankin yudan kaian jachun beaibu niti itan uinbaunkin jatu yukakin:

—¿Tsuán man en tadi metsaxumen?— jatu wa

—Tsuán mia metsamaki— akaibun Pedro inun Jesúsun tsuma betsabun yuikin:

—Yusinaan, na yudan kaian bei michun supu ibidankin mia aki ikanikiki. ¿Jaskakin nuku yukakin: “¿Tsuán man en tadi metsai?” min nuku wai ikai?— akabu ⁴⁶Jesúsun jatu yuikin:

—Tsuanda ea metsaya chanima en kushipa kainkainkin xuxawaxu en unaiin— ikaya

⁴⁷ainbu datei saki saki ikin jani junetima jawada Jesúsun axunxu unain jaki kematan ja bebun danti itan xabakabi ichapabun bedubi Jesúski chaniaya ⁴⁸Jesúsun yuikin:

—Ainbuun, min ea ikunwanyan en mia xuxawaxuki. Ana isin teneama unanuma kai pediwé—

⁴⁹aki niken jabiatandi xanen ibu Jairon jiwe anua jawen tsuma betsa juxun Jairo yuikin:

—Min bakedan, ma mawaxuki. Ana juni yusinan daketapa wayamawe— akai ⁵⁰Jesúsun jawen tsumapan Jairo jawada yuiái ninkatan Jairo yuikin:

—Dateyamawe. Ea besti min ea ikunwanyan min bake xuxaikiki— abaini

⁵¹bui Jairon jiwe anu jikikainkin ja mapuabu jau jikiyamanunbun jatu nemakin niti atan Pedro inun Santiago inun Juan inun chipashan ibu dabe jatu jikimakin ⁵²junin kaian kaxai sain iki bau bau ikaibu jatu yuikin:

—¿Jaskai e iskaun kaxai man biski ikanai? Jawen bakedan mawa kayabiamaki. Uxa bestia ikikiki— jatu waya

⁵³yuda ichapabun: “Ma mawaki”, iwanan, uintan Jesúsun jaska yuiai ninkatan usainbun ⁵⁴januxun Jesúsun chipash metsunxun unanxubima yuikin:

—Chipashaan, en mia yuiai beniwe— aka ⁵⁵ana bestein samama benikaunaya januxun jau pimanunbun Jesúsun jatu yunuaya ⁵⁶jawen ibu dabe benimai e ikaibun jaska Jesúsun axunxu jau tsua yuiyamayununbun jatu nemanikiaki.

**Jesúsun jawen tsumabun jau jatu yusintanunbun jatu
nichinikiaki, na janchadan
(Mt 10.5-15; Mr 6.7-13)**

9 ¹Januxun Jesúsun jawen 12 tsumabu kenaxun jatu ichawatan yushin chakabu betsa betsapa kainmati kushipa inun isin teneaiibu jawen xuxawati kushipa jatu inantan ²nichinkin yuikin:

—Jaska Dios xanen ibuxanaikidi yusinkubaunkin isin teneaiibu man xuxawatanun en matu yunuyuaii. ³Kaidan, man eskakanintanun matu yuinun ninkakanwen. Mais butankanwen, jawa buamadan. Mestenti betsa inun, kapankan inun, misi inun, pei matun chinexeketiki usua inun, sanpu betsa buyamaxankanwen. ⁴Jaska inun, mae tibi anu buxun yusin jiwe bestichai anu jiweyuxankanwen. Januxun yusinkin menetan mae betsa anudi bukubainxankanwen. ⁵Jaska inun, janixunda matu danankin ninkakatsi ikabumaken Dios jatuki sinatai unanti wakin janua kainbainkin matun tae anua mai kudu jatuki tabainxankanwen, jau jabiaskasi maninunbunan, jawa unanmadan— jatu wa

⁶mae tibi anu buake buakexun jaska Dios xanen ibuxanaikidi jatu yusinkin isin teneaiibu xuxawakubainaibun

**¿Jesús tsuamen? ixun Herodesin unankatsis inikiaki, na janchadan
(Mt 14.1-12; Mr 6.14-29)**

⁷⁻⁸janu judiobun xanen ibu Herodesin Jesúsun jawada akeakeaikidi ninkaya betsabun yuikin:

—Juan tenanbiashinabu ma ana besteanmenkain— ikaibun betsabundi yuikin:

—Elías Diosun jancha yuixunika kabiani jawen yushin damimamenkain— idiaibun betsabundi yuikin:

—Nukun xenipabu Diosun jancha yuixunika betsa mawanidan, ma ana besteinmamenkain— ikeakeaibu Herodesin ninkaxun shinain: “¿Jadatu chanima kayabimen?” iwanan, ⁹yuikin:

—Juan jau textenunbun ean en jatu yunuimaki. Jaskaken ja Jesús kidi yuiaibudan, ¿tsuamen?— iwanan, Jesús uinun ixun manakubainikiaki.

Jesúsun 5,000 junibu pimanikiaki, na janchadan

(Mt 14.13-21; Mr 6.30-44; Jn 6.1-14)

¹⁰Janua jawen 12 kushipayabun Jesús anu chintunbidan jaska washinabu Jesús kidi chani meneabun Jesúsun jawen tsumabu janua tsua jiweabuma Betsaida dapi anu jatu iyuaya ¹¹yudan kaianen unantan Jesús chibainbu jawa jatuki sinatama jatu ikin pewaxun Dios xanen ibuxanaikidi yusinkin isin betsa betsapa teneaibu xuxawabaiaya

¹²ma badi kaya jawen 12 tsumabu jawen kushipayawen yununikabu Jesús dapi bea ichaxun yuikin:

—Ma badi kaikiki. Nenu tsua jiweabumaki. Na yudan kaianen jabun jania pitidubumaki. Jau pitan juindukundi bununbun mae udama anu jatu nichindiwe— akabu

¹³⁻¹⁵Jesúsun jatu nemakin yuikin:

—Jaska jatu wama, matun jatu pimaanwen— jatu wa 5,000 junibu mapuabuwen taea e itan Jesús yuikin:

—Meken besti misi inun baka dabe besti nun jayaki. ¿Nun daka jatu piti bixuin kai?— akabu Jesúsun jawen 12 tsumabu yuikin:

—Ja basiki 50 tibi xuku akeakea jau tsaununbun jatu yunukanwen— iwanan, Jesúsun jatu yunua jawen tsumabun jatu tsaumakin keyuken ¹⁶januxun Jesúsun ja misi meken besti inun baka dabe tsumaxun naiudi teskanxun uinkin pitikidi Dios kenwanta misi inun baka tunke tunke apakekin jawen tsumabu inankin jatu yunua ja yudan kaian inanbaunkin keyuabun ¹⁷dasibibun yaniwai benimai pepeabun janua ja misi meken besti inun baka dabe 5,000ti junibun pikin texe wabu ichawakin 12 kuki mata wanibukiaki.

Min nukun Mesíasiki, akin Pedron yuiniikiaki, na janchadan

(Mt 16.13-19; Mr 8.27-29)

¹⁸Janua betsatian janua tsua jayamanu Jesús jawen tsumabube ka Diosbe janchai metetan Jesúsun jawen tsumabu yukakin:

—Yudabunan, ¿en tsua ekidi yuimisbumen?— jatu wa ¹⁹jabun yuikin:

—Betsabun yuikin: “Nashimanika Juan ana besteshinaki”, mia wakanikiaki. Betsabundi yuikin: “Diosun jancha yuixunika Elías ana jushianki”, mia wadiakanikiaki. Betsabundi yuikin: “Diosun jancha yuixunika betsa ana besteinmaki”, mia wamisbukiaki— akabu

²⁰januxun Jesúsun jabudi yukakin:

—Jamen matun shinankinan, ¿en tsua man ea wamismen?— jatu wa Pedron yuikin:

—Miadan, Diosun yubani min nukun Mesías Cristoki— akaya

Jawen tsuma kushipayabu jawen mawaxanaikidi

Jesúsun yusinikiaki, na janchadan

(Mt 16.20-28; Mr 8.30-9.1)

²¹Januxun Jesúsun jatu nemakin:

—En Mesías Cristoki tsua banabimamayamayuxankanwen— iwanan,

²²ana jawen tsumabu jatu yusinkin yuikin:

—Diosun bake matun Juchi Kayabi Iyuanan, eki sinatakin ea ichakawakin nukun xanen ibubu inun Diosbe nukunabu janchaxunika xanen ibubu inun yusinananmisbun ea danankin ea jatu tenanmabu mawa xaba dabe inun besti kaya en ana bestenxanaí— jatu watan

²³Januxun yudan kaian jatu ichawaxun jatu yusinkin yuikin:

—Tsuabunda ea chibankatsis iki ibubis jawenakidi jaska shinanmis jau ana jaska shinanyamakubainunbunwen. Jaska inun, “Bika tenei Jesúswen jawa dakeama ja keskai en jabe mawatiduki”, jau ikubainunbunwen.

²⁴Jamen tsuabuda jatunmebi mekei: “En mawakatsi ikamaki”, ikin shinanmisbudan, eauma mawaxankanikiki. Jakia ea ikunwankin en kakape yuikin ea chibainwen taexun tenanbu ebe jiwekuinxankanikiki.

²⁵Ja inun, mabu midimawen kemukin ichawaxun ea ikunwankin chibanbuna jatunmebi jatun jiwekuian benuxankanikiki, eauma mawakinan. ²⁶Jaskaken tsuabuda eki inun en janchaki dakemisbudan, en Epan kushipaya jawen nai tsuma pepabube jua jabiaskadiai en jatuki dakediaxanaí— iwanan ²⁷—Chanima en matu yuiái ninkakanwen. Betsabu na jabia man mapuabudan, man mawadiamaken Dios kushipajaidai xanen ibui taeai man uinxanaí— jatu wanikiaki.

Jesús damitan jatu uinmanikiaki, na janchadan

(Mt 17.1-8; Mr 9.2-8)

²⁸Janua janchashina 8 día xaba kasmai jatida kaya Pedro inun Santiago inun Juan Jesúsun jatu iyui kai Diosbe janchanun ika kakin mati keyatapajaida jatube mapeketan ²⁹janua Jesús Diosbe janchaya ma besu betsai damia jawen tadi juxupajaidai chaxa chaxa ikaya ³⁰⁻³¹Elías inun Moisés jabiaskadiai ja dabedi chaxajaida punte punte iki mapuxun jaska Jerusalén anua Jesús mawaxanaí yui jabe janchaibu ³²Pedro inun Santiago inun Juan yuda datsupe ika uxakatsis íbia uxama Jesús inun ja dabe jabe mapuabu uiainbun ³³ja dabetan Jesús ma dapaxkabainaibun xabakabi shinanma Pedron Jesús yuikin:

—Yusinaan, nun nenu juadan, pejaidaki. ¿Pean xubu dabe inun besti matu waxunpa, betsa mina inun, betsa Moisésna inun betsadi

Elíasinadan?— ikaya ³⁴⁻³⁵janua nai kuin bekin jatu bepuaya dateaibun nai kuin anuxun jatu yuikin:

—Na en bake en Katunidan, ninkaidakubainkanwen— jatu waya ³⁶jakimamadi samama bedu bedu ikin Jesús besti nia uinibukiaki. Januxun jaska june uinbidanimaxun tsua yuyiyama iyukubainibukiaki.

Juni bake yushin chakabuya Jesúsun kainmanikiaki, na janchadan
(Mt 17.14-21; Mr 9.14-29)

³⁷Mati anua Jesús damia uintan jabanu niti ika jatube uxashini penaya butubidanaibun Jesúski dasitanun ika yudan kaian jaki nukui buaibun ³⁸januxun juni betsa jatu nashui ikaina nixun jui kushipawen unanxubima Jesús yuikin:

—Yusinaan, en juni bake bestichaiyaki. Ea uinxunwen. ³⁹Yushinin achixun bis bis imakin duxku imakin kemu bus bus imakin ichakawakin jeneismaki. ⁴⁰Jaskamisken: “Jau yushin chakabu ea kainmaxununbun ika”, min tsumabu en jatu shinanbiabidana tsuan jawa ea kainmaxuntidubumaki— ikaya

⁴¹Jesúsun mapuabu dasibi yuikin:

—Ikunwainsbuma inun chakabubuun, ¿jatiki matu medabewai ana en matube jiweyuxanai?— iwanan, ja juni yuikin: —Min bake uinun nedi iwewe— aka

⁴²uweaya yushin chakabun Jesús bechitan ja juni bake duxku imakin main tin imatan taka taka imaya Jesúsun uinkin yushin kunyan akin kainmaxuntan jawen epa yunuaya ⁴³Diosun pepa kushipawen Jesúsun jatu uinmakubainaiwen taea dasibi e iki Jabaa! ike ikeibun

Mawaxanaikidi Jesúsun ana jatu yuinikiaki, na janchadan
(Mt 17.22-23; Mr 9.30-32)

janua Jabaa! iki mapuabun jawen tsumabu besti Jesúsun yuikin:

⁴⁴—Eska en matu yuiyai ninkatan jakimayamaxankanwen. Ea en matun Juchi Kayabi Iyuadan, tsuanda ea jatu achimaxanikiki— jatu waya

⁴⁵jaska Jesúsun jatu yuixu jau ninkayamanunbun Diosun jatu nemaiwen taexun jawa ninkamajaida jawa yuiyai dabanen datekin Jesús jawa ana yukama inibukiaki.

Tsuanda jatu binuntidukidi Jesúsun jatu yusinikiaki, na janchadan
(Mt 18.1-5; Mr 9.33-37)

⁴⁶Janua Jesúsun tsumabu yuinamei: —Jesúsbe xanen ibukin ¿nukunan, jadatubun betsabu nun matu binunxanimenkain? ¿Eamenkain?— ibidankanxu ⁴⁷unantan jatu yusinun, iwanan, bakeishta betsa ixun ⁴⁸jatu yuikin:

—Ea duawanun, iwanan, na bakeishta keska wakin tsuada en kenaya juaidan, ikin ea akawakin man duawatiduki. Jabiasyadi wakin ea besti

duawama jaton ea yununi Diosdi jabun duawaxankanikiki. Jaskaken tsuada jawa shinanma keanma dasibibu medabewakin ja kenmisbu jatu binuxankanikiki— jatu waya

Tsuanda nuku dananma nukun jaibuki, anikiaki, na janchadan
(Mr 9.38-40)

⁴⁹Januxun Juanen Jesús yuikin:

—Yusinaan, juni betsan min kena kushipa paewen yushin chakabu kainmai nun uinbidanshinaki. Nukubetan mia chibanmaken nun nemakin bextepaibia nuku ninkama ishianki. Jaska wakin nun nemashinadan, ¿pemen?— aka

⁵⁰Jesúsun Juan yuikin:

—Nemakin man jatu bextetidumaki. Tsuada nukuki sinatamadan, nuku medabewaikiki— jatu wanikiaki.

Santiago inun Juan nemakin Jesúsun jatu kunyan anikiaki, na janchadan

⁵¹Janua jawen Epa anu Jesús kaxanai kemaya dateama Jerusalén anu kai taekin ⁵²janu uxati jiwe jau unanti watanunbun jawen jancha yuixunika bebunkidi jatu yunua bui Samarianawabun mae anu jikixun yukabu ⁵³Jerusalén anu Jesús kaiwen taea janu jau uxayamanunbun jatu danankanxu chanitushiaya ⁵⁴Santiago inun Juanen ninkaxun Jesús yuikin:

—Yusinaan, jaska Elíasin ani keska wakin ¿nai anua chi kauankin jau Diosun ja mae jatu yamawakin keyunun Dios yukapa?— ikaya

⁵⁵Jesús sinaxun jatu kunyan akin nemabaini ⁵⁶mae betsa anu uaxunun ika bunibukiaki.

Jesús chibanun, iwanan, yukanibukiaki, na janchadan
(Mt 8.19-22)

⁵⁷Ana Jerusalénkidi bui bai tanabainaibun juni betsan Jesús yuikin:

—Yusinaan, janida min kai en mia chibankatsis ikaii. ¿Mibe kapa?— aka

⁵⁸jawen juinti pepamenkain, unanun, iwanan, Jesúsun yuikin:

—Kaman inu jawen kini jayaki. Peiyabu jawen na jayabuki. Jakia matun Juchi Kayabi Iyua ean en yusinkubainmiswen taea janu uxati jiwe en jayamaki. ¿Ea keskai min jiwekunkaintidumen?— akin ⁵⁹juni betsadi Jesúsun yuikin:

—Tapinkin ea chibankubainwen— aka

—Xanen Ibuun, ea jeneyuwe, ja dukun en epa mawa maiwatan en mia chipu chibanxanaidan— aka

⁶⁰nemakin Jesúsun yuikin:

—Jaskamaki. Ikunwanma mawa keskabun min epa maiwatidubuki. Jakia mianan, na jabiatian ebe kai taekin Dios xanen ibuxanaikidi yusinkubainxanwen— akaya

⁶¹Januxun betsandi Jesús yuikin:

—Yusinaan, eandi en mia chibankatsi ¿ja dukun en jiweanua enabuki chaniyutanpa?— aka

⁶²nemakin Jesúsun yuikin:

—Tsuabunda ea chibanbiakin jawen shinan dabewen unudi shinain inun unudi uiainan, jaska Dios xanen ibuxanai pe dayaxuntidubumaki— anikiaki.

Jesúsun 72 junibu yununikiaki, na janchadan

10 ¹Januxun mae tibi anu janu Jesús chipu kaxanai anu jau bebunkidi yusintanunbun 72 juni jaki chiti ikabu katuxun juni dabe tibi jatu yunua akeakekin ²jatu yuikin:

—En tsumabun en jancha ikunwankin chibanmisbun jatu yusian akeakebaunaibun ichapabun ea ikunwanxankanikiki. Jaskaken chanima Diosun bai anu miban midima ma jushin keyui keska dakaki. Jakia jawen dayakapabu eskadabeswen taexun ana dayakapabu ichapa jau yununun bai ibu Dios ana yukakanwen, jawen yunu tsekakin ichawaxunai keska wakin yudabu jau jawen jancha jatu yusinbaununbunan. ³Eanan, kaman inu pubenbu anu chaxuwan bake yunua keska wakin man en tsuma pepabu matuki sinataxanaibu anu en matu yunuai yusinditankanwen. ⁴Man jaskabaintanunbun matu yusinun ninkakanwen. Mais butankanwen. Jaki mabu aduti kapankan buama jaki pei aduti matun chinexeketiki usua nuxatiya buama inun matun bichi tae betsa buyamakanwen. Jaska inun, bai tanabaini tsukida nukutan jabe janchai niti ikama dainbainxankanwen. ⁵Ja inun, mae anu jikitan tsuanuda jiweyukatsi iki jatun jiwe anu jikitan jatu yuikin: “Diosun jau matu unanuma jiwemakubainunwen”, jatu axankanwen. ⁶Man jaska wa yuda duapa janu jiweabu matun janchawen benimaxankanikiki. Jakia yuda duapa janu jiweama matun jancha danainbun matun duapa jancha ana jatu mebinbainxankanwen. ⁷Ja inun, jani mae anuxunda matu beya waibu anu janu jiweyuxankanwen. Dayakapabu pakamisbu keska wakin matu pimakin mabex amakin jawada matu inanbu jabanuxundi piyuxankanwen, jiwe betsa tibi anua piti benabaunamadan. ⁸Janida mae anu man jikia matu beya waibu anuxun jawada piti matu inanbu piyuxankanwen, dananmadan. ⁹Ja inun, jabanu jiweabu isin teneaibu xuxawakin jatu yusinkin: “Dios xanen ibui nenu ma kemaikiki”, akin jatu yuikubaunxankanwen. ¹⁰Jakia janida mae anu jikitan man jatu yusian danainbu jatun bai namakixun yuikin: ¹¹“Dios matuki sinatai man unanun matun jemaintin anua matun mai mishpudi buama nun jutakai

jushukidi ikainaii. Jakia matu duawayui Dios xanen ibui ma kemabiaya jawen jancha man danain uindaxankanwen”, akin jatu yuixankanwen. ¹²Jamen betsadan, janu Diosun yudabu dasibi jatu kupiaitian jaska Sodoma chiwen Diosun jatu kupikin jaska wani binumakin jabun matu dananibu Diosun jatu kupijaidaxanikiki— jatu watan

**Mae betsa betsapa anuxun Jesús ninkabumaken jatu
ja anikiaki, na janchadan**
(Mt 11.20-24)

¹³jatidi betsabu mapuabu ana jatu yuikin:

—Corazín inun Betsaida anu man jiweabu matun chakabu jenetan man shinan betsa wakatsi ikamadan, man nuitapajaidaxankanaii. Jakia Corazín inun Betsaida anuxun jawen unanti dami kushipa betsa betsapa en matu uinmakubainima keska Tiro inun Sidón anu jiweabundi jabiaskadi uintan jatun chakabu jenenun, iwanan, juinti nishmajaidatan saku wati tadi bexa xeni sawetan chi mapuwen mapu tukutan jatun shinan betsa watan Dios ikunwankeanibuki. ¹⁴Jaskawen taexun janu kupiaitian ja nawabu Tiro inun Sidón anu jiweabu jatu kupi midinkin Corazín inun Betsaida anu man jiweabudi shinan betsa wabuma Diosun jatu kupijaidaxanikiki. ¹⁵Ja inun, Cafarnaúm anu jiweabun man shinankin: “Nun pepabuwen taexun Diosun nuku kenwanxanikiki”, ibiakin man ea ikunwanbumawen taexun janu chi nukaisma anu Diosun matu yunuxanikiki— iwanan,

¹⁶jabun chibainbu betsabu yuikin:

—Tsuabuda en jancha man jatu yusianyan matu ninkakin eadi ninkaxankanikiki. Jamen tsuabunda matun jancha danankin enadi danandixankanikiki. Ja inun, ea danankin jatun ea yununidi danandixankanikiki— jatu watan nichian bunibukiaki.

Ja 72 junibu jaki chiti ikabu chintunbidanibukiaki, na janchadan

¹⁷Jesúsun jatu yunuima yusinkin jatu xuxawakubauntani shinan chankanyanbi benimajaidakubidani jikibidanbidani ja 72 junibu Jesús anu ichai keyutan yuikin:

—Yusinaan, isin teneaidu xuxawakin min kushipawen inun min kenawen taexun yushin chakabundi nun yunua ninkatan kaindiakubainshinabuki. Jaska watani jui nun benimajaidakunkidanaii— akeakeabu ¹⁸Jesúsun jatu yuikin:

—Yushin chakabubu man jatu kainmakubaunaibun Satanás kushipabiaken Diosun jawen kushipa mebian nai anua kana bakai mai anu tin ikai keskai Satanás babutan kauanai en uinshinaki. ¹⁹Ninkakanwen. En kushipa en matu inankin yunuimaki, jau tsuan matu meyamakubainxanunbunan. Dunuki man paia matu pia jawa

man isin tenetidumaki. Ja inun, nibuki man paia matu pia jawa man isin tenetidumadiki. Ja inun, Satanásan binukin matu jawa maematidumaki. ²⁰Jaska man washina peki. Jaskabia yushin man kainmashinawen besti benimayamakanwen. Jakia nai anu Diosbe man jiwexanaibu Diosun matun kena tibi ma keneniwen taea jaska bestiwen benimakubainkanwen— jatu waya

Jesús benimakin jawen Epa kenwanikiaki, na janchadan
(Mt 11.25-27; 13.16-17)

²¹Januxun Diosun Yushin Papatun Jesús benimawakin shinan chankanwan Jesúsun kenwankin yuikin:

—Epaan, nai inun mai jidabi minaski. Min duapa jancha ja unanepai kenmisbu min jatu unanmama jabu keinsbuma besti min jatu unanmakubainaiwen taexun en mia kenwaiin— atan

²²mapubaunabu yuikin:

—En Epan jawen kushipa dasibi ea yununidan, tsuan en jawen bake ea unanbumaki. Jakia en Epan besti ea unan keyuikiki. Jakia tsuan en Epa unanmadiki. Ea jawen baken besti en Epa en unan keyudiaii. Jakia jabun ea chibainbu en Epa en jatu unanmamiski— iwanan,

²³⁻²⁴jawen tsumabukidi dabekeexun jatu besti yuikin:

—Matu yuinun ninkakanwen. Ea en matun medabenan man uiainan, nukun xenipabu Diosun jancha yuixunikabu inun xanen ibubun uinpaibiakin ea uianma inibuki. Ja inun, na man ea uiainan, uinkatsi ibiakin ea uianma inibuki. Ja inun, jabias man ninkaidan, ninkapaibiakin ea ninkamadi inibuki. Jaskaken jabias man uiainan, tsuabunda uindiai benimakanikiki— jatu waya

En jabube jiweadan, ¿tsuabumen? ikai miyuiwen
samaritanokidi Jesúsun yusinikiaki, na janchadan

²⁵mapuxun ninkaibun Moisin kenei yusinananmistun Jesús unanti wanun ika benikauan yukakin:

—Yusinaan, jiwea kayabi bikatsi ikin Dios benimawakin ¿jaska waxanpa?— aka

²⁶Jesúsundi yukakin:

—Moisin kenenidan uinkin ¿jawa min yuimismen?— aka

²⁷yusinmistun Jesús yuikin:

—Eska nuku kenexuniki: “Matun shinan jidabiwen inun, matun kushipa jidabiwen inun, matun yuda jidabiwen matun Xanen Ibu Dios duawakubainkanwen. Ja inun, min jabube jiweabu duawadiakubainkanwen, ibubis man nui mekemis keskaidan”, nuku waniki— aka

²⁸Jesúsun yuikin:

—Min pe yuiaii. Jaska min yuiaii keska akubaini Dios anu min jiwea kayabi ixanaii— aka

²⁹ibubis penun ixun Jesús yukakin:

—En jabube jiweadan, ¿tsuabumen?— aka

³⁰unanmakin miyuiwen Jesúsun yuikin:

—Jerusalén anua juni betsa kai Jericó bai tanabainai juni yumetsubun jawen mabu binun, iwanan, kusha kusha axun dasibi jawen mabu biantan jenebainabun shinanea dakaken ³¹janua Diosbe nukunabu janchaxunika betsa jawa shinanma jui jabias bai tanabidankin juni kushabainabu daka bechitan jawen nui jaki kemakatsi ikama benantaxun besti uintan dunkebainken ³²janua Dios kenwanti jiwe anuxun jatu medabewai dayamis Levín baba betsa jabias baiwendi jukin bechitan jawen nuimadi dunkediabainken ³³ja Samarianawabube danananain man dakekenanmis betsa jabias baiwen jukin matunabu betsa kushabainabu daka bechitushitan jawen dabanan iki niti itan ³⁴ja juni detebainabu jawen nui jaki kematn jawen dete piti xeniwen inun vinowen dapuxxun neatan jawen burroki katsauntan janu chaikea bei uxamisbu anu iyuxun duawakin mekeshini ³⁵penaya kakn jawen pei aduti saku anua pei ewapa dabe bixun jiwe ibu inankin yuikin: “En ma kai na juni ea duawaxunkubainxanwen. Na pei keyuken ana kauankin jawen texe ana en mia pakayuxanaii”, abainimaki— iwanan, ³⁶Diosun jancha kenenibu yusinananmis Jesúsun yukakin: —Ja juni dabe inun bestidan, ¿ja juni kushabainabu jadata jawen nuikin jabube jiwea keskakin duawaimamen? Min shinanan, ea yuiwe— aka

³⁷yusinmistun Jesús yuikin:

—Ja juni jawen nuimaki— aka januxun Jesúsun yuikin:

—Miadi jabiaskadi ikunkainwen— abaini

Marta inun Marían jiwe anu Jesús bai ka jikinikiaki, na janchadan

³⁸janua ana jawen tsumabube kakunkaini mae betsa anu Jesús jikiaya ainbu betsa Martan jawen jiwe anu iwana ³⁹januxun jawenabu yusianyan jawen betsa María Jesúsun tae dapi tsauxun ninkaya ⁴⁰Martan piti ichapa bawai ja mesti bikakin jaskawen dabanán Jesús yuikin:

—Xanen Ibuun, mia pimanun ika en mesti bawai en daya chakayamaya en betsan ea medabewamaki. Jaskaken ewen nuikin ea yunuxunwen, jau ea medabewanunan— aka

⁴¹Jesúsun Marta nemakin yuikin:

—Martaan, Martaan, dayakin piti nuku bawaxunkin min jiwe nuku pewaxuni pebiai min juinti ma sinaki. ⁴²Ea duawaidan, jaskatimaki. Jakia Marían en yusian ninkakin ea duawai tsuan nematidumaki— anikiaki.

Jaskai Diosbe janchatikidi Jesúsun yusinikiaki, na janchadan
(Mt 6.9-15; 7.7-11)

11 ¹Ana betsatian Jesús ka Diosbe janchai meneaya jawen tsuma betsan ea akin yukakin:

—Xanen Ibuun, jaska Juanen jaki chiti ikabu yusinma keska wakin Diosbe janchai jadakidi itimenkain nuku yusinwen— aka

²Jesúsun jatu yuikin:

—Diosbe janchakin yuikinan eska watiki:

‘Epaan, min kena medibidan, mia duawakin jau mia kenwankubainunbunwen.

Nai anua xanen ibukin min yunua jaska chibanmisbu keska wakin nenuxundi nun mia chibankatsis ikaibu min shinan besti nuku chibanmakin nuku medabewakubainwen.

³Ja inun, nuku mekekin na jabiatian jaska min nuku axuain nun piyunun piti nuku inankubainwen.

⁴Ja inun, tsuabunda nuku chakabuwaibu jatu jakimawakin jatun chakabu nun ana jaska shinanmawen taexun nun mia chakabuwai buaxuntan ana jaskakidi nuku shinanmayamawe.

Ja inun, nun kaneyamanunbun

jawada nun jawen kemumis kainyain nuku nemaxunkubainwen’, atiki— iwanan,

⁵⁻⁶miyuiwen ana jatu xabakabi yusinkin:

—Matubudan, man jaibu tibiyaki. Yamenapun min jaibun jiwe anu kaxun kenakin: “Xexei, xexei, ¿min uxamen?” min wa “¿Jawamen?” ikaya “Nukun jaibu eki bai juxu en jawa pimatimaki. Misi dabe inun besti ea inanyuwe”, min wa ⁷jawen jiwe medanxun mia nemakin yuikin: “Ma en bakebube inakin beputi en bexeaki. Jaska butukain en mia inantimaki. Ea chikish wama kadiwe”, mia wabia ⁸min jawen jaibuwen taea chikishkin mia inankatsi ikama ibiaya ninkamas daketapa wakin min yuka jeneamawen taexun butuxun jawada min bikatsis ikai mia inantiduki.

⁹⁻¹⁰Jaska wakin tsuanda Dios yukakin ea akadan, jawen jawada inanmiski. Tsuanda jawada benakin Dios yukadan, jaki nukumamiski. Tsuanda jawada bi jikinun ixun Dios kenadan, bepenxunmiski. Jawada min yuka mia axuntiduki. Benakin jawada min yuka mia bechimaxanikiki.

¹¹Ja inun, betsadan, min baken baka mia ea aka jaki dakekin dunu man inainsmaki. ¹²Ja inun, takada bachi mia ea aka jaki dakekin nibu man inainsmadiki. ¹³Jaskaken man pepamabia matun bakebu man duawamis man unaiin. Jamen jaska binumakin Epa Dios nai anuatun

man tsuabunda yukai ninkatan jawen Yushin Pepa matu inanmiski— jatu wanikiaki.

Jesús Satanásan kushipa besti jayaki, akin yuanibukiaki, na janchadan
(Mt 12.22-30; Mr 3.20-27)

¹⁴Ana betsatian yushin chakabun juni betsa juyu wayama Jesúsun nichian kainkainaya juni ana janchai taeyaya yudan kaianen uin yuinamei: “Jabaa! Nadan, juni kushipa pejaidaki”, ikaibun ¹⁵jakia jatiditun yuikin:

—Na junidan, yushin chakabu xanen ibu Beelzebún kushipa jayaki. Jaska bestiwen taexun yushin chakabu jatu kainmaikiki— ikaibun

¹⁶betsabun Jesús unanti wanun, ixun Jesús yuikin:

—Dios anua jawen unanti dami nuku axunwen, min jawen kushipa jaya nun uinunan— akabu ¹⁷jatun shinanen kaneaibu unankin Jesúsun jatu yuikin:

—Mae betsa anu jatunmebi paxkatan detenamei jatunmebi debui keyumisbuki. Ja inun, jabias yudabu paxkai jatunmebi jenenamei yamai keyudiatidubuki. ¹⁸Jabiaskadi wakin Satanásan jawenabu yudabu anua kainma jawen yuda punu nukai babui keyukeanaii. Ja inun, Beelzebún kushipa en jaya jawenabu en kainmama ikeanaii. ¹⁹Jamen eanan, Beelzebún kushipawen en yushin chakabu kainmaya matun tsumabunan, ¿tsuan kushipawen yushin chakabu kainmakanimenkain? Jaskaken man kanejaidai jabun matu chitekin ja axanikiki. ²⁰Jamen chanima Diosun kushipawen ean en yushin chakabu kainmamiswen taea Dios matuki bai ma juaki. ²¹Jaskakin man kanejaidai matu yuinun ninkakanwen. Juni kushipa jawen pia inun jawen kushatiyatun jawen mae pe mekeaya tsua jikikain yumetsutidumaki. ²²Jakia juni betsa ja binuan juxun maemakin jawen yuda junekin mekemis inun jawen pia inun jawen kushati mebixun jawen jamapai ibu watan jawen jaibuaibu inanbaunmiski. Eanan, Beelzebú binukin jawen kushipa jatuwen dayai mebintan ena en watiduki. ²³En jaskaken tsuanda ea jaibuwama ea nemaikiki. Ja inun, tsuanda juni betsabu ea chibanmama jatu eki dakemamisbuki— iwanan,

Yushin chakabu kainkaina chintunmiskidi Jesúsun
jatu yusinikiaki, na janchadan
(Mt 12.43-45)

²⁴miyui betsawen jatu yuikin:

—Juni betsa anua yushin chakabu kainma kai juindukunkatsi iki janu unpax jayama anu kakunkaunkin janu juindukunti pepa bechiama shinankin: ²⁵“En janu jiwea en kainkidanshina anu en ana chintunkainaii”, ikaini kaxun ja yuda medan jiwe xaka matsua keska jawa jayama bechitan ²⁶kaxun ana 7 yushin betsa chakabujaida jatube

dasikidan, ja dukuntun ja yuda ichakawakin midinwaima ana binumakin pikujaidamisbuki— ikin

**Jesúsun jancha ninkai benimati kayabi jaya
jatu yuinikiaki, na janchadan**

²⁷Jesúsun jatu yuikin menediama yudan kaian nashui ixun jancha kushipawen ainbun yuikin:

—Min ewa mia kainxun mia chuchu amaniwen taea

benimajaidaikiki— aka ²⁸Jesúsun ainbu yuikin:

—Chanima jabiaskaki. Jakia tsuabunda Diosun jancha ninkakin chibanmisbun en ewa binui ana benimajaidakanikiki— jatu waya

**Jawen dami wati kushipa yukamisbu Jesúsun
jatu yusinikiaki, na janchadan
(Mt 12.38-42; Mr 8.12)**

²⁹Janua ana jaki yudan kaian ichabidanbidani mapubaunaibun Jesúsun jatu yuikin:

—Nukunabu na jabiastian man jiweabudan, man chakabuki. Jamapai Dios anua unanti tsuan atiduma uinkatsi man ea yukabiamisdan, Diosun Jonás bakawan xeamashina ana kainma jiwenidan, jaska keska besti Diosun matu uinmakin matu axundiaxanikiki. Shinankanwen.

³⁰Nínive maewan anu kaxun jau jatu yusintanun Diosun Jonás yunua ninkama mae betsa anu paxai xaxuwen kai ianenwan medan jasa bakawan ewapatun xea xaba dabe inun besti ka janan Jonás ana besteanwen taexun Nínive anuabun unankin jatun shinan betsa watan Dios kenwanibukiaki. Jamen eadan, matun Juchi Kayabi Iyua mawa en jabiaskadiaya bestibu man ea ikunwanxanaii. ³¹Jaska inun, betsadan, nawa ainbu xanen ibu surkidi chaijaida Sabá maiwan anu jiwea nukun xenipabu Salomónen jancha unanepa ninkatanun ika juniki. Salomón en binujaidabiaken man ea ninkakatsi ikabumawen taexun janu matu kupiaitian ja nawa ainbu xanen ibun matu ja achakayamaxanikiki.

³²Ja inun, Nínive anuabu Jonásin Dioskidi jatu yusian ninkakin jatun shinan betsa watan Dios ikunwanibuki. Jamen eanan, en Jonás binujaidabiaken tsuan man ea ninkakin matun shinan man betsa wakatsi ikamawen taexun janu kupiaitian Nínive anu jiwenibundi matu ja adiaxankanikiki— iwanan,

**Binkidi miyuiwen Jesúsun jatu yusinikiaki, na janchadan
(Mt 5.15; 6.22-23)**

³³ana jatu yusinkin:

—Bin dekuxun june anu tsauinsbuma inun ji bauwen achimaisbumaki.

Jakia jikikin jau uinunbun dekuxun manaundi tsaunmisbuki. ³⁴Jaska keskadi

matun yuda anudan, matun bedudan, bin chaxa keskaki. Jaskakidi matu yusinun ninkakanwen. Matun beduwen man uinmiski. Matun shinanwen matun yuda pepa jaya kemuama man xabakabi meke pewaki. ³⁵Jakia man bin jayadan, man meshu medan jiwea keskatidubumaki. Uindakubainkanwen. ³⁶Jamen tsuabuda Diosun mekea bin chaxa keskawen chakabuuma man pe besti shinanxanii, kaneamadan— jatu watan

**Fariseo inun Diosun jancha yusinananmisbu Jesúsun
chitenikiaki, na janchadan**

(Mt 23.1-36; Mr 12.38-40; Lc 20.45-47)

³⁷Janua Jesús janchai meneaya fariseo betsan pimakatsi jawen jiwe anu iyua Jesús jikikain tapu dapi tsauxun piaya ³⁸fariseon uin metsayamas katan yuikin:

—Nukun xenipabun beya chibankin ¿pidiama min mepanuamamen?— aka ³⁹Jesúsun yuikin:

—Fariseobun man shinanmiskidi mia yuinun ninkawe. Matun beya chibankin matun kenchu tibi bemakis besti dachukin man napan pewamisbuki. Jakia yumetsukin jamapai chakabuwatan uke medanua matun shinan man pewaisbumaki. ⁴⁰Man unainsmapabuki. Bemakia jawada man uintidu chukakin man pewabiamis matun juinti uke medan chakabubiaken man unainsmaki. Matun meken man uintidu inun jawada uke medan man jaya jabias Diosun damiwaniki. Shinaindakanwen. ⁴¹Ja inun, ja dukun matun shinan pewatan Dios duawakatsi ikin yaushiaman naitapaibu inankuin man pepakunkainxanii.

⁴²Fariseobuun, man peidawa! Matunan, man kanekubainmisbuki. Matun piti nis wati ichawaxun maspu meken dabeti waxun bestichai Dios kenwanti jiwe anu dayanikabu medabewakin man jatu inankuinmiski. Jaska pewabiai jaska Diosun jancha Moisin yusini man shinanma jawada jawen pepawati inun jawen nuiti inun jawen jancha betsa watima yunubianiken matubu jawen jiwekin man jatu uinmaismaki, kanekinan.

⁴³Fariseobuun, matudan, matun ichati jiwe anu jikikain jaki tsauti pepa janu dasibibun matu uintidubu anu man tsaukatsis imisbuki. Ja inun, bai tanai nia jau ea duawanunbun, ika kemutapa man nimiski. Man jaskaya Dios matuki sinatamis man naitapai.

⁴⁴Matudan, man bepadamemisbuki. Matunabu yusin chakakin jatu padankin man jatu kanemakubainmisbuki, tsuada mawa nitimabiaken maiwanibu unanma jamamaki jaki paia keskakinan— akaya

⁴⁵jawen janchaki sinatakin Moisin kenei yusinananmis betsan Jesús yuikin:

—Jabaa! Yusinaan, jaska yuikin nukudi min nuku chiteaii— aka

⁴⁶Jesúsun yuikin:

—Moisin jancha yusinananmisbuun, matudan, fariseobu keskai matudi man peidawa! Xankamajaida matunabu iama keska wakin yusian tsuan

chibantidubuma man jatu yusinbiakin jaska man jatu yusinmis ibubis chibanma janua man jatu medabewaismadiki.

⁴⁷⁻⁴⁸Matudan, man dakeisbumaki. Matun xenipabun Diosun jancha yuixunikabun yusiainbu danankin jatu tenanxun maiwanibu jaska besti shinankin matun xenipabun ani medabewakin matundi jabias jawen shinanti jiwe jawendua besti man wamisbuki. ⁴⁹Jaskawen taexun Dios unanepatun yuikin: ‘Ea jatu yuixunikabu inun en tsuma kushipayabun jau jatu yusinunbun en jatu yunupakea jatu danankin betsabu tenankin betsabu ichakawakin jatu nichinxankanikiki’, iniki. ⁵⁰⁻⁵¹Matun xenipabun jatu dananpauni keska shinankin Diosun jancha yuixunikabu man danandiamisbuki, na jabiatianan. Jabias shinanwen Diosun matu manakudixanikiki. Jaskawen taexun mai damiwakin taewani anua jatun Adánen bake Abel tenani inun Dios kenwanti chi tapu inun jawen kenwanti Templo namakixsun Diosun jancha yuixunika Zacarías detenibu inun dasibibun Diosun jancha yuixunika betsa tibi matun xenipabun tenanpaunibuwen taea ja shinanwen Dios jakimamawen taexun na jabiatian jiweabube man keainbu Diosun matu kupijaidaxanikiki.

⁵²—Diosun jancha kenenibu yusinananmisbuun, man peidawa! Diosun jancha jawen jiweti unanbiai ninka pewama tsuabuda Dios xanen ibuai anu jikikatsi ikaibu man jatu nemamiski. Matudi man jikitidumabia jabu betsabu jikipananbun man jatu nemakubainai— jatu waya

⁵³⁻⁵⁴yusinananmisbu inun fariseobun jawen jancha ninkai Jesúski sinatakin ibubis kanemanun iwanan, padanpaikin jawen yusiankidi jaikaimas jamapai yukanibukiaki.

Jawada junea imisbu xabakabi unanxanaibukidi

Jesúsun jatu yusinikiaki, na janchadan

12 ¹Januxun Jesús jaska waibun ana midimajaida jaki ichabu jani ni pexun ninkatidubumabia ninkaibun Jesúsun jaki chiti ikabus dukun yusin taewakin yuikin:

—Fariseobu yusinanain bepadamemisbu misi xaxa wati keskabuki. Jatun yusian matuki jikitan matu kanematiduki. Jatun yusian uindakanwen.

²Jawada jabun june akubainmisbudan, ana juneama xabakabi dasibibun unanxankanikiki. ³Januxun jawada dasibibun yui meshu medan nua keska junea janchamisbu xaba keska anuxun ana juneama xabakabi ninkaxankanikiki. Ja inun, dintu medan jikitan beputi beputan jamapai junexun yuimisbu jemaintin anua jancha kushipawen chaniai keska ninkaxankanikiki— iwanan,

Jaki besti mesei datetikidi Jesúsun jatu yusinikiaki, na janchadan

(Mt 10.28-31)

⁴ana betsa jaki chiti ikabu yuikin:

—En jaibuaibuun, ana matu yuinun ninkakanwen. Tsuabunda matun yuda besti tenantidubuwen dateyamakanwen, tenanxun

matu ana ichakawapaketidubumakidan. ⁵Jakia jaki besti mesei man datekubainunbun matu yuinun ninkakanwen. Tsuanda matun jiwea tenants chi nukaismanu jawen kushipawen matu yunutidu bestiki mesei datekubainkanwen, Dioskidan. Chanima en matu yuiaidan, ja bestiki datei mesekubainkanwen.

⁶Jaska inun, isa mishtin meken besti bikin pei jexe pishta dabeswen bitidubuki, kadumadan. Jabiaskabiaken isa tibi tanai Dios jakimaismaki. ⁷Jamen matun bu dasibi midimabiaken Diosun ma tana keyumistun isa mishtin ichapa bechipaibiakin Diosun isa mishtin binumakin matu bechipajaidamiski. Jaskaken jawaki dateyamakubainkanwen— iwanan,

**Jabun Jesús chanima ikunwain jaki dakeisbuma unanti waxanaibukidi
jatu yusinikiaki, na janchadan**
(Mt 10.32-33; 12.32; 10.19-20)

⁸ ana jatu yusinkin:

—Tsuabunda ea ikunwain dakeama ea datan akin yudabu jatu yuikin: “En Jesúsunaki”, ikubainmisbu eandi Diosun nai tsumabu bebun nixun mekekin: “Nadan, enabuki”, akin en jatu yuixunxanaii. ⁹Jakia tsuabunda ea chibanma en janchaki dakei: “En Jesús ikunwanmaki”, eki ikubainmisbudan, eadi Diosun nai tsumabu bebunxun: “Nadan, enabumaki”, akin en jatu janchaxunamadi ixanaii.

¹⁰Jamen tsuabunda en matun Juchi Kayabi Iyua ea yuanbiaibun Diosun jatun chakabu buaxuntiduki. Jamen betsadan, tsuabunda Diosun Yushin Pepa yuainbu jatun chakabu Diosun buaismaki.

¹¹Jaska inun, matuki sinatakin jau matu kupinunbun jatun ichati jiwe anu kasmai xanen ibu betsa anu kasmai matu iyuxun jatun xanen ibubu anu matu nichianbu: “¿Jadakidi yuixanpa?” iki dateyamaxankanwen. ¹²Matu jaska waibu jabiatian matu janchamakin Diosun Yushin Papatun matu unanmakin jaska matu janchamaxanikiki— jatu waya

Jawen jiwetimabiaken mabuwen kemuadan, mesekiaki, na janchadan

¹³januxun mapuabu anuxun juni betsan jau Jesúsun ea medabewanun ixun yuikin:

—Yusinaan, en ibu mawashinken en juchin jawen mabu ea paxkaxunamaki. Jau ea paxkaxunun ea yuixunwen— aka

¹⁴nemakin Jesúsun yuikin:

—En matun xanen ibumaki. Jaska watan en matu paxkaxuntidumaki— iwanan, ¹⁵yudan kaian yuikin:

—Man mabuwen kemuaidan, matu yuinun ninkakanwen. Man mabuyabia jatun matu jiwematidumawen taea jamapai mabu shadabu besti bechipai ja jayanun ika man kemukunkainaidan, uindakanwen— iwanan,

¹⁶Januxun jaskakidi miyuiwen jatu yusinkin

—Juni betsa mabu midimayatun jawen bai anu yunu betsa betsapa waxun ichawatan ¹⁷Jawen shinanen shinankin: “En xekiwan midima en jani adutidumaki. ¿Jaska waxanpa?” iwanan, ¹⁸“En shinanen, en xekiwan aduti betsa betsapa apakin keyutan ana janu aduti jiwe ewapa wakin janu en xekiwan inun en mabu en aduxanii”. ¹⁹Jaska watan jamebi shinankin yuikin: “Ma janu en mabu inun en piti ichapa aduti en jayaki. Jaskaken ana dayama juindukunkin piti ichapa pikin mabex aki benimakunkaini badi ichapa en jiwexanii”, ikaya ²⁰Januxun Diosun yuikin: “Jaskamaki. Jaska min yuiaidan, min unanmajaidaki. Na jabia meshu medan min mawaya ja min mabu min pewakin keyuxudan, tsuabunda paxkaxankanikiki”, akin yuitiduki. ²¹Ja juni keskakin tsuabunda jamebi mabu ichawakin yaushikin Dios jaibuwama Dios bebunua nuitapaikiki— iwanan,

Diosun jawenabu mekekubainmiskiaki, na janchadan

(Mt 6.25-34)

²²Januxun Jesúsun jawen tsumabu besti ana yuikin:

—Eska bestiwen taea matunmebi man jamapaiwen dabanan imisbukidi matu yusinun ninkakanwen. Jiwe bestia pepakunkainun ika piti pi inun tadi sawenun ika jawen dabanan iyamakubainxankanwen. Jiwea jayaidan, pitiwen besti man itidubumaki. Yuda jayaidan, tadi sawe bestinun ika man itidubumadiki. Jaskaken ja dabewen taea man jiwunun Diosun matu jiwea inanma iniki. ²³Jamen Diosun matu mekekubainmistun matu damiwatan matu jiwemakin chanima piti inun matun tadi matu inankubainmiski. ²⁴Ja inun, nai anu peiyabukidi matu shinanmanun ninkakanwen. Jabun jawa miban banama inun jawa bimi tsekaisbuma inun jabun piti aduti jayabumabiaken Diosun jatu pimakubainmiski. Jaskaken Diosun matu bechipaikin peiyabu matu binumakubainikiki. ²⁵Ja inun, tsuabuda ibubis nuikin jawen mabu inun jawen piti shinainwen taexun jawen jiwea ana chaipawatidumajaidaki. ²⁶Min jaska bestitidumawen taea jawada betsa betsapa inun ika jawen dabanan iyamakubainkanwen.

²⁷Jaskatan jua tuemis shinankanwen. Jawa dayakin tuduaimabia jawenduai tuemiski. Jakia nukun xenipabu xanen ibu Salomón mabujaidayatun jawen tadi jawendua sawexun jawenduakin jua tuemis binuama iniki. ²⁸Jakia ni maxu juaya sepashinxun kuamisbuki. Diosun jua jawenduawamistun ja jua binumakin Dios matuwen nuikin matu tadi sawematiduki, man ikun bexmas wabiyadan. ²⁹⁻³⁰Jaskaken yuda dasibibu mai jidabi anuabu piti inun tadiwen kemukin benakubaunmisbuki. Jakia matudan, man betsaki. Matun Epan matu unainwen taea ja piti inun tadi man bikatsis imisdan, ana jas shinain jawen dabanan iyamakubainxankanwen.

³¹ Jakia jawada Diosun bechipaiai chibankin ja dukun Dios xanen ibuwakin shinankubainxankanwen. Man jaska wai ja kachu jawen jiweti piti inun tadi man jayakunkainxanaii, Diosun matu medabewadan— iwanan,

Dios jiwexuni pepatikidi Jesúsun jatu yusinikiaki, na janchadan
(Mt 6.19-21)

³² Jesúsun jawen tsumabu yusinkubainkin yuikin:

—En matu mekeawen taea man en chaxuwan keskabuki. Ja inun, man ikunwainbu ichapamabiaken matun Epa Diosun jawenabu matu watan jabe matu jiwemakubainxanikiki. Jaskawen taea jawawen dateyamakanwen. ³³Matun mabu jawada ma jayawen nuiama matun mabu betsawen pei bitan jawen nuitapaibu medabewakubainxankanwen. Jamen ja pei matun kapankanki man adua yumetsubun bibaintidubuki. Ja inun, jawen masanen pesa pesa atiduki. Jakia matun pei yaushiana man inanananmisbu pewen matu kupikin nai anua jawa chapui keyuisma Diosun matu inanxanikiki. ³⁴Jamen tsuabuda jawen jiweti mabuwen kasmai Dioskidi shinain man Dios jiwexunaidan, jabiadidi matun shinanen man nui ai jayaki, nai anu kasmai mai anudan— iwanan,

Uxa keskama ninkai keskakin Jesús juxanai
manakubaintikiaki, na janchadan

³⁵ Jesúsun jatu yusinkubainkin ana yuikin:

—Tadi pekadiama inun bin nukawadiama keskaxun man ea manakubainxanun bebunkidi matu yuinun ninkakanwen. ³⁶Jawen jaibu ainyain anu jiwe ibu nawai ka jawen tsumapan manaya juxun jikinun ixun kenaya jawen beputi xui jawaida bepenxunxanun ika uxama manai keskakubainkanwen. ³⁷⁻³⁸Janunkain ¿jatian juimenkainan? yamenapun kasmai takada keui taeaya kasmai jiwe ibu jukin jawen tsuma uxabuma bechitushiaya jawen tsumabu benimajaidaxankanikiki. Januxun chanima jiwe ibun jawen tsumabu duawakin jau jabetan pinunbun jatu baxti imatan jatu pimaxanikiki. ³⁹Ja inun, chanima jatiada yumetsu juai bebunkidi unankin jiwe ibun bextekatsi manatiduki, jau jikiyamanunan. ⁴⁰Jaska keskadiai jatianda en matun Juchi Kayabi Iyua en ana juxanai tsuan unanmaken matunan, matun jiwea pewakin keyutan ea manakubainxankanwen— ikaya

Tsuma chikish inun tsuma chikishmakidi Jesúsun
jatu yusinikiaki, na janchadan
(Mt 24.45-51)

⁴¹Januxun Pedron Jesús yukakin yuikin:

—Yusinaan, na miyuiwen min nuku yusiainan, ¿nukuna bestimen? ¿dasibitunadaka?— aka

⁴² Jesúsun yuikin:

—Eska keskaki. Xanen ibu betsa chai kakin jawen tsuma unanepa yunubainmiskidi matu yuinin ninkakanwen. Jawen tsuma betsabu pimakin jau jawen jiwe mekexunkubainun jatun xanen ibun jawen tsuma unanepa yunubainmiski. ⁴³ Janua xanen ibu ana chintunkidan jaska yunubainima axunkubainaya ja xanen ibu jaki nukutushitan benimajaidaxanikiki. ⁴⁴ Chanima ja xanen ibun jawen tsuma dasibi jawen jamapai mekemaxanikiki, jawen jiwe inun, jawen bai betsa betsapa inun, jawen inabu inun, jawen tsumabu betsadan. ⁴⁵ Jakia jawen tsuma shinan pema yunubainima shinan chakakin yuikin: “En xanen ibu yane juamaki. Jatiada juxanikiki”, iki dayanika betsabu juni inun ainbu ichakawai nawachakayamai paenkin ⁴⁶ jatian juai manama ja xanen ibu jikitushitan jawen yunua axuanmawen taexun manaka chakabube kupijaidaxanikiki. ⁴⁷ Jaskaken tsuabunda jawen xanen ibun daya unan keyubiakin jaska bechipaiai akama inun chibanmawen taexun jatu kupijaidaxanikiki. ⁴⁸ Jakia betsadan, xanen ibun yunuama kaken jawen shinan jaska bechipaiai unanma kanemisbu ja mawaida jatu kupiama ixanikiki. Januxun tsuada Diosun jancha ichapa inanshina jawen taexun jawen daya ichapadi yukaxanikiki. Tsuada Diosun ichapa mekemamis jani jaska wamis ichapadi yukadiakubainxanikiki— iwanan,

Jesúsun jatu paxka akeakenun ika junikiaki, na janchadan
(Mt 10.34-36)

⁴⁹ Jesúsun ana jawen tsumabu yusinkin yuikin:

—Ea ikunwainbu inun ea ikunwanbuma jawen unanti wakin jatu paxkakin unanti wanun ika en juniki. Jaskaken ewen taea jau paxkanunbun en manayuaii. ⁵⁰ Jaskaken Diosun ea unanti wakin jatu ea tenanmakin ea nuitapawaxanaibu manai en yumanyuaii. ⁵¹ Man shinanan, mai anuxun unanuma matu jiwematanun ika en juni dabanen ¿man shinainmenkain? Jaskamaki. Yudabu paxkanun ika en juniki. ⁵² Jaskaken na jabiatian taewakin jiwe betsa anuxun jau ea chibanunbun jawenabu meken besti paxkakin dabe kasmai dabe inun bestibun ea ikunwainbu dabe kasmai dabe inun bestibun ea ikunwanbuma en jatu paxka akeakekubainaii. ⁵³ En jatu jaska waya ewen taea juni bake jawen epabe sinatanamexankanikiki. Ja inun, ainbu bake jawen ewabe sinatanamexankanikiki. Ja inun, jawen babawan jawen yayabe jabiaskadiaxankanikiki. Jatu jaska wakin en jatu paxka akeakekubainxanaii— jatu watan,

Janu kupiti juaitian unanbumakidi Jesúsun jatu
yusinikiaki, na janchadan
(Mt 16.1-4; Mr 8.11-13)

⁵⁴ Januxun mapuabu Jesúsun jatu dasibi yuikin:

—Badi kaikidi meshu meshuai uinkin: “Ui bekatsis ikikiki”, ikin uinkin man yuimiski, kaneamadan. ⁵⁵ Ja inun, surkidia niwe bei xunku ikai

uinkin: “Ikis badi kujaidayuikiki”, ikin man yuidiamiski, kaneamadan.
⁵⁶Bepadamemisbuun, jaska ui inun niwe bemis unanbiamisxun janu chakabu betsa betsapa kaiankeakeai uinbiakin ¿jaskai man jiwea matu kupixanai man unanmamen?— iwanan

**Dibiawen jau jawen nuinun daewatikidi Jesúsun jatu
 yusinikiaki, na janchadan
 (Mt 5.25-26)**

⁵⁷—Jaskai matunmebi unanbiakin ¿jawada pepa man pewaismamen?
⁵⁸Jaska inun, yuda betsa man dibijaidawen taexun ja man dibiawen nawa xanen ibu anu matu iyuaya jau xanen ibun jawen policiabu matu bichimayamanun ja man dibia jawawenda daewakanwen.
⁵⁹Man daewabainama matu bichiabu man paka keyuama chanima man jaskatan kaintidumaki. Jabiaskadi wakín ea jaibuwatan Epa Dios daewadiakubainkanwen, matun chakabuwen jatu matu kupiyamaxanun— jatu waya

Jawen shinan betsa watikidi yusinikiaki, na janchadan

13 ¹Januxun jabiatandi juni betsan Jesús yuikin:
 —Uatian min mai pakea jatiuma Galilea anuabu Templo jemaintin anuxun kenwankin jatun chaxuwan tesenxun kuakin menupananbun xanen ibu Pilaton jawen soldadobu yunua machatuwen jatu detekin jatun jimi chaxuwan jimi yabi jusishinabukiaki. ¿Jaskakin Pilaton jatu jaska washinamen?— akabu ²Jesúsun jatun shinan pewakin jatu yuikin:

—Man shinan, ja junibu tenanshinabudan, jatunabu Galilea anu jiweabu jabun chakabujaida wakín jawenabu binuanwen taexun jatu kupishina dabanen man shinainmen ikaitsa. ³Jaskamaki. Jamen matundi matun shinan man betsa wama man jabiaskadiai mawaxanai, Diosun matu kupaianan. ⁴Ja inun, ¿ana betsa matu yukapa? Jerusalén anu mishki jiwe keyatapa jawen kena Siloé januxun uinbaunti jiwe pudekekidan 18 junibu ja naman mapuabu tenanidan, chakabuwakin juni betsabu Jerusalén anu jiweabu jatun chakabuwen jatu binuawen taexun kupini ¿man jaska shinandiamismenkain? ⁵Jaskamadiki. Jamen matundi matun shinan man betsa wama man jabiaskadiaxanai, niti ikama nuitapakunkainidan— iwanan,

Miban bimiumakidi Jesúsun jatu yusinikiaki, na janchadan

⁶Januxun jabias yusian Jesúsun miyuiwen ana jatu yusinkin
 —Juni betsan jawen bai nemaki higuera ji banayamakidi matu yuinun ninkakanwen. ¿Bimi jayamenkain? ixun uin ka jawa jayama uintantanmis
⁷jawen dayanikaki nukuxun yunukin: “Uian. Dabe inun besti badi ka na higuera ji anu bimi en jamen benabidanbidanmiski. Bimiumasken ea dedaxunwen,

jamen uinbain niakidan”, aka ⁸jawen tsumapan nemakin yuikin: “Ana badi bestichai manayuwe. Mai pukinkin mishpu bitan ina awa pui jusitan en mia tamanchinxunyuxanaai. ⁹En jaska wa bimiyaxanimenkain. Bimiyamasken en mia dedaxunxanaidan”— akin yuiniaki.

Juindakuntitian ainbu kakuni Jesúsun kayawa kawenikinikiaki, na janchadan

¹⁰Mae betsa anuxun juindakuntitian jatun ichati jiwe anuxun Jesúsun jatu yusianyan ¹¹jabianudi ainbu betsa yushin chakabun ichakawakin kaku wani 18 badi kabia kawenikitidumajaida jatube tsaua ¹²⁻¹³Jesúsun uinkin kenaxun ainbu yuikin:

—Ainbuun, min ma xuxaki, min isin tenenidan— akin kamepiaya jawaida kawenikitan januxun Dios kenwankin taewaya

¹⁴Janua juindakuntitian Jesúsun jaska wai uinkin shinain jatun ichati jiwe xanen ibu sinaxun jawenabu ichabu yuikin:

—Semana tibi 6 xaba nun dayamiski. Jau matu xuxawanun dayatian besti bekanwen, juindakuntitian xuxai juamadan— ikaya

¹⁵Januxun Jesúsun jatu chitekin yuikin:

—Min jaska shinain keska minabubetan shinain man bepadamemisbuki. Juindakuntitianbiaken matubun matun ina awa inun matun burro jawen nuikin tepebain man jatu unpax amamiski. ¹⁶Jabiaskadi wakin na ainbu matu keska Abrahamnen babadi 18 badi ka Satanásan kanexkin isin tenemani jawen nuikin juindakuntitian en kaya wakin burro tepea keska waxudan, ¿chakabumen?— akaya ¹⁷jabu jaki sinataibu jatu chitea dake chakayamai jawa yuiama maniabun yuda ichapabun Jesúsun betsa betsapa pepa dasibi waiwen taea benimai keyuaibun

Dios xanen ibuidan, jexe pexemishtin yumei ewapamis keskakidi jatu yusinikiaki, na janchadan
(Mt 13.31-32; Mr 4.30-32)

¹⁸Jesúsun jatu ana yusinkin yuikin:

—Dios xanen ibui jaskamiskidi ¹⁹miyuiwen matu yusinun ninkakanwen. Junin jawen bai anu mostaza jexe pexeishtabia banaima yumei ewai ewapashina jawen mebiki peiyabun jaki juindukuin utamisbuki. Dios xanen ibuidan, jaska keskaki. Ja dukun juni betsan Diosun janca ikunwankin jawenabu yusian akeakeaya jawen yusian ninkakin bechipaikin chibanmisbuki, ichapabunan— iwanan,

Dios xanen ibuidan, misi jawen xaxa wati keskakidi Jesúsun jatu yusinikiaki, na janchadan
(Mt 13.33)

²⁰miyui betsawen ana jatu yuikin:

—Dios xanen ibui jaska keskamiskidi ana matu yusinun ninkakanwen.

²¹Misi wakatsi ainbun xekiwan dudu midimabiaken kencha ewapaki

puchinin kesunxun jawen xaxa wati eskadabes unpaxwen nemuskin kapan dasibi buspukidankin xaxa wamiski. Dios xanen ibuidan, jaska keskaki. Ja dukun juni betsan Diosun jancha ikunwain pepakunkainkin jawenabu yusian akeakeaya unanxubida midimabun ikunwantidubuki—jatu wabaini

Janu jikiti xui jashuwen jikitikiaki, na janchadan
(Mt 7.13-14, 21-23)

²²Jerusalén baiwen kakin mae tibi anuxun Jesúsun jatu yusinkubainaya ²³juni betsan Jesús yukakin:

—Xanen ibuun, janu min xanen ibuayadan, ¿eskadabes besti min jatu mekexanai?— aka

²⁴—Jaa. Chanimaki. Ea chibankatsis iki menan shinan mestenwantan janu jikiti xui jashu anu jikikanwen, chipu ichapa jikikatsis ibiai jikitubuma ixankanikiki. Jaska en matu yuiiai. ²⁵Eskaki, matu yuinun ninkaidakanwen. Ikis en jancha ikunwankin man ea chibantiduki. Jakia en Epan mae jikiti xui ma en bepuken tsuabuda jikinun, iwanan, kene pechiudi nixun kenakin yuikin: “Xanen ibuun, nuku bepenxunwen”, man wa matu nemakin yuikin: “¿Man jania ikimenkain? En matu unanmabin!”, matu wa ²⁶tsuanda yuikin: “Mibetan nun piniki. Nukun mae anuxun min yusiniki”, man wa ²⁷januxun matu yuikin: “Man enabumaki. ¿Man jania ikimenkain? En ma matu yuixuki. Chakabuwakin matun shinan man betsa waismaki. Nenua budikanwen”, en matu waxanai. ²⁸Januxun matun xenipabu Abraham inun jawen bake Isaac inun jawen baba Jacob inun Diosun jancha yuixunika dasibi Diosun mae anu dasiabu uin chai matu udenibuwen taea jatu uin jaska man mapeketidubumawen taea xeta yenx yenx iki man kaxakunkainxanai. ²⁹Ja inun, Dios xanen ibukin mai jidabi anua nortekidia inun, surkidia inun, estekidia inun, oestekidia ikunwainbu dasibi dasia tsauxun pixankanikiki. ³⁰Jaskawen taea na jabiatian tsuabuda jabu xanen ibuisbumadan, jabu dukun xanen ibu ixankanikiki. Ja inun, na jabiatian tsuabuda xanen ibumisbudan, mawaida ana xanen ibuama ixankanikiki— jatu waya

Jesús Jerusalén anuabuwen taea punu nukanikiaki, na janchadan
(Mt 23.37-39)

³¹jabiatiani fariseobun Jesús datekin mese wanun ika bexun yuikin: —Xanen ibu Herodesin mia detekatsis ikikiaki. Nenua janida paxadiwe— akabu

³²Jesúsun jatu yuikin:

—Uian. Ikis inun meshukidi yushin betsa betsapa kainmakin isin teneai bu xuxawakin en yusinkubainai. Jaska watan ua betsatian en

daya en keyuxanaidan, en jaskayukunkainaii. Kaxun ja kaman inu keska padanan yuiditankanwen— iwanan, ³³ ana jatu yuikin: —Diosun jancha yuixunikabu Jerusalén anua debumisbuwen taea eadi jabiadidi en kaii. Ikis inun, meshukidi inun, meshukidi betsatian en daya en menei kaiwen taea matun shinanwen janu en niti itidumaki— ikin,

³⁴—Jerusalén anu jiweabuun, Jerusalén anu jiweabuun, Diosun jancha yuixunikabu inun jawen jancha jatu bana bexunpakeaibu Diosun jatu yunubiaya danankin jatu tenankin matun xenipabun ani keska wakín mishkiwen man jatu tsaka tsaka amisbuki. Takadan jawen bake nuxamis keska wakín eandi matu medabewakin matu mekenun ika en jubianiken jaska shinanma ea danankin man ea jawa ninkamaki. ³⁵ Uinkanwen. Matun mae matun mesti man mekenun Diosun matu jenexanikiki, ana Jerusalén mekeamadan. Jakia janu en ana juaitian: “Yavé Diosun kushipaya juaidan”, ikin man yuidiamadan, man ana ea uinyuama ixankanaii— jatu wabaini

**Jesúsun juni betsa jawen yuda jene ichai
xaxani xuxawanikiaki, na janchadan**

14 ¹Ana juindukunti betsatian fariseo xanen ibun jiwe anuxun Jesúsun jabetan piaya fariseo betsabun uiainbun ²Jesúsun besuudi juni betsa jawen yuda jene ichai xaxaima tenei tsauawen taexun ³Moisin keneni yusinananmisbu inun fariseobu unanti wakín Jesúsun jatu yukakin:

—Jaska Diosun Moisés yusini chibankinan, ¿juindukuntitan xuxawati yununimen? ¿Yunuama inidaka? Ea yuikanwen— ⁴jatu wabia pes jawa yuiama maniabun juni jawen yuda jene ichai xaxaima tsaua metsunxun xuxawatan nichian kaya ⁵fariseobu Jesúsun ana jatu yuikin:

—¿Matubunan, juindukuntitanbiaken min bake kasmai min ina awa unpax biti kini medan kauana uinsama jawaida kain min nexeismamen?— jatu wa

⁶jatu xabakabi chiteawen taea jawa yuiamabumaken

**Ainyanwankin jatu ixun pimatikidi Jesúsun
jatu yusinikiaki, na janchadan**

⁷Janua fariseobun jiwe anuxun jatu pimakatsi jatu ia betsabu binunun ika xanen ibu dapi baxti ikatsis ikaibu uinkin Jesúsun jatu yusinkin:

⁸—Ja ainyankin nawa wai anu min jua pinun ika xanen ibu dapi baxti iyamakanwen. Jamen mia dukun xanen ibu dapi min baxti iken xanen ibu betsa mia binua juken ⁹jiwe ibuan mia yunukin: “Janu ikama uani iwe. Jau betsa janu inun ukedi xekexunwen”, akin mia mebinkiki. Mia jaska wa dakejaidai benikain jawen jenei baxti ixun min pixanaii. ¹⁰Jakia mia kayabis iwanxun jawen jenei man baxti ika dakaken jiwe ibun mia uinkin

yuikin: “Baa, ja xanen ibu dapi ikiyuwe”, iwanan, mia yunuikiki. Mia jaska watan mibetan piaibu mikidi jatu pe shinanmaxanikiki. ¹¹Jabiaskadi wakin tsuada ibubis kenmis Diosun dake waxanikiki. Jakia tsuada ibubis keinsma Diosun kenwanxanikiki. Ninkaidakanwen— iwanan,

¹²jiwe ibun pimabiayu jadi Jesúsun yuikin:

—Min duapawen kupikin jau mia chipu pimadiaxanunbun pimakin min jaibuaibu inun, min betsabu inun, minabu betsa inun, mabuya mia dapi jiweabu besti jatu iyamakubainxanwen. ¹³Jakia nuitapaibu jatu ixun pimakin jawaumabu inun yuda babunibu inun, pakebu inun, bekunbu medabewakin min jatu duawayu ¹⁴jaska waxun mia ixun jabundi mia pimatidubumawen taexun pepabu mawa ana besteaintian min pepawen Epa Diosun mia manakua min benimaxanai— akaya

**Piti ichapa ichawashinxun yuda ichapa jatu pimatikidi miyuiwen
yusinikiaki, na janchadan
(Mt 22.1-10)**

¹⁵jaska wai dakaxun ninkabaikin betsan Jesúsbetan pikin Jesús yuikin: —Dios xanen ibuaitianan, chanima tsuabunda jabetan pidan, jabe benimajaidaxankanikiki— aka

¹⁶januxun Jesúsun miyuiwen yuikin:

—Juni betsan nawakin piti wakatsis ikin ichapabu yubashina ¹⁷ma janu pia kemaitian jawen tsuma yuikin: “Jatu yuibauntanwen, jau ikis bedinunbunan”, iwanan, yunua yuikubaunaya ¹⁸dasibibu bepadamekin ja dukuntun yuikin: “Bai wakatsi juni betsan bai en bianxuki. En ja uinyuikai en jabetan piyuamaki, ea yuixunyutanwen”, ikaya ¹⁹ja kachu betsandi yuikin: “Jawen dayati ina awa meken dabeti en dama bixuki. Jatu unanun, ixun iyunun ika en jabetan piyuamaki, ixuki, akin ea yuixuntanwen”, ikaya ²⁰januxun betsandi yuikin: “En dama ainyanxuki. Jaskawen taea en yudanwanyuai ea yuixunyutanwen”, aka ²¹ninkatani chintunkidan jawen xanen ibu jaskanxun dasibi yuia sinatakin ana jawen tsuma yunukin: “Nukun mae anu jiweabu bai jatiubuma inun bai ewapabuwen benabaunkin nuitapaibu inun, yuda babunibu inun, nia chakabubu inun, bekunbu jatu itanwen, jau ebetan pi benunbunan”, aka ²²kaxun jatu itankin jawen xanen ibu yuikin: “Min ea yunua en abiaxu min nawati dintu medan ichai texke idiabumaki. ¿Jaska wapa?” aka ²³“En jiwe anu jau ichai texke iki benunbun nukun mae dapi jiweabu daya jayabiabun jatu bikawakin jatu ea ixuntanwen, jau piyui benunbunan. ²⁴Chanima jabu dukun en yubashinabun en piti piabumaki”, akin jawen tsuma yuiniki. Dios xanen ibunun badiaitianan, Diosun jabiaskadi waxanikiki— akin Jesúsun jatu yusinikiaki.

**Jesús chibanan bikakiaki, na janchadan
(Mt 10.37-38; 5.13; Mr 9.50)**

²⁵Januxun yuda ichapabun jawen jancha tapinkin chibainbu dabekekauan Jesúsun jatu yusinkin yuikin:

²⁶—Tsuada eki chiti ikatsis ikinan, jau ea dukun bechipaikin chibankubainxanunbunwen. Jamen ja dukun jawen ibubu inun, jawen ain inun, jawen bakebu inun, jawen betsabu inun, jawen puibu bechipaikin jeneama inun, jawen jiwea bechipaikin jeneamadi ea bechipaikin binumamadan, en tsuma itudumaki. ²⁷Ja inun, tsuabunda ea chibanun ibiai ewen bika tenekatsi ikamadan, en tsuma itidumaki. ²⁸Jamen betsan ea chibankatsi ikinan, man eska shinantiduki. Matun bai nemaki janu mapekea nixun uinbaunti keyatapa wakatsis ikin, ¿en pei damenkain? iwanan, jawen kadu tanakin man shinanmiski. ²⁹Jakia man jaska wama janu mapekea nixun uinbaunti min taewaima min keyutidumawen taexun juni betsan mia usankin ³⁰yuikin: “Jaska jawen kadu shinandiamabia ja unainsmapatun ja dukun janu mapekea nixun uinbaunti taewaima jaska waxun menetidumaki”, mia watidubuki. ³¹⁻³²Jamen betsadan, jaki sinatakin nawa xanen ibu betsan 20,000 soldadobu iweai nemakatsi jawen soldadobu yunudiama shinankin yuikin: “¿En 10,000 soldadobun jawen 20,000 soldadobu maematidumen?” ixun atidubuma unantan ja dapi bediabuma jaska wakin daewatidu jau yukatanunbun jawen tsumabu yunumiski. ³³Jaska keskadi wakin tsuabunda matun jamapai tibi ana shinanma jawada dasibi man jaya ana jawen nuiama bestibu man eki chiti ikubaintidubuki. ³⁴⁻³⁵Jamen betsadan, tewekidi matu yuinun ninkakanwen. Tewe jawen nue wa peki. Jakia jawen bata keyu ka paismaken ana jaska waxun jawen min miban min pewatidubumawen taexun putamiskubi. Bestibu man jaskatiduki. Uindaxankanwen. Man pabinkiyabunan, ninkaidakanwen—jatu waya

**Chaxuwan bestichai benua jawen ibuan bechitidukidi miyuiwen
yusinikiaki, na janchadan
(Mt 18.10-14)**

15 ¹gobierno pei bixunika ichapabu inun yuda betsabu kaka chakamisbu ichapabundi Jesúsun jancha ninkanun ika jaki xukuabu ²uinkin Moisin keneni chibanjaidamis fariseobu inun Diosun jancha kenenibu yusinananmiskun Jesús yuain yuinamekin yuikin: —Ja juninan, yuda chakabun Moisin keneni chibainsbuna beya wakin jatubetan pikiki— ikaibu ³jaska yuainbu jatun shinan unantan miyuiwen Jesúsun jatu yusinkin: ⁴—Tsuada man 100 chaxuwan jayatun bestichai benua ja ⁹⁹ bai anu mapuken bestichai benua man benamiski. ¿Chanimamen? ⁵Atimas ja benua bechitushitan benimakin iabidani ⁶min jiwe anu jikitan min jaibuabu inun mia dapi jiweabu kenakin ichawaxun jatu yuikin: “En chaxuwan benuadan, ma en bechitanaii. Jaskawen taea ebe benimajaidakanwen”, akin man jatu yuimiski. ⁷Chanima jabiaskadi imisbu en matu yuiaii. ⁹⁹ yuda ichapabun ea ikunwain

pepakubainmisbuwen taea nai anu jabu Diosbe jiweabu benimabiamisbun jakia bestichai benua keska chakabui jiwekunkainmistun jawen chakabu jenetan jawen shinan betsa waken jawen benimai chakayamai shinan chankanjaidamisbuki— iwanan,

**Pei jexe bestichai benua jawen ibuan bechitikidi
miyuiwen Jesúsun jatu yusinikiaki, na janchadan**

⁸ Jesúsun ana jatu yusinkin

—Ainbu 10 pei jexe kadujaida jaya bestichai pakea benanun, iwanan, bin dekuxun jawen jiwe medan unanxubida matsukin bechidiana matsu jeneismaki. ⁹ Janua atimas bechitan jawen jaibuaibu inun ja dapi jiweabu jatu kenakin ichawaxun yuikin: “En pei jexe en benushina en bechixuwen taea ebe benimajaidadikawen”, akin man jatu yuimiski. ¹⁰ Chanima jabiaskadi en matu yuiai. Yuda bestichaitun jawen chakabu atimas jenetan jawen shinan betsa watan ikunwanyan Diosun nai tsumabu benimamisbuki— iwanan,

**Jawen bake maxku benua keska jawen epa anu chintunkidanikidi
miyuiwen Jesúsun jatu yusinikiaki, na janchadan**

¹¹ Jesúsun ana jatu yusinkubainkin yuikin:

—Juni betsa juni bake dabeyakidi en matu yuiai ninkakanwen.

¹² Jawen bake maxkun yuikin: “Epaan, min mawadiamabia jatiada min mawaken jawada enaxanidan, paxkaxun menan ea inandiwe”, aka shinantan yuikin: “Peki. En mia axuntiduki”, iwanan, jawen jamapai dasibi jawen bake dabe paxkaxun jawen bake maxku jawena inanshina ¹³ uxa eskadabes ka chipu jawen bake maxkun pei binun, iwanan, jawen mabu jatu inankin keyubaini ja pei bishianyan chai kai mai pakea betsa anu kaxun jawen pei mekeama jawada betsa betsapawen kemukaunkin jawaida puta keyutan ¹⁴ jawen pei yamaken ja mai pakeanuabu buni taeaibun jawen bake maxku bunidiakin ¹⁵ januxun daya benabaunkin nawa xanen ibu tsuma wanun, iwanan, daya yuka jawen bai anu ina yawa mapua jau mekenun yunua ¹⁶ ja ina yawa pimakin jawen piti yani wapanan tsuan jawa inanma ¹⁷ januxun xabakabi shinan pewakin yuikin: “En epan jiwe anuxun jawen dayadubun piti piabu texe jayabiaken nenua buni en mawatiduki. ¹⁸ Jaskaken nenua chintunkain jikixun yuikin: ‘Epaan, Diosun yunua ninkama ichai miadi ichakawai en chakabukaintanaii. ¹⁹ Kanekin en mia xunubainima jaskawen taexun ana min bakewakin ea kenama min dayadu betsa ea wawe’, akin en yuixanaii”, iwanan, ²⁰ nawa jenebaini jawenabu anu chintunkaini jawen epan jiweki kemadiamabiaken chaike jawen epan bechibaini jawen nui kushikaini jaki nukutan benimajaidakin ikuxun tantsu tantsu akaya ²¹ jawen bake maxkun yuikin: “Epaan, Diosun yunua ninkama

ichai miadi ichakawabaini en chakabu kaintanaii. Kanekin en mia xunubainima jaskawen taexun ana min bakewakin ea kenayamawe”, abia ²² ninkama jawen epan jawen dayadubu yunukin yuikin: “Tadi pepa jawaida bitanxun sawemakanwen. Ja inun, meichikiti sawematan bichi tae sawemadiakanwen”, iwanan, ²³⁻²⁴ “Na en bake mawaima keska ma ana bestean keskaki. Benuima nun ma jaki nukuawen taexun ina awa bake xuajaida bitanxun textexun ja naiti piti ichapadi bawakanwen, pi nun jabe benimanunbunan”, jatu wa jawen jancha ninkai jabe benimajaidai nawai taeaiibun

²⁵ jaskaibun jawen bake iyua bai anu dayatani jui jawen jiwe dapi kemakin nawaibu ninkakubidankin ²⁶ jawen dayadu betsa kenaxun “¿Jaskai e iskaun beyusi nawai ikanimenkain?” ikaya ²⁷ jawen dayadun yuikin: “Min betsa maxku chintunkidani jawa isin teneama jikixuwen taea benimakin ina awa bake xua jau bawaxununbun min epan jatu yunua detetan bawaxun pi min epabe ma benimai beyusi nawakanikiki”, aka ²⁸ janua sinatai jiwetan jikikatsi ikamaken jawen epan daewanun ika taxnixun jancha wa ²⁹ jakia jawen epa nemakin yuikin: “Eskai en sinatai mia yuinun ninkawe. Badi ichapa mia dayaxunkin min jancha en ninkakubainmiski, jawa kaneamadan. En jaskabiaken en jaibuaiubube jaya beyusi en nawai benimanun chaxuwan bake babupa min ea detexuinsmaki. ³⁰ Jakia ja min bake maxkun ainbu jinipabubetan min pei puta keyutani mais jubiaken nukun ina awa bake xua min jamen bawaxunxuki. Jaska watimaki”, aka ³¹ daewanun, iwanan, jawen epan yuikin: “Epaan, min en bake iyuadan, min ebe jiwekunkainmiski. Dasibi en jaya minaski. ³² Jaskabiaken min betsa maxku mawa keska ishian ma ana jiwea keskaki. Uatian benushina ikis nun ma bechiawen taea benimai nun beyusi nawai pejaidaii”— jatu watan

**Mabu mekexunikatun jawen xanen ibu padanikidi
miyuuwen yusinikiaki, na janchadan**

16 ¹ januxun fariseobun ninkadiaibun Jesúsun jawen tsumabu uinkin jabudi yusinkin:

—Juni betsa mabujaidaya inun bai ichapaya jabu dasibi mekexunika dayaxunmiskidi matu yuinun ninkakanwen. Jawen dayaxunikatun kanekin jawen jamapai tibi pe mekexunamaken jaki chaniabu ninkaxun ² jawen tsumapan kenaxun yuikin: “Mikidi yuiaibu en ninkaidan, ¿chanimamen? En pei inun en mabu min ubisita wamiskiaki. Jaskaken jaska nuku dibiabu cuenta tibi pewaxun ea inantan ana ea dayaxunama janida kaindikaintanxanwen”, aka ³ jawen mabu mekexunikatun shinankin: “En tsumapan ea nichianan, ¿jaskaxanpa? En yuda ma en babu bai anu pukin en dayatidumaki. Ja inun, jamapai jatu ea abauni en daketapakauntidumaki, pei ea ikidan. ⁴ Jaskakenan, en tsuma dibiabun

jiwe anu en ka jau ea medabewakin jaibuwxanunbun jaska wakin en jatu jaibu watidu en jatukidi shinaiin”, itan ⁵jawen tsuma dibiabu tibi bestibu kenaxun ja dukun jua bichitan yukakin: “En tsumadan, ¿jati jawen jawa min dibiamen?” aka ⁶ja dibiatur yuikin: “Jawen piti xeni 100 bidón en dibiaki”, aka jawen mabu mekexunikatun jaibuwakin yuikin: “Jaki min dibia una cuenta bitani nenu tsauxun ana bena wakin jawaida na jabiatian 50 bidón besti kenediwe, min dibia xeni ana shinanmadan”, aka kainkainaya ⁷januxun ja kachu juadi yukakin: “En tsumadan, ¿Jati jawen jawa min dibiamen?” aka, “Xekiwan 1,000 saku en dibiaki”, aka: “Jaki min dibia una cuenta bixun ana bena wakin 800 besti kenediwe, min dibia xeni ana shinanmadan”, akin kainma kaya ⁸dibiabu tibi jabiaskas jatu waken jawen tsumapan jawen aka jaki chaniaibu unantan jaska nuitapatiduma jaskai jaibuyai jiwexanai unantan jawen mabu mekenika chakabubia unanepawen taexun kenwaniki. Chanima mabuwen kemukin inananain jawen nuiama unanepatan Diosunabuman jaska wai jiwekin jabun Dios ninkaibu jatu binumisbuki. ⁹Jaskawen taexun mabuya man jaskakubainxanunbun matu yusinun ninkakanwen. Mabuwen kemua mesebiaken ja mabu man jayawen medabenankin yudabu jaibuwakin man beyawatidudan, yudabube inananain pepaxankanwen. Matun mabu keyuaya janua man ea chibankin jaska jatu axunmiswen taea Dios matuwen benimakin nai anu jiweti kayabi inankin matu manakuxanikiki.

¹⁰Ja inun, tsuabuda mabu eskadabes jaya pe mekemisdan, mabu ichapadi jayakin ichapadi pe meketidubuki. Jamen tsuabunda mabu eskadabes pe mekeismadan, ichapadi pe meketidubumaki. ¹¹Jaskaken mai anua mabuwen kemukin man pe meketidumaken Diosun daya pepajaida matu yunuamadi ixanikiki. ¹²Ja inun, yuda betsan mabu man pe mekexuntidumaken jawada Diosun matu yubani matu inanmadi ixanikiki. ¹³Ja inun, jadatuda dayadun jawen xanen ibu dabe dayaxunkin medabewatidumaki, betsa bechipaikin chibankin betsa bechipaima danankin ninkamadan. Jabiaskadi wakin pei inun Diosdi shinankin ja dabe jaska waxun man duawatidumaki— jatu waya

¹⁴fariseobu peiwen kemukin bechipaismisbun Jesúsun yusian ninkakin kaxe wakin usainbu ¹⁵Jesúsun jatu yuikin:

—Matudan, bemakis pepakin junibu padankin man jatu kenwanmamiski. Jakia Diosun matun shinan unanmiski. Ja inun, kenkin jawada yudabun bechipaiai Diosun dananmiski— iwanan,

**Diosun jawen yusian jatu yununi tsuan
betsa watimakiaki, na janchadan**

¹⁶Jesúsun jatu yuikubainkin:

—Jamen Nashimanika Juan judiama matun ichati jiwe tibi anuxun Moisin yusini inun Diosun jancha yuixunikabun yusinpauni

yusinkubainkin Juanki tekiwanibuki. Januxun Juanen kaka pepa Dios xanen ibuxanaikidi chaniaya ichapabun bechipajaidai janu jikinun ika naxukunibukiaki. ¹⁷Jabiaskabiaken Diosun yusini dainbainai keska wakin tsuan betsa watidumaki. Nai inun mai yamaxanai bikama keskaki. Jakia dasibi Diosun Moisés yusian keneni jawa betsa texe wama menexanikiki, tsuan betsa watidumajaidawen taeadan.

Ainbu jenetimakidi Jesúsun jatu yusinikiaki, na janchadan
(Mt 19.1-12; Mr 10.1-12)

¹⁸Jaskaken Diosun Moisés yusian eskaki. Tsuanda jawen ain jenetan ainbu betsa bikinan, Diosun jancha kanei chakabumisbuki. Ja inun, ainbu jawen benen jenebaina juni betsan ainwainan, ja juni betsadi jawen chakabudiaikiki, jaska Diosun Moisés yusian keneni kaneidan— iwanan,

Juni mabujaidaya inun Lázaro nuitapanikidi
Jesúsun jatu unanmanikiaki, na janchadan

¹⁹Januxun Jesúsun jawen yusinti betsawen jatu yusinkin yuikin:
—Juni betsa mabujaidaya inun bai ichapayatun xanen ibukin tadi pepas sawekin pei ichapa putaxun jawen jaibuaibus pimai jatube beyusi nawai benimakunkainiki, jawen shinan betsa wamadan. ²⁰Jamen juni betsa nuitapai chaminitun Dios ikunwain jawen kena Lázaro jawauma juni mabujaidayatun jemaintin kene xui xexekaian jawenabun janatantanmisbu ²¹piti texe xanen ibun putai pikin yani wanun ika dakaken kaman bexun jawen chami dataxkubainmisbu ²²janua Lázaro nuitapai mawa jawen xenipabu Abraham anu jau pepa besti jiwunun Diosun nai tsumabun jawen yushin iyuabu janua jatianda ja mabujaidayadi mawa jawenabun maiwabu ²³janu mawabu bumisbu anu juni mabujaidayaima nuitapai yumankin uinbaunkin chaikea Abrahamnen Lázaro duawai bechitan ²⁴sai ikin yuikin: “Epa Abrahamneen, ewen nuiwe. Chi jede anua en yumaiin. Unpax metsabidan jau en jana ea matsi wayunun Lázaro ea yunuxunwen”, aka ²⁵Abrahamnen yuikin: “Baa, eskaki shinanwen. Min jiweadan, jawa bika teneama mabujaidaya min jiwekunkainimaki. Min jaskaya Lázarodan, nuitapakin isin chakabu besti tenei jiwekunkainimaki. Jakia natian Lázaro Diosun duawakin mia kupiaiwen taea min nuitapaii. ²⁶Jaskaken miaudia ea anu jau tsua juyamanun inun ea anua mia anu jau tsua kayamanun na kini keyatapajaida waxun Diosun nemaniki”, aka ²⁷⁻²⁸mabujaidayaimatun yuikin: “Jaskakenan Epaan, en mia yukaii. En meken bestiti betsayaki. Nenu en yumain anu jau jabudi beyamaxanunbun en epabe jiweabu jau jatuki chanitanun Lázaro ea yunuxunwen”, aka ²⁹Abrahamnen ana yuikin: “Moisin yusian inun Diosun jancha yuixunikabun yusian kenenibu minabu jayawen taexun jatun yusian jau

tapinunbunwen”, aka ³⁰ mabujaidayaimatun yuikin: “Epa Abrahamneen, chanimaki. Enabu Diosun jancha jayabia tapinsbumaki. Jakia juni mawa ana bestenkain jatuki chania jatun shinan betsa watidubuki”, aka ³¹ ana nemakin Abrahamnen yuikin: “Moisin yusian chanima inun Diosun jancha yuixunikabun jatu yusini jawa ninkaisbumawen taexun juni mawa ana bestenkaini kaxun minabu jatu yusinbia jawa ninkamadi itidubuki”, akin Abrahamnen nemaimaki— iwanan,

Yuda betsan jawada jatu chakabuwamai mesekiaki, na janchadan
(Mt 18.6-7, 21-22; Mr 9.42)

17 ¹⁻² Januxun Jesúsun jaki chiti ikabu besti yusinkin yuikin: —Tsuanda jaska shinanmabiaken yuda betsan jawada chakabu memakin mia beya wamanun, iwanan, jaska Diosun yunumis inun nemamis matu amakin chakabuwamisbuki. Jakia tsuabunda enabu juinti babubu padankin jatu chakabuwamamis jabudi Diosun jatu kupia nuitapajaidaxanaiwen taea jawen xekiwan deneti mishki ewapa nexaxun teumatan ianenwan medan pukua jasadán, jawen kupiti bexmas mekeanaii.

³ Jaskaken chakabuwakin man kanekatsi ikamadan, uindakanwen. Jamen ea ikunwain betsan kanekin mia chakabuwa dakeama kaxun xabakabi chitekin dakewawe. Min jancha pewen jawen chakabu min jakimawa jawen shinan betsa waya jawen chakabu ana shinanyamawe.

⁴ Jabias xabatian tsuanda 7ki mia chakabuwaxu jabiatikidi mia yuikin: “En ana kanexuki. Ana en jaskayamaxanun en chakabu ana shinanyamawe, nun ana sinatadabeyamanunan”, mia waya jabiatidiki jawen chakabu ana jabetan shinantimaki— jatu wa

Jawen tsumabun ana ikunjaidawati kushipa
ea anibukiaki, na janchadan

⁵ jawen tsuma kushipayabun Jesús ea akin yuikin:
—Nun mia ikunwanbiaya ana ikunjaidawati kushipa nuku inanwen— akabu

⁶ januxun Jesúsun jatu yuikin:
—Man ea ikunwainan, mostaza jexe pexeishta keska man jayaki. Jaska keska jayabun na ji yunukin: “Nenua min tacha betsekekain unu ian nemaki ni maewe”, man aka matu ninkatan itiduki— iwanan,

Jatun xanen ibuan yunua axunkin duawai kentimakidi
Jesúsun yusinikiaki, na janchadan

⁷ ana jatu yusinkin:
—Tsuada man dayaduya matun bai udutani kasmai matun chaxuwan inun ina awa matu mekexunbai jukidan jiwetan jikiai man yuikin:

“Tsauxun pidiyuwe”, akin ¿man yuimismen? ⁸Man jaska waismaki. Yuikin: “Badi kaya nun pinun bawa taewawe, ea dukun en piaya chipu min tadi betsa sawetan miandi min piaidan”, akin matun dayadu man pe yunumiski. ⁹Jaska yunua jawen tsumapan ninkakin pe akubainaiwen taexun jawen xanenibun jawen tsuma: “Peki”, aismaki. ¹⁰Matudan man jabiasyadi keskaki. Jaskaken jawada Diosun matu yunua atan ibubis keanma yuikin: “En xanenibun ea yunuas besti en akubainai. En jawen tsuma bestiki”, ikin jawada matu yunua ja besti shinankin axunkin ja dukun menexunkubainkanwen, jawa chikishamadan— jatu wanikiaki.

**Meken dabeti junibu bichiki chamini buisbuma
Jesúsun xuxawanikiaki, na janchadan**

¹¹Janua betsatian Jesús Jerusalénkidi kakunkaini Samaria mai pakea inun Galilea mai pakea ja dabe namakis anu kai ¹²mae betsa anu jikiaya ¹⁰junibu yudaki chaminibun Jesús bechitan benanta mapuxun ¹³jancha kushipawen yuikin:

—Jesús yusinaan, nukuwen nuiwe— akabu

¹⁴Jesús jatuwen nuikin uinkin jatu yunukin:

—Jerusalén anu buxun Diosbe nukunabu janchaxunikabu matun yuda uinmaditankanwen— jatu wa jawen jancha ikonwanbaini dabekebaini bukin jatun yudaki chamini ma xuxa ana chami jayama uianbun ¹⁵jabu bestichaitun jawen yudaki chamini ma xuxa uintan dabekekidan jui kushipawen Dios kenwain ¹⁶Jesúsunabuma Samaritanawabia Jesúsun besuudi danti iki beti ixun kenwanyan

¹⁷Jesúsun yuikin:

—¹⁰juni chaminibu en xuxawaxuki. ¿Chaniamen? ¿Janimen, ja ⁹juni Israelbudan?— ikin ¹⁸—Na nawan besti Dios kenwain chintunkidanxuki. Jawen tapinkanwen— iwanan, ¹⁹nawa danti ika yuikin: —Benitan inun kadiwe. Min ea ikonwainwen taea min xuxaxuki— anikiaki.

**Jaskai Dios xanen ibui ana juxanaikidi yusinikiaki, na janchadan
(Mt 24.23-28, 36-41; Mr 13.15-16)**

²⁰Januxun fariseobun Dios xanen ibui ana juxanaikidi yukabu Jesúsun jatu yuikin:

—Dios xanen ibuaidan, ikis beduwen man uintidumaki. ²¹Ja inun, tsuanda yuikin: “Uinwen. Dios xanen ibui naki”, ikasmai: “Uinwen. Unuki”, ikin yuiama ixankanikiki. Chanima en matu yuiiai. Dios xanen ibuidan, ikis matube dasia niaki, taeidan— jatu watan

²²Januxun jawen tsumabu beiskin yuikin:

—Eadan, matun Juchi Kayabi Iyua ea uinbianixun ana ea uinkatsis ibiakini man yane ana ea uianma ixankanai. ²³Man jaskaya matu padankin yuikin: “Nenu ma juaki, Cristodan”, ikasmai, “Unu ma juaki”, ikaibu ninkabiatan

jadi jatu chibanyamaxankanwen. ²⁴Jakia en matun Juchi Kayabi Iyua en ana eskakidaxanai matu yuinun ninkakanwen. Jawaida uke bukun kana bedi iki bakamis keskatan en ana juai dasibibun ea uinxankanikiki. ²⁵En jaskadiama ja dukun na jabiatian ea danankin yudabun bikajaida ea tenemakin ea nuitapawayuxankanikiki. ²⁶Jaska inun, Noé jiweken chakabui jiwekubainibu keskadiaibun matun Juchi Kayabi Iyua en ana chintunkidaxanai.

²⁷Eskanibuki. Jawen nunutiwen Noé jikidiamaken yudabun pikin mabex aki ainyankin jatun bakebu beneyawakin Dioskidi jawa shinanma jiwekubainibu Diosun yunua Noén chibain jawenabubes jawen nunuti menetan jikiaya jenen jatu achiaya Diosun yunua ninkaisbama jatumebi debui jasai keyunibuki.

²⁸—Jaska inun, jabiaskadiai Lot jatube jiwediaken chakabuwakubainmisbu Diosun jatu kupikin yamawani ana matu shinanmanun ninkakanwen. Jabun pikin mabex akin mabu bikin mabu inananankin bai waxun banakin jiwe wakubaini Dioski jawa dateama jiwekubainibun ²⁹Lot juni pepa jawen mae Sodoma anua Diosun paxa watan nai anua chi inun azufre ui keskai nidi ikin Sodomanawabu jatu yamawaniki. ³⁰Jabiaskadiai matun Juchi Kayabi Iyua en juai yudan kaianen ea shinankin manabumaken en jatu jabiaskadi wakin kupixanai.

³¹—En jatu jaska waxanaitian na mai bawa jiwe sapa xeni manaundi maniabudan, butuxun jawen jamapai bikatsis ibiakin jau jawen jiwe anu jikiama jau jawaida paxaxanunbunwen. Ja inun, ikunwain ja bai anu dayaibudan, meshu medan jatun bemakia tadi kextupa bikatsis ibiai jau ana chintunkidaxanama jau jabiadiadi paxadiaxanunbunwen.

³²Jamen betsadan, eskaniki. Shinankanwen. Lotin ain Sodoma anua jabe paxabiai jawen mabuwun nui jaskaimenkain uinun ika nasaukeai Diosun jabiadi damiwakin tewe wanidan, man jaskadiatiduki. Uindaxankanwen.

³³Jaskaken tsuabunda jawen jiwea yaushikin benuxankanikiki. Jakia tsuabuda ewen taea mawanun ika jawen jiweawen nuiama mawabudan, jawen jiwea benuama jiwekuinxankanikiki, niti ikamadan.

³⁴⁻³⁶Ja inun, betsadan, meshu medan jabis dakatiki dabe uxabu betsan ea chibanmis iyukin betsan ea chibainsma Diosun nai tsuman jenebainxanikiki. Ja inun, ainbu dabetan deneaibu betsan ea chibanmis iyukin betsan ea chibainsma jenediabainxanikiki— jatu wa

³⁷jaska yui ai jawen tsumabun ninkatan yukakin:

—Xanen Ibuun, dasibi min nuku yuiaidan, ¿jania jaskaxanimenkain?— akabu junea janchawen ana jatu yuikin:

—Janu yuda mawa daka pisi mayai xeten xetebidan janu ichai nuyabaunmis keskai ixankanikiki— iwanan,

Punu nukama Dios yukatikidi miyuiwen yusinikiaki, na janchadan

18 ¹Januxun jawen tsumabun Dios kushipa yukai jau punu nukayamaxanunbun miyuiwen Jesúsun jatu yusinkin ²yuikin:

—Mae betsa anu juez jiwexun Dioski meseama juni betsan jancha ninkaismadi³ jabias mae anua yuxabu jawen bene ma mawayama jau ea medabewanun ika juez anu kaxun yuikin: “Juni betsan ea ichakawakin padainkiki. Medabewakin ea pewaxunwen”, abidan abidankin chikish waya⁴ ja dukun jawen jancha ninkama ikunkainkin januxun atimas shinankin: “Yudabuwen nuiama Dioski en meseamabia⁵ natun ea daketapa wabidan wabidanaiwen taexun en nemaxuni kaih. En jaska waxunamaken jukidan jukidankin ea punu nukawatiduki”, ixun medabewaniki— iwanan,

⁶ ana Jesúsun jatu yuikin:

—Ja juez chakabun jaska wamisbun⁷⁻⁸ jamen Diosun nuku medabewakin jabun matu chakabuwakatsi ikaibu nemaidan, jawen shinan betsajaidaki. Jawen katuabu Diosun matu medabewakin badidi inun meshu medan man ea atan manaibu ninkatan manama jawaida jatu nemakin matu pewaxunmiski. Jaskawen taea ea matun Juchi Kayabi Iyua en ana juaitian jabun ea ikonwankin jenekubainabuma zen jatu bechitushixanimenkain?— iwanan,

Fariseo inun pei bixunikakidi Jesúsun miyuiwen jatu yusinikiaki, na janchadan

⁹janua ichapa mapuxun ninkaibukidi jabu jatidi ibubis kenkin shinain bepadamei: “Ea besti en pepaki. Jakia betsabudan, jaskaisbumaki”, ikin jatu dananmisbu Jesúsun ana miyui betsawen jatu yusinkin jatu dabinwankin yuikin:

¹⁰—Templo jemaintin anu juni dabe Diosbe janchai bua mapuabukidi matu yuinun ninkakanwen. Ja juni dabedan, betsa Moisin yusian inun jawen xenipabu betsabun yusian chibanjaidamis fariseoki. Ja inun, betsadan, Romanawa xanen ibu pei bixunikaki. ¹¹Jaskakain fariseo nia naiudi besuxun Dios dayuikin: “Diosuun, yuda betsabu keskama en pewen taexun en mia kenwaiin. Yumetsumisbu inun, padanananmisbu inun, chutanamebaunmisbu inun, ja pei bixunika chakabu en jatu keskamaki. ¹²Ja inun, semana tibi xaba dabe mia kenwain en samakemiski. Ja inun, jamapai dayakin bixun meken dabeti paxkatan bestichai min kenwanti jiwe mekenikabu en inankuinmiski”, iki ibubis keanyan ¹³janua ja Romanawa xanen ibu pei bixunika jawa keanma benanta nidiaxun jawa naiudi besuama dakei aitin iki xutidin xutidin ikin yuikin: “Diosuun, min jancha en kanemisbiaken ewen nuikin en chakabu ea buaxunwen”, ¹⁴abaini inun kaya Dios jawen nuikin jawen chakabu buaxunkin pewaxunimaki. Jakia fariseon jancha ninkama Diosun jawa buaxunama ikimaki. Jaskaken tsuabuda ibubis kenmis Diosun dake waxanikiki. Jakia tsuabuda keinsma Diosun duawaxanikiki— jatu wa

**Bake mishtinbu unanuma wakin Jesúsun Dios jatu
yukaxunikiaki, na janchadan
(Mt 19.13-15; Mr 10.13-16)**

¹⁵janua jatun bake mishtinbu Jesús anu iwekin jau ea mamepikin uinxunkin Dios ea duawamaxunun, iwanan, jabun jatun bake

iwebidanbidanaibu Jesúski chiti ikabun uinkin jatu nemaibun
¹⁶nantaxun jatu jaska waibu Jesúsun jatu kenaxun yuikin:

—Jatun bake mishtinbu ea anu iweaibu jatu nemayamakanwen. Dios xanen ibuaitianan, na bake mishtinbu eki dateabuma keskabu besti Dioski dasixankanikiki. ¹⁷Chanima en matu yuiai. Bake mishtinbun jawen ibu bechipaimis keska wakin Epa Dios bechipaibuma Dios xanen ibuaitian jaki dasiama ixankanikiki— jatu wa

Juni xanen ibu mabu ichapaya Jesúsbe janchanikiaki, na janchadan
(Mt 19.16-30; Mr 10.17-31)

¹⁸januxun xanen ibu betsan Jesús yukakin yuikin:

—Yusinan pepaan, ¿mia yukapa? Jiwea kayabi bikinan, ¿jaska kayatan en bitidumen? Ea yuiwe— aka

¹⁹Jesúsun yuikin:

—¿Jaskakin ea kenakin: “Pepaan”, min ea wai? Dios bestiki, pepadan, ¿min unanmamen? ²⁰Mianan, Diosun yunuti inun jawen nemati min ma unaiinan: “Ainbu min ainma chutatimaki. Sinatakin yuda betsa tenantimaki. Yumetsutimaki. Yuda betsaki chanichakatimaki. Padananantimaki. Ja inun, min epa inun min ewa jatu duawakubaintiki”— aka

²¹jaska wa ana xanen Ibum Jesús yuikin:

—Jaa. Dasibi Diosun yunuti inun jawen nemati bakeishtatun tapinixun jeneama en chibankubainmiski— aka

²²ninkatan Jesúsun uin jawen nuikin ana yuikin:

—Min pe ea yuiiai. Na besti min shinandiamaki. Mia yuinun ninkawe. Nai anua Diosun manakuti pepa bikatsis ikin min jawada dasibi min jaya jatu inan keyutan ja pei min bishian ja nuitapaibu inankuintan chintuanma ebe kakin ea chibankubainxanwen. Min jaskakunkainaiwen taexun jiwekuian min bixanai— aka

²³jakia juni mabujaidayatun Jesúsun jaska yuiiai ninkai pes juinti nishmai keyutan ana jawa yuiama jawen mabuwen nuiaya ²⁴⁻²⁵Jesúsun uinkin ana yuikin:

—Ja yuinaka ewapa camellodan, ja xumux jawen chixuiki jawen yuda kainmakinan, tsuan atidumaki. Jakia jaska keska bikadan, juni mabu ichapayadan, jawen mabu besti shinain jawen nuikin jatun shinan betsa wama Dioski chiti itidubumaki— jatu wa

²⁶januxun jabun Jesúsun jancha ninkatan yukakin:

—Jaskakenan, ¿tsua Diosun nuku mekekin paxawakin jiwematidumen?— ikaibun

²⁷Jesús jatuwen nuikin yuikin:

—Dateyamakanwen. Yudabun jaska watidubumajaidabiaken Diosun besti matun shinan matu betsa wamatan dasibi matuwen nuikin matu axuntiduki— jatu waya

²⁸Pedron yuikin:

—Xanen ibuun, nukunan, mia chibankatsi ikinan, nukun jawada nun jaya dasibi bashikin keyubidanimaxun nun ma mia chibanpakeaii— akaya

²⁹Jesúsun ana jatu shinanmakin yuikin:

—Chanima en matu yuiyai ninkakanwen. Tsuabunda ea chibankin Diosun jancha kakape yusintanun, ixun matun jiwe xununkin matun ibu bu xununkin matun betsabu bashibainkin matun ain xununyubainkin matun bakebu bashikin keyuyubainxanaibu ³⁰na jabatiandi dayaibu Diosun pepawen matu duawakin manakukubainshinxun jabiaskadi wakin nai anudi matu jabe jiwekuimmaxanikiki, ikibi imakinan— jatu wabaini

Mawaxanaikidi dabe inun bestiki Jesús jatuki chanikiaki, na janchadan
(*Mt 20.17-19; Mr 10.32-34*)

³¹Januxun jawen 12 tsumabu besti jatu kenaxun Jesúsun jatu tadi iyuxun yuikin:

—Jerusalén anu nun ma mapekei kaidan, man unaiin. Nun janua jaskaxanaikidi matu yuinin ninkakanwen. Diosun jancha yuixunikabun ea matun Juchi Kayabi Iyuakidi ekidi kenenibu menekin ea axankanikiki.

³²Januxun eki sinatakin ea achixun nawabu anu ea iyuxun inanbu jabun ea chitekin ichakawakin eki kaxekin eki kemu michukin ³³ea kusha kusha axun ea tenanbu xaba dabe inun besti kaya en ana bestenxanaii— jatu wabia ³⁴jawen 12 tsumabun jawen jancha ninkabiakin jawa jatu yuiyai dabanen jawa xabakabi ninka pewatiduma ibainaibun

Jericó bai kexakea juni bekun Jesúsun bepexnikiaki, na janchadan
(*Mt 20.29-34; Mr 10.46-52*)

³⁵janua Jerusalénkidi kai maewan betsa Jericó anu kemaya bai kexa juni bekun tsauxun pei jatu ea akin ninkaya ³⁶yuda ichapabun dainbainaibu ninkatan yuka ikaya ³⁷betsabun yuikin:

—Jesús Nazaret anua kauani ikikiki— akabu ³⁸jancha kushipawen yuikin:

—Davidin babaan, ewen nuiwe— akaya ³⁹bebubainkin nemapaibiabu ninkama unanxubima jatu binumakin yuikin:

—Davidin baba Jesúsun, ewen nuiwe— ikaya

⁴⁰Jesús niti itan junibu jatu yunukin:

—Iwekanwen— jatu wa iweabu chaimaxun yukakin:

⁴¹—¿Mia jaska wapa?— aka juni bekunman yuikin:

—Xanen Ibuun, ana en uinun ea bepexwe ika en ikaii— aka

⁴²xuxawakin Jesúsun yuikin:

—Ana uindiwe, min ea ikunwainwen taea min xuxaidan— akaya

⁴³jawaida bepexetan Dios kenwankin Jesús chibanbainaya ichapabundi Jesúsun jaska wai uintan dasibibun Dios kenwanbainaibun

Jesús Zaqueoki nukunikiaki, na janchadan

19 ¹Janua Jericó baiwen Jesús jikikaini mae kapukekainaya
²jabianudi juni betsa mabujaidayatun Roma pei bixunikabu jatun
xanen ibu jawen kena Zaqueon ³Jesús uinkatsis ibiaya juni ichapabube
Jesús kaya Zaqueo juni chanpaishtatun jaska waxun uintima ⁴Jesús
uinun ika bebui kushikain jiwen ina tsauken ⁵Jesús jukin manaundi
uinkin Zaqueo bechitan yuikin:

—Zaqueoon, min jiwe anu en uxai kakatsis ikaii. Menan butudiwe— aka
⁶janua jawaida butukidan benimakin jawen jiwe anu Jesús inun jawen
tsumabu itan iyuaya ⁷jaska wabainai dasibibun uintan Jesús yuankin:
“Juni chakabu anu uxai kaxuki”, ikaibun ⁸januxun Jesúsun jancha
ninkakin jawen shinan betsa watan Zaqueo benitan Jesús yuikin:

—Xanen Ibuun, en jatu jaska waxanai ninkawe. En mabu inun en pei
tanatan dabukun ja nuitapaibu en jatu inanbauntidu en shinaiin. Ja inun,
tsuabuda jatu padanxun jatun jamapai en bianmis dabe inun dabeki en
ana jawendi en jatu inanxanaii— akaya

⁹⁻¹⁰ Jesúsun yuikin:

—Eadan, matun Juchi Kayabi Iyuatun juni chakabu benua keska
benabaunkin medabewanun ika en juniki. Na jabiatian na jiwe anu
matun mekenan ma matu anu jikixuki. Jaskawen taea min shinan betsa
waya Diosun minabube mia mekekubainxanikiki. Jaska Abrahamnen
ikunwanpauni keskakin ikunwain min ma Abrahamnen baba
kayabiki— akaya

Pei jexekidi miyuiwen Jesúsun jatu yusinikiaki, na janchadan

¹¹yuda ichapabun Jesúsun yusiain ninkakubainkin shinankin:
“Jerusalén anu kematan nawabu nichintan Dios samama xanen ibujaidai
kaimenkain”, iwanan, yuiabuwen taexun ¹²jabun shinan Jesúsun
unantan jatu pewanun, ixun miyuiwen jatu yusinkin:

—Xanen ibu bexmasbiaken jau mae ichapa xanen ibujaidaxanun,
iwanan, xanen ibu kushipa binuatun kena ka ja xanen ibu bexmas
katanima matu yuinun ninkakanwen. ¹³Chai mae betsa anu kadiama
jawen ¹⁰dayaxunikabu kenaxun pei jexe ichapajaida ja tibi jatu inan
akeaketan jatu yunubainkin: “En judiama na en peiwenan, jamapai
tibi bitan jawen inananankin ana binumaxankanwen”, jatu watan chai
kaimaken ¹⁴januxun jawen maewan anuxun jawenabun ja xanen ibu
bexmas danankin bechipaiabumawen taexun jawenabu betsabu yunukin
yuikin: “Xanen ibujaida binuatun jiwe anu kaxun ja juni jau nukun xanen
ibu iyamaxanun yuitankanwen”, jatu wa buimaxun jaki nukutan yuiabu
¹⁵jabun danankin jaska jakidi yuibiaibun ja xanen ibujaida binuatun
ja juni jawenabun bechipaiabumabiaken jau jabun xanen ibu inun

jatu katuxunshinken chintunkidan jikixun ja jawen 10 dayanikabu kenaxun ja pei jatu inanbainimakidi jatu yukakin: “¿Jati man ana ea ichawaxunshinamen?”, iwanan, bestibu tibi jatubetan pewanun, iwanan, jatu kena ¹⁶ja dukun juxun yuikin: “Xanen ibuun, min pei jexe ichapa inananankin ana midimajaida 10tiki binumakin en mia ichawaxunshinaki”, aka ¹⁷jawen xanenibun yuikin: “Pejaidaki. Min en dayanika pepaki. Eskadabes min pe mekeshinawen taea mia manakukin 10 mae jati mekei ea xanen ibuxunyuwe”, akaya ¹⁸ja kachu jawen dayaxunika betsa juxun yuikin: “Xanen ibuun, min pei jexe ichapa inananankin ana 5tiki binumakin ichapa en mia ichawaxunshinaki”, akaya ¹⁹jadi yuikin: “Jaskakenan, miandi 5 mae jati mekei ea xanen ibuxunyuwe”, adiaaya

²⁰janua jawen dayanika betsadi danas inanbainima juxun yuikin: “Xanen ibuun, naki, min peidan. Benukatsi ikama dakutan en mia aduxunimaki. ²¹Min juni meseken miwen datekin min pei benukatsi ikama tadi tuaxwen yabutan en mia aduxunimaki. Dayakin jawa miban banamabia min ichawamiski. Janua jexe sa akamabia min ichawadiamiski”, akaya ²²januxun xanenibun yuikin: “Min en dayadu chakabu chikish chakamaki. Chanima dayakin jawa miban banaumabia en ichawamiski. Ja inun, jexe sa akamabia en ichawadiamiski. Ja unantan ²³¿jaskakin banco anu cuenta watan inananankin en pei min ea aduxunama ikimamen, janua ibubis juxun en pei xekei ana jaki ichashina en biyuxanunan?” atan ²⁴jawen dayadu betsabu mapuabu jatu yuikin: “Ja chikishin pei mebintan ja 10tiki binumashina ana ichawamakanwen”, iwanan, ²⁵jabun jatun xanenibu yuikin: “Ma 10 binujaida jayaki. ¿Jaskakin min ana pei inain?” aka ²⁶xanenibun jatu yuikin: “Tsuada na en dayadu pepa keskatun jawada jaya pe mekea unantan ichapa jayabiaken manakukin ana ichapajaida en inanxanaii, binumakinan. Jakia tsuada na en dayadu chikish keskatun jawada jaya pe mekeama ja eskadabes jaya unantan en mebinxanaii. ²⁷Ja inun, jabu eki sinatakin jau jatun xanenibu en iyamaxanun, jabun ea bechipaiama danainmabudan, itanxun en besuubi jatu tenankanwen”, jatu akimakiaki— Jesúsun jatu wabaini

Jerusalén anu Jesús jikinikiaki, na janchadan

(Mt 21.1-11; Mr 11.1-11; Jn 12.12-19)

²⁸januxun jatu jaska yusinbaini kaya yuda ichapabun Jesús chibanbainibun Jesús Jerusalénkidi ana kai ²⁹Betfagé inun Betania ja mae dabe anu kemai Olivos Mati tetanbainkin jawen tsuma dabe yunukin ³⁰yuikin:

—Ja mae besuudi kayanbis buxun burro nexea tsua jaki katsaumediama bechitan tepetan beyutankanwen. ³¹Ja inun, tsuanda

matu yukakin yuikin: “¿Jawakatsi man tepeai?” matu wa yuikin: “Nukun xanen ibun biyukatsis ikikiki”, atankanwen— jatu wa

³²ja dabe buxun burro nexea bai namaki nia bechitan tepeaibun
³³jabianudi burro ibubu manixun jatu yukakin:

—¿Jaskakin man burro tepeai?— jatu wa ³⁴jabun yuikin:

—Nukun Xanen Ibut biyukatsis ikikiki— akabu —Peki.

Buxunditankanwen— jatu wa ³⁵tepetan januxun jatun bemakia tadi burro kamaki kabekanbain Jesús anu butan Jesús jaki tsauanbu
³⁶katsaumekainaya jatun bemakia tadi bai namaki nabekanbainabun

³⁷Olivos Mati butebidani jaki chiti ika ichapabun Jesús chibankin Jesúsun atimaska betsa betsapa wai uinkubidanshinabuwun taea benimakin jui kushipawen Dios kenwain nawakin ³⁸yuibainkin:

—Aichu! Aichu! Ja Xanen Ibu Diosun kena kushipaya juaidan, benimakin kenwanankanwen. Naiudia unanuma jiwea inun kushipa binu keyua unankin jau kenwanunbunwen— ikubainabun

³⁹jabianudi fariseobu jatube bui sinataibun betsan Jesús jatu yuixunkin:

—Yusinaan, miki chiti ikabu jaskaibudan, jatu nemawe— aka

⁴⁰Jesúsun jatu yuikin:

—Chanima eki chiti ikabu neseaibun na mishkipan ea kenwain sai itidubuki— jatu wabaini ⁴¹Jerusalénki kemakin uinkubaini ja maewan Jerusalén anu jiweabuwen nui kaxakin ⁴²yuikin:

—Jawen Dios daewati man ea unanyan matu kupiama ikeanxankanikiki. Jakia natian ikunwanbumawen taexun junea keskaken shinankin man ana uintidubumaki. Man peidawa! ⁴³⁻⁴⁴Jaskaken Dios matu anu bai juai man jawa ikunwanmawen taea matuki sinatamisbun matu ichakawakin matu nuitapawakin matun mae dapi mai kene keyatapa wabaunkin matu keben keyutan man ana kaintiduma watan matuki sinataibun matun maewan mishki kene nidi akin keyukin matu inun matun bakebu detekin matun mae yamawaxankanikiki, jawa texe wamadan— ikunkaini Jerusalén anu jikitan

**Templo jemaintin anua inanananmisbu Jesúsun
 nichinikiaki, na janchadan**

(Mt 21.12-17; Mr 11.15-19; Jn 2.13-22)

⁴⁵janua janu Dios kenwanti Templo jemaintin kenekauna anu jikikainkin januxun jawen Dios daewati ina janubia inananainbu jatu nichinkin ⁴⁶yuikin:

—Jawen Templokidi jawen jancha yuixunika Isafás kenemani matu yuinun ninkakanwen: “En jiwedan, janua ebe janchakin ea kenwanxankanikiki”, Dios ibianiken na jiwe xabatududan, janua matu padananankin yumetsun jiwe man wamisbuki— iaketankin jatu nichin keyutan

⁴⁷Januxun xaba tibi Templo jemaintin anuxun Jesúsun jatu yusinkubainaya Diosbe nukunabu janchaxunikabu xanen ibubu inun, Diosun jancha kenenibu yusinananmisbu inun, judiobu xanen ibu betsa betsapabun Jesús jaska datanai detenun ika yuinamebiakubainaibun ⁴⁸yuda ichapabun Jesúsun yusiain bechipaikin ninkajaidaibuwen taexun jaska waxun tenantima bika tenenibukiaki.

¿Tsuana mia kushipa inainma min aki ikai? akin Jesús yukanibukiaki, na janchadan
(Mt 21.23-27; Mr 11.27-33)

20 ¹Januxun xaba betsatian Templo jemaintin anuxun Jesúsun yuda ichapabu kakape yuikin jatu yusianyan Diosbe jawenabu janchaxunika xanen ibubu inun, Diosun jancha kenenibu yusinananmisbu inun mae xanen ibu bexmasbun Jesús nemanun ika jaki kemaxun ²jabun yukakin:

—Na min eska waidan, ¿tsuana jawen kushipa mia yunuimawen min aki ikai? ¿Tsuana jawen kushipa mia inainmamen, min jaska wanunan?— akabu

³Jesúsun jatu kemakin:

—Entsedi en matu yukai ea yuikanwen— itan ⁴—Nashimanika Juanen jau jatu nashimanun yunukinan, ¿tsuana kaya yunuyama man shinain, Diosdaka, junibudaka? Ea dukun yuikanwen— jatu wa

⁵janua jabudi june yuinamekin:

—“Diosun yunuyamaki”, nun wadan, “¿Jaskakin Juanen jancha man ikunwanma ikimamen?” iwanan, nuku kunyan atiduki. ⁶Jamen yuda midimabun Diosun Juan yunuyamakidi jabun ikunwainbuwen taea jabuki datekin yuikin: “Junibun yunuyamaki”, nun ikaya mishkiwen nuku tsaka tsaka akin nuku tenantidubuki— itan ⁷januxun jabun Jesús yuikin:

—Tsuanda Juan yunuyama nun unanmaki— akabu ⁸Jesúsun jatu uidiakin

—Jaskakenan, tsuanda jawen kushipawen ea yunuimadan, eandi en matu yuiamaki— jatu watan,

Dayakapabu mekenan besumakidi Jesúsun jatu yusinikiaki, na janchadan
(Mt 21.33-44; Mr 12.1-11)

⁹Januxun yuda ichapabun Jesús ninkanun ika beabu miyuiwen Jesúsun ana jatu yusinkin:

—Juni betsan bai waxun uva bimi batapa banatan jau bimi dabukun ea inanxanunbun, iwanan, juni betsa dayakapabube jabube yubakatan ibu keska wakin inanyubaini chai kaimaken ¹⁰janu ma kani tsekatitian

ikaya bai ibuan jawena dabukun jau yukatan ea bixuntanun, iwanan, jawen tsuma betsa yunua ka jabun jawena inankatsi ikama uva bimi mekeabun achixun kusha kusha axun jawa inanma mais nichianbu kaya ¹¹januxun bai ibuan ana jawen tsuma betsa yunudia ka jadi inanxunkatsi ikamadi jabun kunyan akin kusha kusha adiatan jawa inanma mais nichindiabu kaken ¹²janua bai ibuan jawen tsuma betsa yunua ka jabiaskadi wak in deda deda atan kene pechiudi putabu isin tenei kaken ¹³atimas bai ibuan shinankin: “¿Jawa jaska waxanpa?”, itan “Jaskakenan en juni bake en bechipajaidai en yunua ka jaki mesekin en bimi dabukun ea inanxankanimenkain”, iwanan, shinantan nichian kai ¹⁴jawen bake jatuki kemai kai bechitan yuinamei: “Bai ibu mawashinken na jawen baken jawen bai tibi inun jawen jiwe tibi dasibi jawenawayuikiki. Na bai nukunas nun wanun tenanankanwen”, ixun ¹⁵achibain bai nekixun tenanbun ¿jaska washinabun ja bai ibuan jaskada jatu waxanimenkain? Matu yuinun ninkakanwen. ¹⁶Bai ibu kaxun jatu kupidiakin dayakapabu jatu tenan keyutan januxun dayakapa betsabu jawen bai jatu yunuxanikiki— jatu wai ninkai e itan yuikin:

—Jau jatu jaska wayamaxanunwen— ikaibu ¹⁷Jesúsun jatu beiskin yuikin:

—Ja Diosun jancha Isafasin kenenidan, ¿jaskada jakidi man shinanmismen?, eska yuinidan: ‘Jiwe wanikabun mishki dananbiaibun jabias mishki Diosun bixun dexun makedex wak in kene mestenwan keska wak in nuku duawakin nuku axunxanikiki’,

anidan. ¹⁸Eskaki, ninkakanwen. Tsuada ja mishkiki sinatakin ea maemanun ika mishki mamaki kauana teke teke ika itiduki. Jakia ja mishki jadatukida kauani jaki tin ikin chushakin mishpu waxanikiki— jatu waya

¹⁹januxun Diosbe jawenabu janchaxunika xanen ibubu inun Diosun jancha kenenibu yusinananmisbun Jesúsun dayakapabu chakabubukidi miyuiwen jatukidi janchai jabun ninkakin unantan jaskaitian Jesús achikatsis ibiai yudan kaianki datekin jawa meama mapuxun uinkin

Gobierno pei bixunmisbukidi Jesús yukanibukiaki, na janchadan
(Mt 22.15-22; Mr 12.13-17)

²⁰jaskawen unanti watan chitetan romano xanen ibu Pilato anu ja amakatsi Jesús padanun ixun juni betsabu Jesúsun unandiana judiobun jatu yunukin jau juni pepa itsakin jabun unanti watan Jesús yukakin yuimakatsi nawa xanen ibu jau achimaxanun yunuabu ²¹Jesús anu buxun padanpaikin yuikin:

—Yusinaan, junibun jatu kenwanmamisbu keskama chanima jancha besti yusinkin jaska wak in Dios chibantidubu besti min xabakabi jatu yusinkubainmis nun unaiin. ²²Jaskawen taexunan,

¿Jaskada min shinainmenkain mia yukapa? Ja romano xanen ibu Césarn nuku pei yukamisdan, ¿jaska wanaxanpa? ¿Pakananxanpa? ¿Pakatimadaka?— aki

²³jaki bepadamebainabu Jesúsun unankin jatu yuikin:

—¿Jaskakin man ea padankatsis ikanai? ²⁴Jawen gobierno impuesto pakati pei jexe betsa ea uinmakanwen— jatu wa bexuanbu uinkin Jesúsun jatu yukakin: —Nadan, ¿tsuan besu inun tsuan kena neamen? Ea yuikanwen— jatu wa jabun yuikin:

—Romano xanen ibu Césarnaki— akabu ²⁵Jesúsun jatu yuikin:

—Césarnawen taexun matun xanen ibu César duawakin jawen gobierno dayaxunmisbu pei jatu inanxunkubainkanwen. Jakia Diosdi duawakin jawen yusian chibankin jawada bechipaia axundiakubainkanwen— jatu waya ²⁶yudan kaianen ninkaya jabun achikatsis ikin unanti wabiabu jaska waxun padankin kanematima nawabun ninkatan min atidumaya Jesúsun janchawen e itan jaska watima pes paubun

**Ana bestenxanaibukidi saduceobun Jesús
yukanibukiaki, na janchadan
(Mt 22.23-33; Mr 12.18-27)**

²⁷Janua saduceobu judiobu paxka betsa: “Ja mawabu jawen yuda tsua ana besteinsmaki”, imisbu Jesús anu jabudi bexun yukakin:

²⁸—Yusinaan, Moisin nuku kenexuntanan, eska nuku bashixunbainiki: “Juni betsa ainyantan juni bakeyadama mawaken janua jawen betsan ain janubi ainwantan juni bakewaxuntiki, jawen betsa mawaimatun kena dabikinan”, nuku waniki. ²⁹Jaskakidi ja jawen 7 betsabukidi mia yuinin ninkawe. Ja dukun iyuatun ainbu betsa ainwanxun juni bakewadama mawaken ³⁰ja kachukeatun jawen betsan jabias ainbu ainwanxun juni bake wadiamadi mawaken ³¹ana ja kachukeatun jawen betsan ain jabiadi ainwadiatan juni bake wadiamadi mawaken janua ja 7 jawen jenekin jabias ainbudi bixun jabu tibibun jawa juni bake bawabuma mawai keyuabun ³²janua jawen jenei ainbu juni bake biamas mawadianiki. ³³Ja jaskanibudan, mawabu ana besteainbutianan, ¿ja ainbu bestichai ja juni 7bun ainwanibudan, jadatutun kaya ana ja ainbu bixanimenkain?— akabu

³⁴Jesúsun jatu kemakin:

—Na jabiatian beneyai inun ainyain man jiweabuki. ³⁵Jakia Diosunabu kayabi ana jatu unanti wakin besten waintianan, jabe jiwei jau benimai jiwununbun Diosun junibu inun ainbu jatu bestenwanan, jadia ana ainyain inun beneyama ixankanikiki. ³⁶Janua Diosunabu kayabi ana besteanbuwen taea Diosun nai tsumabu keska beneuma inun ainyuma jiwexankanikiki, ana mawamadan.

³⁷Mawakubainaibu ana bestenxanaibukidi Moisin yusini matu yuinin ninkakanwen. Ji maxu kua jede ji ikai anuxun mawanibu ana jatu bestenwain

kakatsi ikin Diosun Moisés yuia kenekinan, eska waniki: “Eadan, natian en Abrahamnen mekenikaki. En Isaacun mekenikaki. En Jacobun mekenikadiki”, ikai ninkayamaxun Moisin kenenidan, ¿man uinkin yuismamen? ³⁸ Diosdan, mawabunamaki. Jakia jiweabunaki. Jaskaken Abraham inun Isaac inun Jacob jatun yushin jiweabuki. Chipu ana yuda bena Diosun jatu inanxanai shinanma man kanejaidamiski— jatu waya

³⁹janua Diosun jancha Moisés yusian kene ni yusinananmis betsabun Jesús yuikin:

—Yusinaan, min pe jatu yuixuki— akaya ⁴⁰januxun tsuan ana jawa betsa yukabumaken

Mesíasiki Diosun jatu yukanikiaki, na janchadan

(Mt 22.41-46; Mr 12.35-37)

⁴¹ja unanepabu jabu mapuabu Jesúsun jatu bepuxumakin yukakin:

—Diosun jancha kenenibu yusinananmisbun matu yusinkin yuikin: “Mesías Cristodan, Davidin baba ixanikiki”, ikin ¿jaskakin matu jaska yusinmisbun? ⁴²⁻⁴³Nukun xenipabu pepa Davidin Salmos anu kene ni matu yuinun ninkakanwen:

‘Dios kushipa dasibi binuatun en xanen ibu Mesías yuikin:

Miki sinataibu en jatu maemadama manai en yusiudi tsauyuwe’, aniki. ⁴⁴“Mesías en xanen ibuki”, Davidin abianiken ¿jaskatan jawen xanen ibu janubi jawen baba itidumen? Ea yuikanwen— jatu wa jawa yuiabumaken

Diosun jancha kenenibu yusinananmisbu Jesúsun jatu chitenikiaki, na janchadan

(Mt 23.1-36; Mr 12.38-40; Lc 11.37-54)

⁴⁵yudan kaianen Jesús ninkadiaibun jawen tsumabu Jesúsun yuikin:

⁴⁶—Diosun jancha kenenibu yusinananmisbudan, jatu uindakanwen. Jatun tadi chaipa jawendua sawea mae jemaintin ewapa plaza anu en kauanai ea bechipaikin ea kenwankin jau jancha pewen ea duawanunbun ika mapumisbuki. Jaska inun, janu ichati jiwe anu jikikain jaki tsauti pepa janu dasibibun jatu uintidubu anu tsaukatsis imisbuki. Ja inun, ichatan pinun, iwanan, janu xanen ibubu dakai baxti ixun pimisbu benadiamisbuki. ⁴⁷Jaska inun, ainbu jawen benen xununitun jawen jiwe bianun, ixun, ainbu padain bepadani Diosbe janchai chaipajaidakubainmisbuki. Jaskamisbuwen taexun jabu Diosun jatu kupijaidaxanikikiki— itan

Ainbu nuitapaitun inankuinkin pei ichapayabu binunikiaki, na janchadan

(Mr 12.41-44)

21 ¹Templo jemaintin anu tsauxun Jesúsun uianyan pei ichapayabun ja jakia nuitapaibu medabewati bauki inankuin

nanekin mistubainbainaibun ²ja jaska waibu uianyan ainbu beneumadi nuitapabiai juxun pei jexe dabe jawa damajaida nanekin mistuaya ³Jesúsun jawen tsumabu yuikin:

—Chanima na beneuma nuitapaitun jawen pei inankuin nanekin dasibi pei ichapayabu jatu binumakin keyuxuki. ⁴Eskaki, matu xabakabi yuinun. Ja junibu pei ichapayabun jatun pei paxkaxun texe besti inankuinkanxuki. Jakia ja ainbu nuitapaitun dasibi jawen jawada biti pei inankin keyuxuki— jatu watan

Dios kenwanti jiwe tekei pudekei keyuxanikidi Jesúsun jatu yuinikiaki, na janchadan
(Mt 24.1-2; Mr 13.1-2)

⁵janua jemaintin anu mapuxun Templo inun ja mishkipanwanwen jiwe wakin jawenduawanibu inun inankuinti jamapai shadabuwen dau wanibu uin jawen tsumabu bestibu jakidi janchaibu ninkakin Jesúsun yuikin:

⁶—Na jiwe man uiainan, jawenduabia jabanu mishki betsa ana matsanmanama dasibi ja mishki jiwe tekekin pudekin keyuxankanikiki— jatu wa

Jaska tashinun badiai bebunkidi Jesúsun jatu yusinikiaki, na janchadan
(Mt 24.3-28; Mr 13.3-23)

⁷jawen tsumabun yukakin:

—Yusinaan, ja mishki jiwe tekei pudekei keyuxanai min nuku yuixudan, ¿mia yukapa? ¿Ma janu kema taei jaskai nun unantidumenkain? Nuku yuiwe— akabu

⁸Jesúsun jatu yuikin:

—En ana judiamaken jaskai nuitapai taexanaibu Diosun yuini eskaxankanikiki. Xabakabi matu yuinun ninkakanwen. Ma en janu jua kemaya juni betsabu bexun yuikin: “En Diosun Mesías Cristoki. Ea ninkakanwen”, ikaibun betsabundi yuikin: “Cristo dama juikiki. Matu uinmanun ea chibankanwen”, iwanan, yuiaibu jatu ninkayamaxankanwen, jau matu padanyamanunbunan. ⁹Ja inun, yudabu nuitapai taeaitianan, detenamei kakaibu ninkabiai e iki jawa dateyamaxankanwen, jaskaibutian en juamakidan— iwanan, ¹⁰ana jatu yuikin: —Ja yudabu nuitapaibutianan, nawa betsa betsapa nawa betsabube detenameaibun ¹¹mai pacha sakua akeakeaya piti jayama buni teneaibun isin betsa betsapa mae tibi anuxun tenea akeakeaibun nai anua jawen unanti mese jaska taxnisma uiainbun janu en judiama ixanaii.

¹²Jakia na dasibi eskaxanai idiamaken man ea chibankubainaibuwen taexun matu ichakawakin matu achitan ichati jiwe anu matu yunuabu januxun bichiti jiwe anu matu bichitan xanen ibu betsa betsapa anu

matu iyuabu jabun betsabu matu ekidi yuimaxankanikiki, man ea chibainbuwen taexunan. ¹³Matu jaska wabiabu kakape ekidi man jatu yuixanaii. ¹⁴⁻¹⁵Man jaskaibu ean matu medabewakin jancha pe yuiti shada en matu inan jawen unanepakin ja matuki sinataibun ninkakin jawa ekidi chakabu yuiama inun matu nematidubuma ixankanikiki. Jaskaken jawa dateama “¿Jadakidi yuixanpa?” ikin bebunkidi shinanyamaxankanwen.

¹⁶⁻¹⁷Ja inun, ea chibankin man ekidi yusinkubainaibu yuda midimabun matu danain janubi matun ibubu inun matun betsabu inun matun puibu inun matunabu betsabu inun matun jaibuaibun matu danankin jabun nawabu matu achimaxun betsabu matu jatidi tenanmaxankanikiki. ¹⁸Matu jaska wabiabun Dios matu jakimamajaida ixanikiki. Matu jaska waibuwen nuiyamaxanwen. ¹⁹Ja inun, tsuabunda ea chibain chintuanmawen taexun janu kupititan en matu piskumaxanaii, matu kupiamadan.

²⁰Ana betsadan, nawa soldadobu Jerusalén mae kexebaunabu uinkin jawaida jatu yamawaxanaibu man unanxanaii. ²¹⁻²²Ja inun, Diosun jancha yuixunikabun Diosun Jerusalén kupixanaikidi kenenibu samama keyunun badiyuai unain Judea anuabu mati keyatapa anu jau paxaxanunbunwen. Ja inun, Jerusalén anuabu jau taxnidiabainxanunbunwen. Ja inun, bai anu dayaibu jatun jiwe anu ana beama jau paxadiaxanunbunwen. ²³Nukun maewan jidabi anuabu yumainbutianan Dios danainbu jatuki sinatakin Diosun jatu kupiaya betsa betsapa teneabun tuyabu inun ja jatun bake chuchu amamisbudan, nuitapajaidaxankanikiki. ²⁴Ja inun, detenamekin nupe chaipawen betsabu detekin jatidi tenantan betsabu achixun tsuma waxun mai pakea betsa betsapa anu jatu iyuaibun Diosun nawa kushipabu jatu nemakin yamawadiama jabun Jerusalén anuabu ichakawaxankanikiki— iwanan,

Nukun Juchi Kayabi Iyua juidan, eskakidanun badikiaki, na janchadan
(*Mt 24.29-35, 42-44; Mr 13.24-37*)

²⁵⁻²⁶Jesúsun jatu yuikubainkin

—Januxun Diosun badi inun uxe inun bishi betsa betsapa taxnimatanaya mai anu nawa xukua tibi jiwea akeabu jaskai tsuan ninkaisma betsajaidai ianenwan tunkax ikaiwen date paepai unanyamasi jawa dabanen ninkai mese chakayamaibun jabiatandi nai anua betsa betsapai nai chuduankin taka taka akaya ja yudabun shinain: “Ma nuku yamawaikiki”, ixankanikiki. ²⁷Ja jaskaibun en matun Juchi Kayabi Iyua xanen ibui kushipajaidai chaxajaida nai anua nai kuin medanua en juai uinxankanikiki. ²⁸Jaskai taeaya man jawawen ana jawa teneama samama en matu pepawen jiwemayuai unantan benimajaidai naiudi teskantan uinkin ea bechixankanwen— iwanan,

²⁹miyuiwen jawen unanti jatu yusinkin:

—Jiwen man unantidubukidi matu yusinun ninkakanwen. ³⁰Ja ji mebi jawen pei petakatan ana pei bena jui metubistan peiai uinkin ma badi kemai man unanmis ³¹keskai jawada en matu yuixu ikai bechitan en samama xanen ibui juai man unanxanaai. ³²Ja inun, yudabu dasibi jiwebaunabu yamadiabuma chanima dasibi en matu yuixu jaskai taexankanikiki. ³³Jakia jabiaskadiai nai anua inun mai anua Diosun damiwani jabu keyuxankanikiki. Jakia en janchawen bebunkidi en matu yusiainan, binuama menepakexanikiki.

³⁴⁻³⁵Jaska tibi kainxanauiwen taea matun juintinin kemu betsa betsapa mekin kaneama uindaxankanwen. Jawada chakabu aki juinti kushiyamaxankanwen. Eskaidan, paeanwen inun jawada matumebi man jaska shinainwens besti dabanan iki juinti nishmayamakubainxankanwen. Man jaskai jiweabun yudabu mai jidabi anu en jatu unanti watanun ika juaya bidun medan jikitan kebenaran keskama Diosunabu man paxaxanaai. ³⁶Jamen matunan, en jancha chibankin jeneama Diosbe badi tibi janchakubainxankanwen. Jaska mese tibi taxnixanaai binutan man ma pewen taea janu matun Juchi Kayabi Iyua en matuki nukuaitian ea bebun man mapuxankanai— jatu wanikiaki.

³⁷Januxun badidi Templo jemaintin anuxun Jesúsun jatu yusinkubaini meshu medan tibi Jerusalén anua kainkaini Olivos Mati anu uxatantanaya ³⁸Jesúsun jancha ninkanun ika yudan kaian penaya bestentan Templo jemaintin anu jaki nukui ichabidanbidanibukiaki.

Jesús achinun ika yubakanibukiaki, na janchadan
(Mt 26.1-5, 14-16; Mr 14.1-2, 10-11; Jn 11.45-53)

22 ¹Ja Pascuatianan, Egipto anuxun Diosun yunua debuwanika nai tsuman nawan bakebu tenankin judiobun xenipabu dunkebaini shinanmatitianan, uxa dabe ma kemai misi xaxama pimisbu ma kemaya ²jawenabu Diosbe janchaxunika xanen ibubu inun Diosun jancha kenenibu yusinananmisbun jaska waxun Jesús padanxun june achitan tenankatsi yubakai yuinamei yuda ichapabun Jesús ninkamisbuki ika mesei dateaibun

³janua Jesúsun 12 tsumabu betsa Judas Iscariote Satanás jawen juintiki jikia jawen jaibuaiibu dapaxkabain ⁴Diosbe jawenabu janchaxunikabu xanen ibubu inun jabun Templo mekenika xanen ibubube janchai kaxun jaska watan Jesús jatu achimaxanun ika jatube yubakaya ⁵jabu benimakin yuikin: “Nun mia pei inanxanaai”, akabu ⁶Judas jukin “¿Jatian janixun en Jesús jatu june achimatidumen?” ikin shinankin taewabidanikiaki.

Badi kaya jawen tsumabubetan pikin Jesúsun jatu yuba bena wanikiaki, na janchadan

(Mt 26.17-29; Mr 14.12-25; Jn 13.21-30; 1 Co 11.23-26)

⁷Ja badi Pascua besi taemisbutian ja dukun chaxuwan bake tesenxun taewamisbutian jabanudi misi xaxama pikubainmisbutian ⁸Jesúsun Pedro inun Juan nichinkin yuikin:

—Ja Pascua shinanti nukun piti pewatankanwen— aka ⁹yukakin:
 —¿Jani kaxun bawakin pewatanpa?— akabu ¹⁰Jesúsun jatu yuikin:
 —Bui Jerusalén mae anu jikitan jabianudi juni betsan unpax shumuwanki
 iabidanai jaki nukutan chibanbaintankanwen. Man chibanbaina janu jikiai
 uintan ¹¹ja jiwe ibu yukakin eska watankanwen: “Nukun yusinan nuku
 yuixudan, ¿mia yukapa? ¿Jadatu dintu anuxun en tsumabubetan nukun
 Pascua shinanmati piti pipa?” man wa ¹²januxun dintu ewapa manaundi ma
 pewa matu uinma januxun nukun piti bawakin pewayutankanwen— jatu wa
¹³jawen tsuma dabe kainbaini Jerusalén mae anu jikitan jaska Jesúsun
 jatu yuixu keska ja juniki nukutan chibanbaini jabe kaxun jiwe ibu
 yukatan januxun Pascua besikin piti bawa menetan butani
¹⁴badi kai meshuaya Jesús jawen 12 tsuma kushipayabube jui jikitan
 tapu dapi dakai baxti ibainbainxun piaibun ¹⁵Jesúsun jatu yuikin:
 —En mawadiama na Pascua shinanti matubetan pikatsis ikin en
 manakakubainshinaki. ¹⁶Chanima Dios danainbu juxun en yamawakin
 keyudiamana en ana jabiasyadi piama ixanai. Jakia Dios xabakabi xanen
 ibuaya en matubetan ana pixanai— jatu watan
¹⁷⁻¹⁸jawen Pascua piti keyukin jawen kenchu tsumaxun Dios
 kenwantan yuikin:
 —Chanima en matu yuiiai. En Epa Diosbe xanen ibui en ana judiamana
 uva vino en ana matubetan ayuama ixanai. Abaunkanwen— jatu watan
¹⁹Pascua piti jawen jenekin jatu pima keyutan januxun shinanmati
 bena wakin misi betsa bixun Dios kenwantan namakis tunketan jatu
 inankin yuikin:
 —Na misidan, en matu mawaxunxanai shinanti en yuda keskaki. Ea
 shinanbetanan man pixanai ikis pikin taewakanwen— jatu wa
²⁰bitan tudexun pikubaunaibun jabiasyadi wakin kenchu vino mata
 tsumaxun yuikin:
 —Yuda ichapabu matu medabewai mawakin en jimi en matu
 jabaxunxanai. Na vino en jimi keskaki. Jawen yubaka bena shinanmatiki.
 Ea shinanbetanan, man axanai ikis akin taewabaunkanwen— iwanan,
²¹ana jatu yuikin: —Jamen matu bestichaitun na man ebetan
 piaibun man ea jatu achimai kaii. ²²Jaska ekidi kenenibudan, matun
 Juchi Kayabi Iyua en jaskai mawaxanai. Jakia ja junin ea jatu achimai
 kaidan, peidaxanwan!— jatu waya
²³yuinamei yuka idabebaunkin yuikin:
 —¿Eamen, en jatu amaxanaitsa? —iake iakei keyutan

Jaskatan jatu binutikidi Jesúsun jatu yusinikiaki, na janchadan

²⁴janua jawen tsumabu yuinamekin yuikin: “¿Jesúsbe xanen ibui
 jadatu kaya nun binunanain kai?” ikaibu ²⁵Jesúsun ninkatan jatu shinan
 betsa wamakin yuikin:

—Nawa xukua tibi xanen ibibun jawenabu jatu bika tenemakin yunu chakayamabiakin jawenabu jatu kenwanmakin yuimakin: “Min xanen ibu pepaki”, jatu amamisbu, ichakawabia pepawanikapainun ikadan. ²⁶Jakia matunan, jaska jatu wayamaxankanwen. Jatu keskama eska shinankubainxankanwen, matubunan. Tsuada juni ewabia bedunan jawa yuiama yunuabu besti chibankin amisbu keskakin matunabu betsabu man binuxanaii. Ja inun, tsuanda jatu yunubiakin matunabu betsabu jatu duawakubainxankanwen. ²⁷Eska yudabun uinkin shinanmisbuki. Na baxti ika dakaxun pimisbu xanen ibuki. Jamen jatun jatu pimakin duawaidan, xanen ibumaki, iwanan, shinanmisbuki. Jamen eanan, matu anuxun matu tapinmanun ixun en matu bestibu duawakin uinmakubainaii. Jaska keskakin jadatutunda ea chibankin betsabu man binuai man unantiduki— iwanan, ²⁸ana jatu yuikin:

—Nukunabun ea unanti wakin betsa betsapa ea tenemabiaibun man ea jeneama ikunkainaii. ²⁹⁻³⁰Jaska man bika tenekubainshinawen taexun ebetan pikin jawen xanen ibu jaki tsauti ea dapi tsauxun Israelin 12 bakebun baba xukuabu tibi jau man jatu unanti watan mekexanunbun jaska en Epan ea yunua en jabe xanen ibumis keskakin ebe en matu xanen ibumaxanaii— iwanan,

Pedro jaki dakei mesei kaikidi Jesúsun yuiniaki, na janchadan
(*Mt 26.31-35; Mr 14.27-31; Jn 13.36-38*)

³¹Simón Pedro besti Jesúsun yuikin:

—Simóon, Simóon, jawena matu wakatsis ikin xekiwan xaka tamisbu keska wakin matu unanti wanun, iwanan, Satanásan Epa Dios ma yukashinaki. Uindawe. ³²Jabiaskabiaken ea chibain jau min juinti babuyamanun eandi Epa Dios ma en mia yukaxunshinaki. Mia jaska wa kanebiatan ana ea chiban taewakin ikonwain betsabu jau chintunyanunbun jatu kushipa wakin medabewakubainxanwen— aka

³³Simón Pedron shinan pewama yuikin:

—Yusinaan, jaskamaki. Mibe kai bichiti jiwe anu ka kasmai janu min mawai anu en mibe kaii, jawa dateamadan— aka

³⁴jaska waya Jesúsun nemakin:

—Pedron, min jaskamaki. Na jabia meshu medan pena kemaya takada keudiamu yuikin: “En ja unanmaki”, iki chanima dabe inun bestiki min eki dakekin yui kaii— atan,

Jesúsun jawen tsumabu jenebainkatsi mapui jau
jaskaxanunbun jatu yununikiaki, na janchadan

³⁵Januxun Jesúsun jawen tsumabu yunua butanimabu jatu yukakin:

—Man yusintanunbun peiuma inun kapankaunma inun tae pewetametia benauma en matu nichian man katanimadan, ¿jawa man yupaimamen?— jatu wa jabu kemakin:

—Jaskamajaidaki. Dasibi nun jayaimaki— ikaibun

³⁶Jesúsun ana jatu yuikin:

—Natianan, matu ana nichinti en betsa waii. Tsuada man pei jaya buxankanwen. Tsuada man piti jaya buxankanwen. Tsuada man jawen detenameti jayamadan, matun dakukuti betsa inananantan jawen detenameti bixankanwen. ³⁷Na eska en matuki chaniaidan, jaska ea wakin binumama menexanaibu Isaíasin kenekin yuikin: “Juni chakabu yuibaunxankanikiki”, ani chanima ekidi kenei dasibi betsa texewama ea axankanikiki, ewen menekinan— jatu wa

³⁸jawen tsumabun yuikin:

—Xanen Ibuun, nun ma dabe jayaki, jawen detenametidan— aka jatu yuikin:

—Peki. Ana jadakidi matu yuitimaki —Jesúsun jatu watan

Getsemaní anu ka Jesús Diosbe janchanikiaki, na janchadan

(Mt 26.36-46; Mr 14.32-42)

³⁹Jerusalén anua kainkainkin jawen tsumabu iyui janu kamis anu Olivos Mati mapetan ⁴⁰januxun jatu yuikin:

—Matuki chakabu jikiaya man kaneyamanunbun Diosun jau matu medabewanun uxama jabe janchakanwen— jatu watan

⁴¹jatu jenebaini kai tsuanda jatixun tin ikimenkain ixun mishki tude putabu kai tin imistixun Jesús ka danti itan jawen Epa yukakin ⁴²yuikin:

—Epaan, jamapai dasibi min atidu en unaiin. En mawayamanun min nematidubia en shinain keska ea akama min shinanen besti ea axanwen— ikaya

⁴³ja jaskaitian nai anua Diosun nai tsuma taxnitian medabewakin kushipa watushiaya ⁴⁴janu bika tenechakayamai mestean daka anua niskanjaidai jimi keska tuis tuis ikin mai mecha watan

⁴⁵Diosbe janchai menetan benikidan jawen tsumabuki nukuyuxun juinti nishmajaidatan uxabu bechitan ⁴⁶Jesúsun jatu yuikin:

—¿Jaskai man uxamen? Bestentan chakabu juaya man kaneyamanun Diosbe janchakin jau matu medabewanun yukakanwen— jatu wai

Jesús unanmamabain achinibukiaki, na janchadan

(Mt 26.47-56; Mr 14.43-50; Jn 18.2-11)

⁴⁷Jesús jawen tsumabube jancha menediama juni ichapabube Judas jui jatu bebuxunkidani Jesúski nukutushitan tantsu akaya ⁴⁸Jesúsun yuikin:

—Judasiin, jawen bechipaiti tantsu akaiwen unanmakin min Juchi Kayabi Iyua ¿min ea jatu achimai?— akaya

⁴⁹Jesúsbe mapuabun jaskabidanabu unankin yukakin:

—Xanen ibuun, ¿na eskabidankaxudan, machatuwen jatu detekin nemapa?— ikain

⁵⁰betsan jawenabu Diosbe janchaxunikabu xanen ibujaidatun tsuma jawen pabinki yusiudia maebain mepexpaikin paxteaya ⁵¹Jesúsun nemakin jatu yuikin:

—Min ma axuki. Jatu jaska wayamakanwen— iwanan, jawen pabinki paxtea tin ika bixun patsankin Jesúsun xuxawatan ⁵²⁻⁵³jawenabu Diosbe janchaxunikabu xanen ibubu inun jatun Templo mekenika xanen ibubu inun mae xanen ibu bexmasbun Jesús achinun ika beabu Jesúsun jatu chitekin yuikin:

—Xaba tibi januxun Templo jemaintin anuxun en matu yusinkubainai man ea achiana ikunkainshinaki. ¿Jaskai natian yumetsu achimisbu shinain jawen deteti nupe chaipaya inun jawen kushati jiya man bekanxumen? Natian chanima chakabu dayaya ja medabewamai man ea achinun ika bekanxuki— jatu wa

Jesúski Pedro dakekin padanikiaki, na janchadan

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ninkamas Jesús achixun jawenabu Diosbe janchaxunika xanen ibujaidatun jiwe anu iyuaibun Pedro datekin benanta chipu kakin chibankubaina ⁵⁵janu xanen ibun jemaintin chi ketian yui tsaubaunabube Pedro jatube tsaua june yuaya ⁵⁶janua ainbu dayadu juxun Pedro chin yuai uin kayati watan jatu yuikin:

—Na juni matube tsauadan, jawen tsuma betsaki— akaya

⁵⁷Pedron padankin yuikin:

—Ainbuun, jamaki. En ja unanmaki— ikaya

⁵⁸jakimamadi betsandi bechixun yuikin:

—Miadan, min jabia jatube uinanmandi— aka Pedron ana yuikin:

—Jaskamaki. Eadan, en jamaki— aka

⁵⁹janua jakimatsais katan Pedro metukin juni betsan unanxubima mapuabu yuikin:

—Chanima na junidan, jabe nimiski. Jabia Galilea anuabu jancha nun ninkaii— ikai

⁶⁰ninkatan Pedro datekin yuikin:

—Ja jadi min jaska yuiaidan, en unanmaki— ikaya

ja jaskaitian takada keuaya ⁶¹Jesús nasaukekauan Pedro uianyan jaska Jesúsun Pedro yuia: “Takada keudiana yuikin: ‘En ja unanmaki’, ikin chanima dabe inun bestiki min eki dakei padanananxanai”, aka jaska shinain ⁶²janua Pedro taxnikain kaxachakayamaya

Xanen ibubu Junta Suprema anu Jesús iyunibukiaki, na janchadan

(Mt 26.59-68; Mr 14.55-65; Jn 18.19-24)

⁶³⁻⁶⁴jabianuxundi jabun Jesús achibidan ichakawakin besu beputan kaxe wakun kusha kusha akin yuikin:

—¿Tsuana mia kushaimenkain? Unantan nuku yuiwe— akubainkin
 65 betsas betsapa yuikin ichakawashinkin

66 janua badi chi pexeaya mae yununika xanen ibubu inun Diosbe jawenabu janchaxunika xanen ibubu inun, Diosun jancha kenenibu yusinananmisbu na Junta Suprema ichabu anu Jesús jatu iyuxunabu
 67 jabun yukakin:

—¿Jabia min miamenkain, nukun Mesías Cristodan? Menan nuku yuidiwe— akabu Jesúsun jatu yuikin:

—“Chanima en jaki”, iwanan, en matu yuibia man ea ikunwantidumaki. 68 Ja inun, jawada eandi en matu yukabia man ea yuitidubumaki. 69 Jabiaskabiaken en matu yuiiai ninkakanwen. Na jabiatian man ea tenanbia Dios kushipajaida dasibi binuatun yusiudi en tsaua en matun Juchi Kayabi Iyua en jabe xanen ibukunkainxanaii— jatu wai

70 ninkatan dasibibun yukakin:

—Jaskakenan, ¿jabia min Diosun bakedaka ikai?— akabu Jesúsun jatu yuikin:

—Iubis matumebi jabiadi man yuiiai— jatu wa

71 janua jaki sinatai jabudi yuinamei:

—Jawen kewawen Dios ichai jamebi chakabuikiki. Jaskai nun ninkaiwen taexun jau tenanunbunwen— itan yuinametan

Pilato anu anu Jesús iyuxun chitenibukiaki, na janchadan

(Mt 27.1-2, 11-14; Mr 15.1-5; Jn 18.28-38)

23 1 xanen ibu dasibibun jaska wakin unanti wakin menetan janua benibainkin romano gobernador Pilato anu Jesús iyuxun 2 jakidi chitekin Pilato yuikin:

—Na juninan, chakabu betsas betsapa jatu yusinkin nukunabu itimaska wakin jatu padainkiki. “Min xanen ibu César jau pei inanyamanunbun nukunabu jatu nemamiski”. Jabiadi “En Xanen Ibu Mesías Cristoki”, imiskiaki— akin jakidi yuiiaibu

3 Pilaton ninkakin Jesús uinkin yukakin:

—¿Miadan, min judío xanen ibubu binu keyuamen?— aka Jesúsun yuikin:

—Jawaikika! Jabiadi min ea yuiiai— ikaya

4 januxun judiobu Diosbe jawenabu janchaxunika xanen ibubu inun yudan kaian Pilaton jatu yuikin:

—Jawa chakabu akamaki. Jawawen taexun kupiti jayamaki— jatu wabia

5 Pilaton jancha ninkama jawenchains unanxubima yuikin:

—Judea anuxun jatu yusian akeakekin jatu itimaska wamiski. Galilea anuxun taewaima nenuxundi jatu yusindiaikiki— akaibu

Herodes anudi Jesús iyuxun chitenibukiaki, na janchadan

⁶jaska yuiaibu Pilaton ninkatan jatu yukakin: “Aa, ja junidan, ¿Galilea anuadaka?” ikaya ⁷“Jaa, Galilea anuaki”, akabu Pilaton tapintan ja Galilea xanen ibu Herodes na jabia mae Jerusalén anu bai jushinken jawen soldadobu yunukin xanen ibu Herodes anu Pilaton Jesús jatu yunua iyuaabu ⁸jaska Jesúsun jamapai damiwakin betsa betsapa wai kakai Herodesin ninkamis jaska jawen bedubi dami betsa axuain uinun ixun manajaidamis atimas Jesús uin xanen ibu Herodes benimajaidakin ⁹jaska wamis keska yuka chakayamabiaya Jesúsun jawa yuiamajaidaken ¹⁰jabianudi Diosbe jawenabu janchaxunika xanen ibubu inun Diosun jancha kenenibu yusinananmisbun Herodes yuidiakin jakidi Jesús chitekin ja akeakeaibun ¹¹Jesúsun jawa ja yukaikidi jatube janchama kutaxna niken jawen soldadobubetan Herodesin Jesús ichakawakin kaxe wakin betsa betsapa watan xanen ibu keska wakin sanpu jawendua sawematan jawawen jaska watima ana jawendi Herodesin Pilato anu Jesús yunua iyuaabu

¹²romano xanen ibu Pilato inun judio xanen ibu Herodes uatian sinatanamebianibu na jabiatian daenamei jaibunamei taenibukiaki.

Pilaton Jesús jau mastanunbun jatu yununikiaki, na janchadan

(Mt 27.15-26; Mr 15.6-15; Jn 18.39–19.16)

¹³Pilato anu Jesús ana chintuanbidanabu uinkin Diosbe jawenabu janchaxunika xanen ibubu inun mae xanen ibubu inun yudan kaian Pilaton jatu ichawaxun ¹⁴yuikin:

—Na juni ana ea anu iwexun matunabu padankin jatu itimaska wamis yuikin man chitexuki. Jakia dasibi man uianyan Jesús yukakin unanti wakin jawa chakabuwakin meshina en bechiamaki. ¹⁵Januxundi jau Herodesin unanti watan jaskada wanun, iwanan, en yunua unanti wakin jawa chakabuwashina bechiamadi ea anu Herodesin ana yunuxuki. Jawa jaskashinawen taexun jau tenanunbun en yunutidumaki. ¹⁶Jaskaken kusha kusha a bestitan jau jawama kanun en jatu yunuaii— ikaya

¹⁷⁻¹⁹badi tibi Pascua besiaibutian romano soldadobun jatu achixun bichimabu jau bestichai taxnimanunbun yudabun katua romano xanen ibun jatu kainmaxunpakemisen jabiatiani jani betsa Barrabás jani betsabube detenamekin jatun xanen ibu detepaikin jatubetan jani betsabu tenanken jabube achixun bichimabun ja shinankin januxun yudan kaianen unanxubima yuikin:

—Jau Jesús tenanunbun yunuwe. Jaska watan Barrabás kainmatan nuku nichinxunwen— ikaibun ²⁰Pilato Jesúswen nuikin jawa wama nichinkatsis ikin ana jatu yuikin:

—Jaskamaki. ¿Matun xanen ibu Jesús matu kainmaxunpa?— jatu wabia ²¹ninkakatsi ikama unanxubimajaida ana yunukin:

—Cruzki jatu mastamawe! Cruzki jatu mastamawe!— akeakeabu

²² Pilaton ana jatu nemanun, iwanan, yuikin:

—¿Jawa chakabuwashinamen? Jau tenanunbun unanti wakin jawada chakabuwashina en bechiamaki. Jatu kusha kusha ama bestitan en jenekatsis ikaii, jau jawama kanunan— jatu wabia

²³ ninkamas yuda ichapabun unanxubima ana yuikin:

—Cruzki nuku mastaxunwen— akin jaska shinainbu keska jau jatu axunun yunukin jeneabumaken ²⁴⁻²⁵ atimas jaska shinainbu keska jau jatu axununbun jawen soldadobu Pilaton yunutan ja juni Barrabás detenameawen taexun bichimabu yudabun katua kainmatan januxun Jesús jau mastatanunbun jatu yununikiaki.

Cruzki Jesús mastanibukiaki, na janchadan

(Mt 27.32-44; Mr 15.21-32; Jn 19.17-27)

²⁶ Januxun romano soldadobun cruz Jesús jaki mastanun, iwanan, iamabainkin iyukin juni betsa Simón Cirene anua ewani Jerusalén anu jikiai achixun jau Jesúsun cruz iaxunbainun yunuabu Jesús bebuaya ²⁷ yuda ichapabun Jesús chibanbainaibun ainbuaibu jawen nui kaxai bis ikubainaibu ²⁸⁻³¹ Jesúsun jatu uinkin yuikin:

—Jerusalén anua ainbuaibuun, ewen nui kaxayamakanwen. Jakia janu nuitapaibutian nenuabun yuikin: “Ainbun jabun bake bisbuma besti benimaxankanikiki”, ikaibun januxun yuda ichapabun jabun chakabuwen datekin mawa yuikin: “Nukuki matekei di ikin nuku junewe”, axankanikiki. Jaska inun, ea en jawa wama nibiaken ea ichakawakanikiki. Jamen jabun ea ichakawaibu Diosun jabudi ichakawa chakayamadiakin jatu kupijaidaxanikiki. Jaskawen taea ana ewen nui kaxama matumebi inun matun bakebuwen taea nui kaxakanwen— jatu wabainaya

³² janua juni yumetsu dabe Jesúsbe tenanun, iwanan, iyui ³³ Buxka Xau Mati anu mapematan Jesús cruzki mastatan januxun juni yumetsu dabedi jabanudi jabe mastakin betsa jawen yusiudi betsa jawen yusmaudi mastaxun nichinkin ³⁴ meneabun soldadobukidi Jesúsun yuikin:

—Epaan, ea jaska waibudan, jawa jatu kupiyamawe, jawa unanma iki ikanikikidan— ikaya januxun soldadobun jawen beyustiwen maemanankin jawen tadi paxkanun iwanan: “¿Tsuan dukun jawen tadi bimenkain? Akanwen”, ikaibun ³⁵ jabanudi xanen ibubu inun yuda ichapabun uinkin kaxe wakin yuikin:

—Juni betsabu medabewamiski. Jamebidi jau paxadianunwen. Jaska Diosun Katua Mesías kayamenkain cruz anua na jabiatian butuai uinkin nun ikunwantiduki— ikaibun

³⁶⁻³⁸ ji bexa sapaki kenekin: “Nadan, judiobun xanen ibujaidaki”, akin kenea Jesús mamaki mastaxun soldadobun chaima ja dapixun kaxe wakin vino jene muka amapaikin yuikin:

—¿Min judio xanen ibu kayabimenkain? Nuku unanmai mimebi paxai butudikaintanwen— adiaibun

³⁹janua yumetsu dabe jabe mastabudi betsa jancha chakabukin yuankin:
—¿Min Diosun Mesías Cristomenkain? Mimebi bututan nukudi butediwe, nun paxanunan— akaya

⁴⁰⁻⁴¹janua betsan kunyan akin nemakin yuikin:

—Nukunan, nun chakabuwashinawen taexun achixun ichakawakin nuku tenankanikiki. Jakia na juni pepatun jawa chakabuwaismabiaken ichakawakin nukube tenandiakanikiki. ¿Dioski meseama na juni pepa min jatubetans jaska wai? Ana jaska yuiyamawe— iwanan, ⁴²jawen chakabuwen datekin Jesús yuikin:

—Jesúsun, min xanen ibui taeaitianan, ewen nui ea jakimayamaxanwen— akaya ⁴³Jesúsun yuikin:

—Chanima en mia yuiiai. Min shinan betsa waiwen taea na jabiatian pe bestu anu ebe ka min jiwepakexanai— ikaya

Jaskatan Jesús mawanikiaki, na janchadan

(Mt 27.45-56; Mr 15.33-41; Jn 19.28-30)

⁴⁴⁻⁴⁵janua badi manananbibuaken badi nuka meshua itsa daka manaibun ma badi kai nai puchinin dakaken bepenakainaya Templo medan dintu wakin ja tadiwen kebenibu jamebi manaundia namakis dis iki keyuaya ⁴⁶janua Jesús bis ikin yuikin:

—Epaan, mia anu en yushin en nichiaian ea mekewe— akin jaska yuitan mawaya

⁴⁷januxun romano soldado capitán Jesús jaskai uintan Dios kenwankin yuikin:

—Chanima na juni chakabumaki— akaya

⁴⁸ja dapi yudan kaian mapubaunabun jaskaxu dasibibun uin jawen nui juinti nishmai xutidin xutidin ibainaibun ⁴⁹janua jatidi Jesúsun jaibuaibu inun ainbuaibu Galilea anua jabe beshianbudi benanta nixun jaskai uinibukiaki.

Jesús cruzkia mawa butebain maiwanibukiaki, na janchadan

(Mt 27.57-61; Mr 15.42-47; Jn 19.38-42)

⁵⁰⁻⁵⁴Janua ma badi kaya jabiatian di judiobu juindukunkatsi bebunkidi piti pewakin dasibi menea badi jikiaya ana dayatidubumawen taea janu Judea anua José jawen mae Arimatea anua ewai yumeni, juni pepa inun duapatun Dios xanen ibuxanaitian manakin judio xanen ibubiakin jau Jesús tenanunbun xanen ibu betsabube Junta Suprema jatube ja yubakama ishian José romano xanen ibu Pilato anu kaxun Jesús maiwatanun ixun jawen yuda yukai kaxun yuka yunua ma juindukunti kemaiwen taea jawaida kaxun cruz anua jawen jaibubetan Jesúsun yuda jatu butemaxun tadi chaipa juxupawen dayabutan buxun maiwati mishki tanpe bona kini waimabu anu janu yuda betsa datandiabuma anu Josén jawen

jaibuaibubetan Jesúsun yuda datantan mishki ewapawen bepubainaibun⁵⁵ janua ainbuaibu Galilea anua Jesúsbe beshianbun Jesúsun yuda buaibu chibanbaini maiwati tanpe inun jaska Jesúsun yuda datantan bepubainaibu uintan⁵⁶ jadia Jerusalén anu chintunbain jatun jiwe anu jikixun xeni ininipa pepa inun jawen dapuxti dau betsa jawen yuda taxka wakin chaputima wati dau pewakin meneabun ma badi jikiaya juindukuntianken jaska Diosun Moisés yununi shinain ainbuaibu juindukunkin manabaishina

Jesús maiwashinabu bestenkaina benanibukiaki, na janchadan
(Mt 28.1-10; Mr 16.1-8; Jn 20.1-10)

24 ¹janua ma juindukunti binushinken domingotian penamajaida maiwati tanpe anu bukatsi jawen dapuxti xeni ma pewashinabu buaibun ainbu betsabudi jatu chibain jatube bui ²kematan ja mishki beputi ewapajaida tsuanda ma tadanbu bechitan ³jikikain Xanen Ibu Jesúsun yuda jawa bechiama ⁴jani tsuan jaskada washina unanma janua e iki keyutan uiainbun jabianudi jawaida juni dabe jatu bebun taxnia tadi juxupa chaxajaida sawea bechitan ⁵jaska uin datejaidai main beui beti ikaibun juni dabetan jatu yuikin:

—¿Jaskakin maiwati medan juni jiwea man benakanai? ⁶⁻⁷Nenumaki. Ma bestenkainaki. Galilea anuxun matu yusinkin yuikin: “Eadan, Matun Juchi Kayabi Iyua juni chakabun ea achixun jiki ea mastabu mawa xaba dabe inun besti kaya en ana bestenxanii, jaska Diosun yubanidan”, akin matu yusinkin yuimadan, ¿man shinanmamen? Shinankanwen— jatu wa

⁸jaska Jesúsun jatu yuima chanima shinantan ⁹⁻¹⁰maiwati tanpe anua kainbaini María Magdalena inun, Juana inun, Santiagon ewa María inun, ainbu betsabu jabun kaka buxun Jesúsun ¹¹tsuma kushipabu inun jabun Jesús chibanmis betsabu jaska uinkanxu jatu yuibiabu ¹¹jatun jancha jawa ikunwanma: “Jaskatandun jaskanun jumei ikanikanikiki”, ikaibun

¹²janua Pedro jadi chaniaibun ninkatan: “Eandi uintanun”, ika taxnikaini maiwati tanpe anu kushikain uinun ika kakui denikain uke medan uinkin jawen yabushinabu tadi jamaudi daka uintan jaska uin e iki teku itan Pedron jaskashina shinain shinanyabi kaya

Emaús maekidi bai tanabainaibu Jesús jatuki
nukunikiaki, na janchadan
(Mr 16.12-13)

¹³janua Jerusalén anua bui ¹¹kilómetro mae betsa jawen kena Emaús anu jabias xabatian Jesúsun tsuma betsabu dabe bui ¹⁴jaska wa akeketan tenanshinabu bestenkainakidi janchai ¹⁵yuinamekubainaibun jabiatandi Jesús jatu ichun taxnitán kakin jatu chibain kai jatuki nukukainaya ¹⁶jau unanyamanunbun Diosun jatun bedu betsa wa ¹⁷januxun Jesúsun jatu yukakin:

—Bai tanabidanidan, ¿jawa yui man ikubainkanai?— jatu wakin ana jatu nui chipea nuiyabi buaibun ¹⁸januxun jabu betsa Cleofásin yuikin:

—Jerusalén anua jaska dasibi washinabu dasibibun unankanikiki. Jerusalén anu bai jubiashina ¿jaskakin mian besti min jaska uianma ishianmen?— aka

¹⁹januxun jatu yukakin:

—¿Jaskashinamen? Ea yuiwe— aka ana yuikin:

—Jesús Nazaret anua ewani ichakawakin eskaya tenanshinabuki.

Mia yuinun ninkawe. Diosun jancha yuixunika pepajaida eskakin Dios inun yuda ichapabu jawen aka uinmakin daya duapa inun jancha kushipai unanepai ²⁰pepajaidabiaken jau tenanunbun Diosbe nukunabu janchaxunika xanen ibubu inun nukun mae xanen ibu betsabun nawabu anu Jesús yunuabu cruzki jatu mastamabu mawashinaki. ²¹Ja inun, Jesúsun nawabu nichinkin Israelbu nuku pe meekin Dios nuku daewaxunxanai dabanen nun jamen dasibi manakakubainshinaki. Ja inun, ma xaba dabe inun besti binubiakainaya nun jawa uindiamaki. ²²⁻²³Jaska inun, nukubetan jabun Jesús chibandiamisbu ainbuaibu penamajaida maiwati tanpe anu buxun Jesúsun yuda jawa uianma nai tsuma dabe jatu bechankamea nia uiainbu jatu yuikin: “Jesús jiweaki”, jatu wa bexunkiaki. Jaska nuku yuiabu datei nuku dateabu e itan nun ninkaki. ²⁴Jaska nukuki chaniaibun nukun jaibu betsabudi maiwati tanpe anu buxun jaska ainbuaibun yuixu keska uinkin jawa Jesús uianma idiakanxukiaki— aka ²⁵janua Jesúsbe janchai unandiabuma Jesúsun jatu yuikin:

—Diosun jancha yuixunikabun medabenan Mesías Cristokidi kenenibu unanbiakin unanxubida ikun bexmas wakin shinan pewadiama man kaneaii. ²⁶Nukun medabenan Mesías xanen ibudiana jau jaskai yumain kanun Epa Diosun yununiki— iwanan, ²⁷Diosun Moisés yusian keneniwun jatu yusin taewakin Diosun jancha yuixunikabu dasibibun yusian janchawendi Jesúsun jatu yusinkin jatu unanmakubainaya

²⁸Emaúski kemai buaibun jatu binubainai dabanen ²⁹nemakin yuikin:

—Ma badi kai meshuikiki. Jabianu nukube niti iyuwe— akabu ninkatan jabianu jatube bashikui niti itan ³⁰jabianuxun jatubetan pinun ika baxti itan misi bixun piti jayabuwen taexun Dios kenwantan tunkexun jatu inanyan ³¹jabiatandi Diosun jatun bedu ana betsa waya Jesús uinkin unantanaibuns samama ana damikainaya ³²ja dabetan shinain yuinamekin:

—Bai tanabidankin Diosun jancha yuixunikabun yusini nuku unanmakin nuku yusianyan nun juinti shinan chankankunkidanzuki, ¿chanimamen?— iki yuinametan ³³ma meshubiaken ana janu ikatsi ikama benibidani Jerusalén anu jawaida chintunbain Jesúsun 11 tsuma kushipayabu inun jatube jawen tsumabu betsabu ichabu anu jatu anu jikitushitan ³⁴januxun jabu ichapabu yuikin:

—Chanima ma besteanke, nukun Xanen Ibudan, ja Simón Pedroki nukukin uinmaxudan— iwanan, yui jatuki chaniaya

³⁵januxun jaska Jesús unandiamabia bai tanabainkin Jesúsun ja dabe jatube kakin yusinxu yuitan januxun misi tunkexun jatu inain anu atimas xabakabi uinbidan jatu yuiaibun

Jesús bestenkaina jawen tsumabuki nukunikiaki, na janchadan
(Mt 28.16-20; Mr 16.14-18; Jn 20.19-23)

³⁶jaskaxu yui menediamama janchan wainbun Jesús jawaida dami nashui itan jatu jancha wakin yuikin:

—¿Jaska man unanumamen? Ma en juaki. Dateyamakanwen— jatu wabia ³⁷datekin shinankin yuikin: “Nadan, ¿yushinmenkain?” ikin uinkin shinainbun ³⁸Jesúsun ana jatu yuikin:

—¿Jaskai mesei datei man e ikanai? ¿Man juinti kushimen?— iwanan, ³⁹⁻⁴⁰jawen meken inun jawen tae jatu uinmakin yuikin:

—En tae inun en meken uinkanwen, jabia en eakidan. Nami inun xau en jaya keska yushin jayaismaki. Mekin ea unankanwen— jatu wa ⁴¹shinan chankanbiai bika tenekin ikunjaidawadiabumawen taexun Jesúsun ana jatu yukakin:

—¿Piti man jayamen? Ea inankanwen— jatu wa ⁴²baka xui inanbu ⁴³jatun bedubi pitan ⁴⁴yuikin:

—“Moisin yusini jancha inun Diosun jancha yuixunika betsabun yusini jancha inun Davidin jawen nawakin kenwanti jancha Salmoswen Dios yubakaniki, jau dasibi jaskaxanunan”, iwanan, yuinibu en mawadiama matu anuxun jabiasyadi matu yusinkin dasibi ekidi na kenenibu bebunkidi en matu yuikubainimaki— iwanan,

⁴⁵ja kenenibu una jau ninka pewanunbun ⁴⁶jatu yuikin:

—Ekidi kenenibu matu yuinun ninkakanwen. Diosun Katua Mesías medabenan yumantan mawa xaba dabe inun besti kaya ana bestenxanikiki. ⁴⁷Jaskawen taexun jawen kushipawen jatu yusinxankanikiki, jau jatun chakabu Dioskidi chakabumisbu jau jenetan jabun shinan betsa waibu Diosun buaxunxanikikiki. Nawa xukua tibi ninkaxanaibu yuini matun Jerusalén anuxun taewakin ⁴⁸na kakape ekidi chanibaunxankanwen. ⁴⁹Jaska en Epan ea yununi keska wakin eandi en matudi yunuai. Diosun jawen janchati kushipa datetima en matu yunuxanai binun ika na jabia Jerusalén anu jiweyuxun manakayukanwen. Diosun jawen kushipa nai anua matu inan bitan nawa dasibibu yusinkin taewaxankanwen— jatu watan

Jesús jawen tsumabun bedubi Diosun aininikiaki, na janchadan
(Mr 16.19-20)

⁵⁰jaskakunkainkin xaba betsatian Jerusalén anua kainkaini Betania anu Jesús kakin jawen tsumabu iyuxun jawen meken sananxun jau

Diosun jatu duawakubainxanun jatu yukaxunaya ⁵¹jabu jenemabainkin
nai anu jawen Epan ainiaya ⁵²jatu jenebainai uin jawen tsumabun
teskanbainbainxun Jesús kenwantan benimajidai Jerusalén anu ana
chintunbidan ⁵³Diosun kushipa manakakin xaba tibi jawen Templo
anuxun Dios kenwankubainibukiaki.

Jatiski, Teófiloon, na kakape en mia kene keyuxunxudan.

Lucas